


EUANGELION UNNI TA JESU-ÚBA CHRIST-KO-BA

UPATOARA LUKA-UMBA



The Gospel According to Luke in the Awabakal language of
Australia

**EUANGELION UNNI TA JESU-ÚBA CHRIST-KO-BA
UPATOARA LUKA-UMBA**
**The Gospel According to Luke in the Awabakal language of
Australia**

Public Domain

Language: Awabakalkoba (Awabakal)

2020-03-03

PDF generated using Haiola and XeLaTeX on 11 Nov 2022 from source files dated 3 Mar 2020
d6db59b5-f660-51ee-98f5-a9b6193eac6e

Contents

Luka	1
----------------	---

EUANGELION UNNI TA JESU-ÚMBA CHRIST-KO-BA UPATOARA LUKA-UMBA

¹ WONTO ba kauwálo mankulla unnoa tara túgunbilliko gurránto géen kinba,
² Yanti bo gearun kin bara gikulla, unnoa tara nakillikan kurri-kurri kabirug gáton mankillikan wiyellikanne koba.

³ Murrarág tia káton yantibo, koito bag ba tuig ko giroug, Teopolo murrarág ta,

⁴ Gurra-uwil koa bi tuloa, unnoa tara wiyatoara banug ba.

⁵ Yanti-kálai ta Herod noa kakulla, Piriwál noa kakulla Iudaia ka, kakulla noa tarai hieru Dhakaria yitirra, Abia-úmbe konara: gáton nukug gikoúmbe yinálkun koba Aaron-úmbe, giakai bountoa yitirra Elidhabet.

⁶ Buloara bula kakulla murrarág Eloi kin, mikan ta gurraiyeleún bula Yehóa-ko noa ba wiyellikanne yarakai ma korien.

⁷ Keawaran bula wonnai korien kulla, bountoa Elidhabet gurrauwai; gáton bula ba gurrogbai kakulla.

⁸ Gáton yakita kakulla, unullielá noa ba Eloi kin makan ta, yirrug ka gikoug kin hieru koba,

⁹ Yanti kiloa hieru koba uman, yirrug ka gikoúmbe ta upulliko bon porapora koiyug ko uwá noa ba nao koba Yehóa kai koba.

¹⁰ Gáton yanti bo yantinto konara kúri wiyellielá warai ta yakita winellielá ba porapora.

¹¹ Gáton paipéa noa ágelo Yehóa-úmbe gikoug kin, garokillielá noa túgkagkirri ka koiyug kón ta porapora ka.

¹² Gáton nakulla bon noa ba Dhakaria ko, unma bon noa ba, kinta gaiya noa ba kakulla.

¹³ Wonto ba ágelo wiya noa, Kinta kora bi kauwa, Dhakaria; kulla gurra ta wiyellikanne giroúmbe, gáton nukug ko giroúmbe ko wonnai kánun giroúmbe, gáton wiyánun bi giakai yitirra Ioanne.

¹⁴ Gáton pitál bi kánun, pitál kauwákan kánun pórkullinun gikoug kinbirug.

¹⁵ Kauwál wal noa kánun, mikan ta Yehóa kin, gáton keawai wal noa wain pitánun, keawai tarere, gáton warakag wal noa witellinun Marai yirriyirri kan birug ko, waraka birug tunkán ta birug.

¹⁶ Gáton noa wiyánun wal barun kauwál-kauwál wonnai Ithárael-úmbe Yehóa-kin ko Eloi ta barúnba.

¹⁷ Gáton wal noa uwánun gikoug kin mikan ta kaiyu ka Marai ta Elia-uúmbe, warbuggulliko búlbúl biyugbai tara koba wonnai kola, gáton barun kinko tuloa kako; uma-uwil koa barun kúri kurrikurri Yehóa kinko.

¹⁸ Gáton noa Dhakariako wiya bon ágelonug, Yakoai kan bag gurranun unni? kulla bag gurrogbai, gáton nukug emmoúmbe gurrog géen.

¹⁹ Gáton noa ágeloto wiya bon, Gátoa Gabriel, gákillin Eloi kin mikan ta; gáton yuka tia wiyelliko giroug, gáton túgunbilliko gali tara ko pitálmullikanne ko.

²⁰ A! gurrulla bi, góg ko wal bi kánun, gáton kaiyu korien wal bi kánun wiyelli ta, yaki-kálai tako purreag kako unni tara kánun ba, kulla bi ba gurra korien wiyellikanne emmoúmbe, kabo kánun wal unni tara.

²¹ Gáton bara kúri ko mittia Dhakarianug, gáton kotellielá minnug-bullielá noa tunkéa noa nao ka.

²² Gáton noa ba paikulléun warrai ta, kaiyu korien noa wiyelli ko barun; gáton bara gurra Marai noa nakulla nao ba; kulla noa wauwál-wauwál umá barun gáton, garokillielá noa góg ko.

²³ Gáton kirun kabulla purreag gikoúmbe umullikanne, waita gaiya noa uwá kokerá ko gikoug ka tako.

²⁴ Gáton yukita purreag ka Elidhabet gikoúmbe nukug warakag bountoa, gáton yuropulléun bountoa warán yellenna ka, wiyellielá bountoa,

²⁵ Yanti noa tia Yehóako umá nakulla noa tia ba purreag ka, mankilliko barun ba béelmulli tin kúri tin.

²⁶ Tarai-ta yellenna ka hek ka, Gabriel ta ágelo ta puntimai ta wiyabunbia bon Eloi kinbirug uwolliko, purrai kola, Galiláia koba, giakai Nadharet,

²⁷ Mirrál lako wiyatoara ko, kúri kako Yothep kinko yitirra ko, wannai taro noa Dabidúmba; gátun mirrál gíakai yitirra Mari.

²⁸ Gátun noa ágelo uwa bounnoun kin, gátun wiyelliela, A! murrarág umatoara bi Yehóa kátan gíroug katoa ba; murrarág umatoara bi nukug ka.

²⁹ Gátun bountoa ba nakulla bon, kinta bountoa kakulla wiyellita gíkoug kin, gátun kotelliela bountoa minarig unni totóg kátan.

³⁰ Gátun ágeloko wiya bounnoun, Kinta kora bi, Mari: kulla bin pitálmatoara Eloito noa.

³¹ A, gurrália bi, warakág bi kánun, wannai kan gíroug kin pika ka, gátun yinal pórkullinun, gátun bi gíakai yitirra IETHU.

³² Gátun wal noa kauwál kánun, gátun wal bon wiyánun gia kai Yinal ta wokka ka ko; gátun noa Yehóako Eloito gúnun wa bon yellawollikanne biyugbai koba Dabidúmba gíkoúmba:

³³ Gátun noa wiyánun wal yanti-katai barun Yakobúmba; gátun gíkoúmba piriwálkanne keawai wal kánun wirán.

³⁴ Wiya gáiya bountoa bon ágelonug Mariko, Yakoai ke unni kánun, kulla bag kúri korien?

³⁵ Gátun noa ágeloko wiya bounnoun, Tanan wal noa uwánun Maraikan murrarágkan gíroug kinko, gátun kaiyuko wokka tinto wutinun wal gíroug, koito ba unnoa ta murrarág pórkullinun gíroug kin; wiyánun gíakai yinal ta Eloi koba.

³⁶ A, gurrália, gíroumba wuggunbai Elidhabet, warakág bountoa yinal gurrogeen koba bounnoun ba; gátun unni ta yellenna hek ta bounnoun-kai-kan wiyatoara gurrauwai.

³⁷ Kulla gurakito ke noa Eloito kaiyukanto ke.

³⁸ Gátun bountoa Mariko wiya, Kauwá yanti kámúnbilla tia wiya bi ba; gátua mankillikan Yehóa-umba. Gátun noa ágelo púntirkulléun bounnoun kinbirug.

³⁹ Gátun bountoa Mari bugkulléun unti-tara purreág ka, gátun uwa bountoa karakai bulkára kola, kokerá ko Yuda kako;

⁴⁰ Gátun bountoa uwa kokera ko Dhakaria-umba kako, gátun búgbúg ka bounnoun Elidhabetnug.

⁴¹ Gátun yakita gáiya gurrá bountoa ba Elidhabetto pulli Mariúmba, tulutilléun gáiya wannai bounnoun kin pika ka; gátun warapál bounnoun ba Elidhabet kin Maraikanto murrarágko:

⁴² Gátun bountoa wiyelléun pulli wokka wiyelliela, murrarág umatoara bi nukug ba; gátun murrarág umatoara peil gíroumba pika koba.

⁴³ Gátun minarig tin tia unni, tanan uwa tunkan piriwál koba emmoúmba?

⁴⁴ Kullá bag ba gurrá pulli gíroumba gurréug ka emmoug kin, wannai gáiya tia tulutilléun emmoug kin pika ka pitál ko.

⁴⁵ Gátun murrarág umatoara bountoa gurrá; kulla unnoa tara kánun umatoara, wiyatoara bounnoun kin Yehóa kinbirug.

⁴⁶ Gátun Mariko bountoa wiya, “Maraito emmoúmba ko wiyánun murrá bon Yehóanug,

⁴⁷ Gátun maraito emmoúmba ko pitál umulléun Eloi kin Miroma emmoúmba.

⁴⁸ Kulla noa nakulla mirrál bountoa ba umullikan gíkoúmba; A, unti birug yantinto tia wiyánun murrarág upatoara.

⁴⁹ Kulla noa tia kaiyukanto unnoa tara kauwál uma; gátun yitirra gíkoúmba murrarág upatoara kátan.

⁵⁰ Gátun murrá gíkoúmba barun kinba kintakan bon kátan willuggél kúri kabirug tarai kúri kabirug.

⁵¹ Túgunbilléun noa kaiyukan turrug gíkoúmba; wupéa noa barun garug gara yaroyaro búlbúl ban kotellikanne.

⁵² Upéa noa barán parrán kaiyukan yellawolligél labirug barúnba, gátun wupéa noa barun mirrál wokka lag.

⁵³ Gukulla noa kapirrikan ko murrarág ta, gátun noa barun parókan yuka mirrál ko.

⁵⁴ Umulléun noa gíkoúmba umullikan Itháraelnug, gurrulli birug gíkoug kinbirug murrá ta gíkoúmba;

⁵⁵ Yanti wiya noa ba barun biyugbai to gearúnba, Abáramnug, gátun barun wannai tara gíkoúmba yanti katai.”

⁵⁶ Gátun Mari bountoa kakulla bounnoun katoa goro ka yellenna ka, gátun willug ba gáiya bountoa bounnoun ka tako kokera ko.

⁵⁷ Yakita ġaiya Elidhabetúmba kakulla wonnai pórkuullinún; ġatun yinal bounnoun ba pórkuulléun.

⁵⁸ Ġatun ġurra bara kótita ko bounnoun bako, yanti Yehóako noa ba murraráġ umá bounnoun kin; ġatun bara pitál kakulla ġatun bounnoa

⁵⁹ Ġatun yakita ġaiya purreáġ ka, uwa ġaiya bara kullabulliko wonnai ko; ġatun bara wiya bon ġiakai Dhakaria, biyuġbai tin yitirra tin

⁶⁰ Ġatun tunkanto wiya bounnoa, Yanoa; kulla bon wiyánun ġiakai Ioanne.

⁶¹ Ġatun bara bounnoun wiya, Keawaran ġiroúmba kótita wiya ba ġiakai unni yitirra

⁶² Ġatun bara túġa umulléun bon biyuġbai ko ġikoúmba ko, wonnéen noa bon yitirra wiyánun?

⁶³ Ġatun noa wiya upulligél ko, ġatun noa upa wiyelliela, Yitirra noa ġiakai Ioanne. Ġatun bara yantinto kota.

⁶⁴ Ġatun tanoa-kál-bo kurraka buġkulléun ġikoúmba, ġatun bon ġikoúmba tálláġ balbal kakulla, ġatun noa wiya, ġatun noa wiya murrari Eloinuġ.

⁶⁵ Ġatun bara kinta kakulla yantin ta untakál; ġatun unni tara wiyellikanne totóġ kakulla yantin ta kalog koa bulkaroa Yuda ka.

⁶⁶ Ġatun bara yantinto unnoa tara ġurra wúnkulla barun kin búlbúl la, wiyelliela, Yakoai unni ta wonnai kánun! Ġatun máttara Yehóa-úmba ġikouġ kin kátan.

⁶⁷ Ġatun noa Dhakaria ko biyuġbai ġikoúmba, warapal bon wupéa Marai to yirriyirri to, ġatun noa wiyelliela ġiakai, ⁶⁸ “Kámünbilla bon Yehóanuġ Eloinuġ Ithárael koba pitálliko; kulla noa uwa barun nakálliko, ġatun wirrilliko kúri ko ġikouġ kaiko.

⁶⁹ Ġatun bouġbuġġa noa nulka-nulka ġolomullikan ġearun, kokerá Dabid-úmba ka ġikoúmba mankillikan;

⁷⁰ Yanti noa ba wiya kurraka ko propet koba ko yirriyirrikan to yantin to, purrai yantin kurrikurri kabiruġ:

⁷¹ Ġoloma-uwil koa ġearun ġearúnba bukka tukulla biruġ, ġatun máttara biruġ barun kinbiruġ yantin tabiruġ yarakai willuġ kabiruġ,

⁷² Umulliko murrari ko wiyatoara barun kin biyuġbai ko ġearúnba, ġatun ġurrulliko ġikoúmba wiyatoara yirriyirri ta;

⁷³ Pirral-man noa ġali wiyelliela bon Abáramnuġ biyuġbai ġearúnba,

⁷⁴ Ġúwil koa ġearun noa, mankilliko ġearun máttara biruġ bukkakan tabiruġ ġearúnba, ġurra-uwil koa ġéen bon kinta korien ko,

⁷⁵ Yirriyirrikan ġatun murraráġkan mikan ta ġikouġ kin, yantin ta purreáġ ka moron ġearúnba.

⁷⁶ Ġatun ġintoa, wonnai ta, wiyánun bin yitirra propet ta wokka kako; kulla bi uwánun ġanka mikan ta Yehóa kin, upulliko yapuġ ko ġikoúmba;

⁷⁷ Ġukilliko ġurrulliko moron ko ġikouġ kaiko kúri ko, warewarekan yarakai barúnba,

⁷⁸ Murrari tin kanwollin Eloj koba tin ġearúnba, ġurrakan wokka kabiruġ tanan uwa ġearun kinko,

⁷⁹ Ġukilliko purreáġ barun ko yellawolli ta ba ko ġoroġorá ba ko, ġatun komirra kaba tetti koba, yutilliko tinna ko ġearúnba ko yapuġ koa pitál koba koa.”

⁸⁰ Ġatun wonnai poaikulléun, ġatun ġuraki noa maraikan ko, kulla noa koruġ koa yakita ko purreáġ kako paipéa noa ba Ithárael kinko.

2

¹ YAKITA purreáġ ka, wiya noa Kaithariko Augútoko, upa-uwil koa barayantin kúri murrapulliko.

² Ġatun unni murrapullikanne una yakita Kurinio noa ba kobána kakulla Thuria ka.

³ Ġatun yantin bara uwa murrapulliko barun ka tako.

⁴ Ġatun noa Yotheop uwa wokka-laġ Ġalilaia kabiruġ, kokerá biruġ Nadharet tabiruġ, Iudaia kolaġ, kokerá kolaġ Dabidúmba kolaġ, ġiakai yitirra Bethlehem; (kulla noa kokerá koba ġatun kotita koba Dabidúmba;)

⁵ Murrapulliko bon ġatun Mari bounnoun katoa, wiyatoara nukuġ ġikoúmba, wonnai kan bounnoa warakaġ.

⁶ Ġatun yakita kakulla, kakulla bara ba unta, purreáġ ka kátan pórkuulli koa bounnoa ba wonnai.

⁷ Ġatun bountoa pórbuggulléun kurri-kurri yinal, ġatun bountoa muġġama bon kirikin to, ġatun bon wúnkulla takilligélla buttikaġ koba ka; kulla wal tantullan kokera takilligél.

⁸ Ġatun bara éipukál untoa kakulléun, tumimillin wirrál barun ba tokoi ta

⁹ Ġatun noa aġelo Jehóa-úmbe tanan uwa barun kin, ġatun kullaburra Jehóa-úmbe kakulla barun katoa; kinta ġaiya bara kakulla.

¹⁰ Ġatun noa aġeloko wiya barun, Kinta kora; kulla nurun baġ wiyan murrarāġ totóġ kakilliko pitál ko, kakilliko yantin ko kúri ko.

¹¹ Kulla nurúnba pórakulléun unni purreāġ, kokerá Dabidúmbe ka, Ġolomullikan ta, noa Kritht ta Piriwál ta.

¹² Ġatun unni túġa kánun nurúnba; nanún boboġnuġ ġamatoara kirikin taba, kakillin ba takilligél laba

¹³ Ġatun tanoa kal bo paipéa konara morokokál ġikouġ katoa aġelo katoa, murrarāġ wiyellin bon Eloinuġ, ġiakai,

¹⁴ Wiyabunbilla bon murrarāġ Eloinuġ wokka kaba moroko kaba, ġatun kámunbilla pitál purrai tako, murrarāġ umatoara barun kúri ko.

¹⁵ Ġatun kakulla ba, waita uwa bara ba, aġelo barun kinbiruġ moroko kolaġ, wiyellan bara éipukál taraikan-taraikan, Waita ġéen yakita Bethlehem kolaġ, na-uwil koa unnuġ tara kakulla ba, ġala Jehóako noa wiya ġéarun

¹⁶ Ġatun bara uwa kurrakai, ġatun nakulla Marinuġ, ġatun boboġ pirikilliel ta takilligél laba.

¹⁷ Ġatun nakulla bara ba, wiyabúnbéa bara yantin ta purrai ta unnoa wiyellikanne wiyatoara barun wonnai tin.

¹⁸ Ġatun bara yantinto ġurra, kotelliel ta unnuġ tara, wiya barun bara éipukál-lo.

¹⁹ Wonto ba bountoa Mariko miromá unni tara, ġatun kota bountoa minki ka búlbúl-la bounnoun kin.

²⁰ Ġatun bara éipukál willuġ ba kakulla, murrarāġ wiyellin ġatun pitálmullin bon Eloinuġ ġala biruġ natoara biruġ ġurratoara biruġ bara yantita wiyatoara ba barun kai.

²¹ Ġatun purreāġ ét ta kakulla ba, kullintiel ta túġa-witia wonnai, ġiakai bon wiya Iéthu, ġala ba wiya noa aġeloko kurrikurri noa ba pika ka kakulla kunto ka.

²² Ġatun purreāġ ka ġoloin ta killibinbin bounnoun ba, yanti Mothé-ko noa ba wiya, mankulla bara bon Hierothalem kolaġ, ġukilliko bon Jehóa kin;

²³ (Yanti wupa ba wiyellikanne ta Jehóa-úmbe ġiakai, Yantin kúri tara ġanka-ġanka pika kabiruġ yirri-yirri wal kánun yitirroa Jehóa koba;)

²⁴ Ġatun ġukilliko ġutoara, ġala wupa ba wiyellikanne taba Jehóa-úmbe, ġiakai, Buloara purrouġkan ġa keawai wuroġ buloara poppolameri.

²⁵ A! ġatun kakulla noa tarai kúri Hierothalem kaba, ġiakai noa yitirra Thimeon; ġatun unnoa kúri wiyellikan tuloakan, ġatun ġurrullikan, mittillin pitál ko Ithárael-úmbe ko; ġatun Marai yirri-yirri-kan kakulla ġikouġ kin.

²⁶ Ġatun bon wiyatoara Maraito yirri-yirri-kan-to, keawai noa nanún tettibullikanne, na-uwil koa noa Krithtnuġ Jehóa-úmbe.

²⁷ Ġatun noa uwa Marai toa hieron kako: ġatun bula ba porikullaito puruma wonnai Iethu kin, umulliko bon yanti ko upatoara ko wiyellikanne tako,

²⁸ Mankulla ġaiya bon noa ġikouġ kin turruġ ka, ġatun pitálma noa bon Eloinuġ, ġatun wiyelliel ta,

²⁹ “Wamúnbilla bi tia Jehóa yakita pitálkan, yanti wiya bi ba:

³⁰ Kulla baġ nakulla ġaikúġ ko ġolomullikan ġiroúmbe, ³¹ Ġali ko kakilliko ġintoa yantin ko kúri ko mikan tako;

³² Kaibuġ kakilliko barun ethánékal ko, ġatun pitál kakilliko kúri ko Ithárael ġiroúmbe ko.”

³³ Ġatun bula Yothepp ġatun Mari kotelliel ta unnoa wiyatoara ġikouġ kai.

³⁴ Ġatun Thimeon ta noa pitálma barun, ġatun wiyelliel ta Marinuġ tunkan ġikoumbe, “A! kátan noa unni wonnai kakilliko puntimulliko, ġatun bouġkulliko kauwál-kauwál barúnba Ithárael koba; ġatun túġa ko wiyéa kánun;

³⁵ (Kauwa, yirrakko bin turánun wal marai ġiroúmbe kóti,) paipi-uwil koa kotatoara búlbúl labiruġ kauwál-kauwál labiruġ.”

³⁶ Ġatun kakulla wakál Anna, propetkun, yinálkun Panuel koba, konara koba Ather koba; bountoa ta ġurroġéen ġaġkakálin, ġatun kakulla bountoa poribai ta wunál la hepta ta, murrakin tabiruġ bountoa katalla;

³⁷ Ġatun bountoa maboġun kukulla wunál la éty-warra yantikalai tabiruġ, waita uwa korien bountoa hieron kabiruġ, wonto ba ġurrullielia Eloinuġ bon purreáġ ka ġatun tokoi ta ta-korien.

³⁸ Ġatun bountoa uwollielia tanoa-kal-bo, wiyapaiyéan bon Yehóanuġ, ġatun wiyellielia yantin barun ġikouġ kin barun, nakillikan ġupaiyiko Hierothalem kako.

³⁹ Ġatun upá bara ba unni tara yanti wiyatoara Yehóa koba, willuġbo ġaiya bara kakulla Galilaia kako, barun ka tako kóti kako Nadharet tako.

⁴⁰ Ġatun wonnai poaikulléun ġuraki noa maraikán kátan; ġatun pitálmatoara bon Eloí koba.

⁴¹ Waita uwa bula ġikoumba tunkan ġatun biyuġbai Hierothalem kolaġ yanti-katai wunál la takilligél lako kaiwitoara wokka koa.

⁴² Ġatun noa ba wunál la dodeka ka, waita ġaiya uwa bara Hierothalem kolaġ wirikai ko takilli ko.

⁴³ Ġatun kirun kakulla purreáġ, willuġbo bara ba, wonnai Iéthu noa minka willuġ ka Hierothalem ka; ġatun noa Yothepto ġatun tunkanto ġurra korien bula.

⁴⁴ Wonto bara ba punta bon barun kin konara, uwa purreáġ ka wakál la; ġatun bara bon tiwa kóti ta ka.

⁴⁵ Ġatun bara na korien bon ba, willuġbo ġaiya bara katéakún Hierothalem kolaġ tiwolliko bon.

⁴⁶ Ġatun purreáġ ka ġoro kulla, nakulla ġaiya bara bon murrug ka hieron ka, yellowollielia willi ka barun kin didathkaloi ka, ġurrullielia barun wiyellielia barun wiyellikanne pulli.

⁴⁷ Ġatun yantinto bara bon ba, ġurra, kotellielia bara bon ġuraki ġatun wiyatoara ġikoumba.

⁴⁸ Ġatun nakulla bara bon ba, unma ġaiya barun; ġatun tunkanto ġikoumba-ko wiya bon, Nai, minariġ tin bi kakulla ġearun kai? a! biyuġ ta uwa bali, tiwollielia bali bin, minki-kan-to.

⁴⁹ Ġatun noa wiya barun, Minariġ tin nura tia tiwollielia? keawai nura ba ġurran-upa-uwil koa baġ pintunúmba-kan wiya noa tia ba?

⁵⁰ Ġatun bara ġurra korien unnoa wiyelli ta wiya noa ba barun,

⁵¹ Ġatun noa uwa barun katoa barán Nadharet tako, ġatun ġurrullikan noa kakulla barun kin: wonto bountoa ba tunkan to ġikoumba miromá unni tara wiyellikanne murrug ka búlbúl la bounnoun kin.

⁵² Ġatun noa Iéthuko poaikulléun ġuraki kakilliko, ġatun kauwál kakilliko, ġatun pitálmulliko bon Eloito ġatun kúriko.

3

¹ Yakita kakulla wunál la pipátin ta piriwál koba Tiberio Kaithar koba, kobána noa Pontio Pilato Iudaia ka, ġatun tetrák noa Herod Galilaia ka, ġatun ġikoumba kóti Pilip tetrák noa Ituréa ka, ġatun yantin tako Trakoniti ka, ġatun Luthanio tetrák noa Abiléné ka,

² Annath ġatun Kaiapath hierou piriwál bula kakulla, wiyellianne Eloí koba uwa Ioanne kinko bon, yinal Dhakaria koba, koruġ kaba.

³ Ġatun noa uwa yantin toa purrai toa Iorádan toa, wiyellielia korimulliko kanumaiko, warekulliko yarakai;

⁴ Yanti wupaitoara biblion ka wiyellikanne Ethaia koba propet koba, ġiakai, Pulli wakál koba wiyelléun koruġ kaba, Yapuġ Yehóa koba murrárag umulla nura, tuloa kakillikoyapuġ ġikoumba.

⁵ Yantin ta pilabai warapal upinún, ġatun yantin ta bulkára umánún puntig; ġatun warin-warin ta umánún tuloa, ġatun yapuġ yarakai wolluġbiara umánún poitoġ;

⁶ Ġatun yantinto nanún wal ġolomullikanne Eloí koba.

⁷ Wiya ġaiya noa barun konara uwa bara korimulliko ġikouġ kinko, Ela béara! konara maiya kiloa nura! ġanto nurun wiya murralliko bukka tin tanan ba uwánún?

⁸ Koito nura ba umullia murrárag minki kabiruġ; ġatun kota yikora nura kóti ka minki ka nurun kin wiyelliko, Abáram ġearun noa ġearúnba biyuġbai; kulla baġ wiyan nurun, Eloí noa kaiyukan kátan umulliko unti tara biruġ tunúġ kabiruġ wonnai kakilliko Abáram kinko.

⁹ Ġatun yakita baibai wúnkulla kúlai ta wirrá ka; koito ba yantin kúlai keawai kátan murrárag kólbúntillánún wal barán, warekulliko koiyuġ kako.

¹⁰ Ġatun kúriko bon wiya, wiyellielia, Minnuġ banún ġaiya géen?

¹¹ Wiya noa barun, wiyelliela, Niuwoa kót-kan buloarakan gikoúmba, gumunbilla bon keawai ko; gátun niuwoa kuntokan gumúnbilla bon yanti kiloa.

¹² Uwá gáiya bara telóné korimulliko, gátun wiya bon, Piriwál, minnuğ banún géen?

¹³ Gátun noa wiya barun, Manki yikora untoa-kál unnoabo mara wiyatoara nurúnba.

¹⁴ Gátun bara army-kanko wiya bon wiyelliela, Minnuğ banún géen? gátun noa wiya barun, Bukkamai yikora yantin kúri, gátun wiyéa-yemmai yikora gákyoyellaikan yantin kúri; gátun murrar kauwa nura galoakan gutoarakan nurúnba.

¹⁵ Gátun bara ba kúri kotelliela, gátun yantinto kúriko kotelliela murrug ka ba ko, búlbúl la ba ko barun kin ba ko gikoug Ioannenuğ, minariğ noa Kritht ta, mirka keawaran.

¹⁶ Ioanneto noa wiya barun yantin ta, wiyelliela, Korimulliko bağ kátan nurun bato ko; wonto ba wakál kaiyukan kauwál-kau wálkan gátoa kiloa uwánun, murrarag korien bağ porugbuggulliko túgganug ko gikoúmba ko; niuwoa ta korimanun nurun Marai to yirri-yirri ko gátun koiyug ko:

¹⁷ Pituon gikoúmba mankillin máttára ba, gátun murkun noa umánun bünkilligél laba gikoúmba, gátun noa ka-umánun wiet gikoúmba tako kokerá ko; wonto ba tirri koiyug-banun wal noa koiyug ka talokulli korien ta.

¹⁸ Tarai ta yantin kauwál-kauwál wiya noa: gátun wiyelli ta ba ko barun kúri.

¹⁹ Wonto noa ba Herodnuğ tetráknug piralma bon, noa boun noun kin Herodia kin nukug ka Pilip-úmba gikoúmba kóti koba, gátun yantin yarakai noa ba uma Herodto,

²⁰ Yanti unni uma, wirriğbakulla bon noa Ioannenuğ jail ka.

²¹ Yakita barunbo karima yantin kúri, kakulla gáiya korimullielia bon Iéthunuğ, gátun wiyelliela, moroko gáiya waruğkalléun,

²² Gátun uwa barán Maraikan yirri-yirrikan murrin kiloa purrouğkan kiloa, gikoug kin; gátun wakál pulli kakulla moroko tin, wiyelliela, Gintoa ta emmoúmba yinal pitálmullikanne; pitáلمان bağğirouğ.

²³ Gátun niuwoa bo Iéthu kakilliliela wunal la triakonta ka giko-úmba, puntelliela bon yinal Yothepúmba, wonto yinal Eli-úmba;.....

²⁴ Wonto yinal Enoth-úmba, wonto yinal Thet-úmba, wonto yinal Adam-úmba, wonto yinal Eloi-úmba.

4

¹ GÁTUN noa Iéthu warapáľkan Maraikan yirri-yirri-kan, willuğbo kakulla Iorádan tabirug, gátun bon yatéa Maraito koruğ kolağ,

² Nupitoara bon purreag ka tettarakonta ka diabollo. Gátun unta tara purreag ka keawai noa ta ba: gátun goloin ba unta tara kakulla, kapirri gáiya noa kakulla.

³ Gátun noa diabollo wiya bon, Wiya, bi ba yinal Eloi koba, wiyellia unni tunuğ ka-uwil koa kunto.

⁴ Gátun noa Iéthuko bon wiya, wiyelliela, Wupatoara ta, Keawai kúri kánun moron kunto kabirug, wonto ba Eloi koba pulli tabirug.

⁵ Gátun noa diabollo yutéa bon waita bulkará ko, nanunbéa bon yantin piriwál koba purrai ta ba tanoa-kál-bo kurrakai.

⁶ Gátun noa diabollo wiya bon, yantin kaiyu kako gunun bag girouğ, gátun pitálmulliko gali tara ko; koito ba gúkulla tia emmouğ; gátun bag gútan ganúmbo pitál bag ba kátan.

⁷ Gintoa ba wiyánun tia, kánun bin yantin giroúmba.

⁸ Gátun noa Iéthuko wiya bon, Kauwa bi, Thátan, willuğ ka emmouğ kin; koito ba wupatoara, Wiyánun wal bi Yehóanuğ giroúmba Eloinuğ, gátun gikoug bo gurránun wal bi.

⁹ Gátun noa bon yutéa Hierothalem kolağ, gátun wúnkulla bo búlwarra ka hieron ka, gátun wiya bon, Yinalla bi ba unni Eloikoba, warekulla bi unti biruğ barán:

¹⁰ Kulla ba wupatoara ta, Wiyánun noa barun ağelo ko nakilliko girouğ, golomulliko girouğ;

¹¹ Gátun bara bin manun máttárró wokka lag, tinna koa girouğ pultéa-kun tunuğ ko yantin ta.

¹² Gátun Iéthuko, wiyelliela, wiya bon, Wiyatoara ta, Yanoa wal bi numa yikora bon Yehóanuğ Eloinuğ giroúmba.

¹³ Gátun noa diabollo goloin kakulla unni tara nupatoara, waita gáiya noa uwa gikoug kinbiruğ yakita ko.

14 Ġatun noa Iéthuko willuġ ko kakulla, kaiyukan Maraikan, Galilaia kako: ġatun totóġ bon kakulla yantin ta purrai kariġ ka.

15 Ġatun noa wiyelliela thunagóġ ka barun ka ta, pitál wiyatoara bon yantinto.

16 Ġatun noa uwa Nadharet tako, kakulla noa poaikulléun unta; ġatun, yanti katai noa ba, uwa noa thunagóġ kako purreáġ ka thabbat, ġatun ġarokéa wokka laġ wiyelliko.

17 Ġatun ġukulla bon biblion ta propet koba Ethaia koba: ġatun buġbuġġa noa ba biblion, nakulla ġaiya noa ġiakai upatoara,

18 Marai ta unni Yehóa koba emmouġ kinba, kulla noa tia putia wiyelliko Euagelion barun kin mirrál la; yuka noa tia turon umulliko minkikan ko, wiyelliko barun wúntoara ko wamunbilliko, ġatun na-uwil koa bara munmin to, buruġ buġgulliko barun búntoara,

19 Wiyelliko * * * ġurrabunbilliko wunál la pitálmullikanne Yehóa koba.

20 Ġatun noa wirriġ-buġġa biblion, ġatun noaġutéa kan bon umullikan ko, ġatun yellawa barán. Ġatun bara bon pimilliela ġaikug ko, yantin thunagóġ ka ba ko.

21 Ġatun noa barun tanoa bo wiya, Turin-pai-béa unni wiya upatoara nurun kin ġurruéġ ka unti purreáġ ka.

22 Ġatun yantinto bara ġurrullielia bon, ġatun kota bara pulli murrari kurraka kabiruġ ġikouġ kinbiruġ. Ġatun bara wiya, Wiya, unni ta Yotheputimba yinal?

23 Ġatun noa barun wiya, Nura ta wiyánun tia unni wiyellikanne, Karákal, turon bi umulla ġintoa bo; ġurra ġéen ba umatoara Kapernaum ka, umulla bi unti yantin ta purrai ta ġiroúmba ka.

24 Ġatun noa wiya, Tuloa nurun bag wiyen, keawai propet ġurra korien ġikouġ ka ta purrai ta kóti ka

25 Wonto baġ ba nurun wiyen tuloa, kauwál-kauwál ta mabogun Ithárael kulléun purreáġ ka Elia-úmba ka, yakita wirriġbakulla moroko ta wunál ta ġoro ġatun yellenna hek ta, tara-wará kakulla yantin ta purrai kariġ ka;

26 Keawai Elianuġ yuka ba barun kinko, wonto ba Tbarepta kako Thidoni kako nukuġ kako mabogun tako.

27 Ġatun kauwáhkauwákan leprokan Ithárael ka, yaki-kálai Eliéu koba propet koba; keawaran wakál barun kinbiruġ turon umatoara, wonto ba noa Naaman Thuriakál.

28 Ġatun yantin bara kakulla thunagóġ ka, ġurra bara unni tara, bukka kauwál kakulla

29 Ġatun bouġkulleún, ġatun yipa bon kokerá biruġ, ġatun bon yutéa pita kako bulkára ko kokerá ko wittitoara ko, wareka uwil koa bara bon walluġgón barán.

30 Wonto noa ba uwolliela Willi koa barun katoa, waita uwa.

31 Ġatun noa uwa barán Kapernaum kako, kokerá ko Galilaia kako, ġatun wiyelliela barun purreáġ ka thabbat ka.

32 Ġatun bara kota wiyellikanne tin ġikoúmba tin; kulla ġikoúmba pulli kaiyukan.

33 Ġatun kakulla wakál kúri thunagóġ ka, ġikouġ kin minki ka marai kakulla diabol koba yarakai koba, ġatun noa kaipulléun wokka,

34 Wiyelliela, Kámunbilla ġearun; minnuġ banún ġéen bin ġintoa Iéthu Nadharetkál? uwa bí ġearun tetti-umulli kolaġ? ġimillin banuġ ġintoa ta; wakál bo ta yirri-yirri-kan Eloi koba.

35 Ġatun bon Iéthuko koakulla, wiyelliela, Kaiyellia bi, ġatun paikulléa ġikouġ kinbiruġ. Ġatun bon ba wareka willi ka diabollo, paikulléun noa ġikouġ kinbiruġ, ġatun keawai bon tetti búntima ba.

36 Ġatun bara yantinto kota, ġatun wiyelliela barabo-barabo, Minariġ unni wiyellikanne! kulla noa wiya kaiyu-kan-to barun diabolnuġ yarakaikan, ġatun barun paikulléun warrari tako.

37 Ġatun totóġ ġikoúmba kakulla yantin toa purrai kariġ koa.

38 Ġatun noa uwa thunagóġ kabiruġ, ġatun polóġkulléun Thimon kinko kokerá ko. Ġatun tunkán Thimonúmba nukuġ koba munni kakulla karinkan; ġatun bon bara wiya bounnoun kai kolaġ.

39 Ġatun noa ġarokéa bounnoun kin turrug ka, ġatun noa koakulla karin; ġatun wareka ġaiya bounnoun karinto; ġatun bountoa bouġkulléun tanoa-kál-bo, ġatun umulliela barun kaiko.

40 Ġatun punnál ba pulóġ-kulliléun, yantin bara mankulla munni-munni-kan ġikouġ kinko; ġatun noa wunpilléun barun kin máttara yantin ta, ġatun turon uma barun.

⁴¹ Ġatun diabol kauwál-kauwál paikulléun kauwál-kauwal labiruġ, kaibullliela, ġintoa ta Kriht ta, yinal ta Eloi-koba. Ġatun noa barun koakulla wiya korien; kulla wal bara ġimilléun bon Kriht ta noa unnoa.

⁴² Ġatun purreáġ ba kakulla, waita noa uwa korariġ; ġatun bara kúriko tiwa bon, ġatun uwa ġikouġ kin, ġatun mima bara bon, keawai noa waita wapa barun kinbiruġ.

⁴³ Ġatun noa wiya barun, Wiyánún bo ta wal bag piriwálġél la Eloi koba taraikan ta kokerá; kulla wal tia ġaliko yuka.

5

¹ ĠATUN yakita kakulla, warapa bon ba bara kuriko, ġurrulliko wiyellikanne Eloi koba, ġarokéa noa pitta ka waraka Gennetharet ta,

² Ġatun nakulla buloara murrinawai kakilliela wara ka; wonto ba bara makoroban waita uwa murrinawai tabiruġ, ġatun bara umullliela pika mirkun.

³ Ġatun noa uwa wakál la murrinawai ta Thimon koba ka, ġatun wiya bon yógyóg umullia purrai tabiruġ. Ġatun noa yellawa barán, ġatun wiyelliela barun kúri murrinawai kabiruġ.

⁴ Ġatun goloin noa ba wiya, wiya noa Thimónnuġ bon, Tuirkullia pirriko kako, ġatun wura pika nurúnba mankilliko.

⁵ Ġatun Thimónto, wiyelliela, wiya bon, Piriwál, uma géen tokoi ta yanti-katai, ġatun man korien; kulla bi wiyán wupinún wal baġ barán pika.

⁶ Ġatun uma bara ba unni, kokoi-kokoi bara uma makoro katai kal, ġatun pika kilpaiya.

⁷ Ġatun bara wokkaimulléun barúnba tarai taba murrinawai taba; wa-uwil koa barun wintamulliko. Ġatun bara uwa, ġatun warapál bara wupéa buloara murrinawai, pillukullliela ġaiya bara.

⁸ Nakulla noa ba Thimónto Peterko, puntimulléan noa Iéthu kin warómbuġ ka, wiyelliela, Ela Piriwál! yuriġ bi wolla emmouġ kinbiruġ; kulla baġ yarakairán kúri kátan.

⁹ Kulla noa kota, ġatun yantin bara ġikouġ katoa ba, kauwállin makorrin mankulla bara ba.

¹⁰ Ġatun yantibo bara Yakobo ġatun Ioanne, yinal ta Lebedaio koba, mankillai bula ba Thimon katoa. Ġatun Iéthako noa wiya bon Thimónnuġ, Kinta kora bi; yakita biruġ manún wal bi barun kúri.

¹¹ Ġatun mankulla bara ba murrinawai barán purrai tako, wúnkulla bara yantin, wirroba bon bara.

¹² Ġatun yakita kakulla, kakulla noa ba tarai ta kokerá, a! wakál kúri kauwál leprokan; nakilliela noa Iéthunuġ puntimulléun ġoarrá ko, ġatun wiya bon, wiyelliela, Piriwál, wiya, bi ba kalyukan kánún, umánún bi tia turon.

¹³ Ġatun noa bon wupilléun máttara ġikouġ kin, wiyelliela, Kauwá; turon bi kauwa. Ġatun tanoa-kál-bo leprota wareka ġikouġ kinbiruġ ko.

¹⁴ Ġatun noa bon wiya, wiyéakún koa noa barun kúri; wonto ba yiruġ uwa tūgunbilliko ġintoa bo hiereu kinko, ġatun ġuwa kulla bi turon umatoara, yanti to Mothé ka noa ba wiya, ġurrulliko kakilliko barun.

¹⁵ Wonta ba yantin kakulla totóg ġikouġ yantin toa purrai toa: ġatun kauwálko naro uwa ġurrulliko, ġatun turon kakilliko barun munni-munni ġikouġ kinbiruġ ko.

¹⁶ Ġatun noa uwa koruġ kako, ġatun wiyelliela.

¹⁷ Yakita kakulla tarai ta purreáġ ka, wiyelliela noa ba, yellawa ba Parithaioi ġatun didathkaloi wiyellikanne koba, yantin tabiruġ kokerá biruġ Galilaia kabiruġ, ġatun Iudaia kabiruġ, ġatun Hierothalem kabiruġ; ġatun kaiynto Yehóa-úmbe kakulla turon umulliko barun.

¹⁸ A! ġatun bara kúri wakál kúri kurréa pirrikilligél la munnikan karál; ġatun numa bara bon kurrilliko kokerá kolaġ, ġatun wúnkilliko bon ġikouġ kinko mikan tako.

¹⁹ Ġatun keawai bara napa wonnén kurrilliko murrúġ kolaġ konara tin, uwa bara wokka laġ kokerá búlwarra ka, ġatun wupéa bon barán kulla koa willi-willi kako pirrikilligélkan Iéthu kin mikan ta.

²⁰ Ġatun nakulla noa ba kotellikanne barúnba, wiya noa bon, Ela kúri, yarakai ġiroúmbe wareka ġirouġ kinbiruġ.

²¹ Ġatun bara ġárammateu ġatun Parithaioi kota, wiyelliela, Ġan-ke unni wiyán ba yarakai? Ganto kaiyu-kan-to warekulliko yarakai, wonto ba wakállo Eloito?

²² Wonto noa ba Iéthuko gurra kotatoara barúnba, niuwoa wiya wiyelliela barun, Minariğ tin nura kotelliela búlbúl lako nurun kin ba ko.

²³ Wonnén murraráğ wiyelliko,ğiroúmba ko yarakaito wareka ġirouğ kinbiruğ; ġa wiyelliko, Bouğkullia ġatun uwolliko?

²⁴ Wonto ba ġurra-uwil koa nura kaiyukan noa yinal kúri koba purrai taba yarakai warekulliko (wiya noa munni karál), Wiyan banuğ, bouğkullia ġatun mara ġiroúmba pirrikilligél, ġatun waita unwolla ġirouğ ka tako kokerá ko.

²⁵ Ġatun tanoa-kál-bo bouğulléun noa barun kin mikan ta, ġatun mánkulla unnuğ ġikoúmba pirrikéa noa ba, ġatun waita uwa ġikouğ ka tako kokerá ko koti kako, pitálmullielia bon Eloinuğ.

²⁶ Ġatun yantin bara kotelliela, ġatun bara ġaiya pitálma bon Eloinuğ, ġatun kinta lağ bara kauwál, kátan wiyelliela, Nakulla géen minariğ konéin buğgai.

²⁷ Ġatun yakita yukita waita uwa noa, ġatun nakulla wakál telónenuğ, ġiakai yitirra Lebí, yellawollin wúnkilligél la; ġatun noa wiya bon, Yettiwolla tia.

²⁸ Ġatun noa wúnkulla yanti bo bouğkulléun, ġatun noa bon yettiwa.

²⁹ Ġatun Lebiko bon noa upéa kauwál takillikanne ġikouğ ka ta koti ka kokerá: ġatun kauwál kakulla konara telónai ko ġatun tarai to yellawa barun katoa

³⁰ Wonto ba barúnba ġárammateu ġatun Parithaioi koakillan bara barun wirrobullikan ġikoúmba, wiyelliela, Minariğ tin nura tatan ġatun pittan barun katoa telónai koa ġatun yarakai toa?

³¹ Ġatun noa Iéthuko wiya barun, wiyelliela, Bara ba moron tai kátan keawai bara wiyan karakál; wonto ba bara munni kátan.

³² Uwa bag wiya korien ko murróğ taiko, wonto ba yarakai willuğ ko minki kakilliko.

³³ Ġatun wiya bon bara, Minariğ tin bara mupai kátan murrinmurrin wirrobullikan Ioanne-úmba, ġatun wiyan wiyellikanne, ġatun yantibo bara Parithaioi koba; wonto ba ġiroúmba ko tatan ġatun pittan?

³⁴ Ġatun noa wiya barun, Wiya, nura kaiyukan mupai umulliko barun wonnai kakillaikanne, yakita-kálai poribai ba kátan barun katoa ba?

³⁵ Wonto ba purreáğ kánun wal, mánun wal bon ba poribai barun kinbiruğ, ġatun yakita ġaiya bara mupai-kakillinún purreáğ ka unta tara.

³⁶ Ġatun wiya noa barun wakál parabol ġiakai: Keawai kúri ko wupillinún buğgaikál korokál la; ġa ba, yanti buğgaikál yirbuğganún ġaiya wal, ġatun pontol buğgaikál labiruğ keawai korokál kiloa kátan.

³⁷ Ġatun keawai kúri ko wupinún buğgaikál wain pika ka korokál la; kulla buğgaikállo potopai-yanún wal pika ka, ġatun kiroabullinún, ġatun pika kánun yarakai.

³⁸ Wonto ba buğgaikál wain wunún wal buğgaikál la pika ka; ġatun buloara murraráğ kátan.

³⁹ Ġatun keawai kúri koba pittánun korokál wain keawai noa mánun buğgaikál wain, kulla noa wiyan korokál ta murraráğ.

6

¹ ĠATUN yakita thabbat ka buloara, yukita thabbat ka kurri-kurri, uwa ġaiya noa murrúğ koa yeaiğél loa; ġatun bara wirrobulli-kan-to ġikouğ ka to tittia wolluğ yeai, ġatun takulla mirro-mirromá máttára barun kin.

² Ġatun taraikanto Parithaioi koba wiya barun, Minariğ tin nura uman unnoa keawaran murraráğ umulliko unti tara purreáğ ka thabbat ka?

³ Ġatun noa Iéthoko wiya, wiyelliela, Wiya nura, wiya nura, wiya ba unni, Dabid-to noa ba upa, niuwoabo ba kapirri kakilla ġatun bara ġikouğ katoa;

⁴ Uwa noa ba kokerá kai Eloi koba, ġatun mankulla takulla nulai nakillikanne, ġatun ġukulla barun ġikouğ katoa ba ko, keawaran murraráğ takilliko, wonto ba barúnba ko hieuru koba?

⁵ Ġatun noa barun wiya, Yinal ta kúri koba, piriwál noa kátan yantin ko thabbat ko.

⁶ Ġatun yakita kakulla tarai ta thabbat ta, uwa ġaiya noa thunagóg ka ġatun wiyelliela: ġatun wakál kúri unta kakulla, máttára ġikoúmba túgkağkeri tirrai kakulla.

⁷ Ġatun bara ġárammateuko ġatun Parithaioiko tumiméa bon, wiya bon noa ba turon umulla purreáğ ka thabbat ta; wiyayemma-uwil koa bara bon.

⁸ Wonto noa ba kota barúnba ġurrullielia, wiya bon noa máttáranan tirraikan, Bouğkullia, ġatun ġarokilla Willi ka. Ġatun noa bouğkulléun, ġatun ġarokéa.

⁹ Wiya ǵaiya noa Iéthuko barun, Wiyánún wal bag nurun unni; wiya tuloa ta umulliko, murrárág ǵa yarakai umulliko purreág, ka thabbat ta? moron umulliko, ǵa warekulliko?

¹⁰ Ǵatun nakilliela kari-kari yantin barun, wiya bon noa, Tutullia bi máttára ǵiróúm̄ba. Gatun upulléun ǵaiya noa, ǵatun máttára ǵaiya bon turon uma yanti tarai ba.

¹¹ Ǵatun bara warapalkan bukkakan kakulla; ǵatun murrárág wiyellan barabo-barabo, minnuǵ banún bara bon ba Iéthunuǵ.

¹² Yakita unta purreág ka, uwa noa bulkára kolaǵ wiyelliko, yanti-katai noa tokoi ta wiyelliela bon Eloi-nuǵ.

¹³ Ǵatun yakita purreág ta, kaai ba noa barun wirrobullikan ǵikoúm̄ba; ǵirimulléun noa barun kinbiruǵ dodeka niuwoa, barun wiya ǵiakai yitirra apothol;

¹⁴ Thimónnuǵ (wiya noa ǵiakai yitirra Peternuǵ), ǵatun ǵikoúm̄ba kurrakóǵ Andrea, ǵatun Yakobo ǵatun Ioanne, ǵatun Pilip ǵatun Bátolomai,

¹⁵ Mattaio ǵatun Thoma, ǵatun Yakobo Alpai-úm̄ba, ǵatun Thimon ǵiakai wiya yitirra Dheloté,

¹⁶ Ǵatun Iudath kurrakóǵ ta Yakobo-úm̄ba, ǵatun Iudath Ithákariot, ninwoa ǵakoiyayé noa.

¹⁷ Ǵatun noa uwa barán barun katoa, ǵatun ǵarawan tako ǵarokéa noa, ǵatun konaró wirrobullikan ǵikoúm̄ba, ǵatun kauwál konara kúri Iudaiakál, ǵatun Hierothalemkál, ǵatun korowátari Turokál ǵatun Thidonikál, uwa bara ǵurrulliko bon, ǵatun turon umulliko barun ba munni;

¹⁸ Ǵatun bara wonkálman yarakai to marai to: ǵatun barun umá turon.

¹⁹ Ǵatun yantinto konaró numulla bon bara; kulla murrárág paibéa ǵikouǵ kinbiruǵ, ǵatun noa turon umá yantin barun.

²⁰ Gatun noa wokkalan nakulla ǵaikúǵ ko ǵikoúm̄ba wirrobullikan, ǵatun wiya, Murrárág umatoara mirrálko; kulla nurun ba piriwálǵél la Eloi koba.

²¹ Murrárág umatoara nura kapirrikan yakita: kulla nura warapan wal kakilliko. Murrárág umatoara nura túnkillin yakita, kulla nura kintellinún wal.

²² Murrárág umatoara nura, yarakai umánún ǵaiya nurun kúri ko, ǵatun warekanún nurun, ǵatun yarakai wiyánún nurun, ǵatun warekanún yitirra nurúnba yanti yarakai ba, ǵikouǵ kin biruǵ yinal kúri koba kabiruǵ.

²³ Pitál nura kauwa ǵatun úntellia unta purreág ka; kulla nurúnba ǵukillikanne kauwál kátan moroko kaba; yanti umá bara biyuǵbai tako barun ka to barun propetnuǵ.

²⁴ Yapal nura porólkán kátan! kulla nura mankulla ta pitál nurúnba.

²⁵ Yapál nura warakan! kulla nura kapirrikánún. Yapal nura kintellan yakita! kulla nura ǵirellinun ǵatun túnkillinún.

²⁶ Yapal nura, murrárág wiyánún ba yantinto kuriko nurun! yantibo barúnba biyuǵbai ta ko barun ǵakoyaye propetnuǵ.

²⁷ Ǵiakai baǵ wiyán nurun ǵurrullikan, Pitálumulla barun yarakai willuǵ nurúnba; murrárág umulla barun yarakai nurúnba uman,

²⁸ Murrárág barun wiyella koatan nurúnba; ǵatun wiyella bon Eloinuǵ wiyella barun yarakai nurúnba uman.

²⁹ Ǵatun búnnún ba wakál ǵan kulló tarai to, tarai ǵukillia; ǵatun niuwoa manún wurabil ǵiróúm̄ba, wiya yikora wiwi manki yikora unni doan.

³⁰ Ǵuwa barun yantin ko wiyellinún ba ǵirouǵ kin; ǵatun niuwoa ba mankulla tullokán ǵiróúm̄ba wiya yikora kari bon.

³¹ Ǵatun unnoa la kotan nura la murrárág umulliko barun kúri nurun, umulla nura yantibo ta barun.

³² Kulla nura pitálman barun pitálman nurun, minariǵko-ke unnoa? kulla bara yarakai-kan-to yantibo uman.

³³ Ǵatun murrárág nura umánún ba barun ǵali murrárág nurun uman, minariǵko-ke unnoa? kulla bara yarakai-kan-to yantibo uman.

³⁴ Ǵatun mumbinún nura ba barun kotan nura willuǵbo upilliko barun, minariǵko-ke unnoa? kulla bara yarakai willuǵ mumbillan barun willuǵbo upilliko yantibo.

³⁵ Wonto ba nura pitálumulla barun yarakai willuǵ nurúnba; ǵatun murrárág umulla, ǵatun mumbilla kotan keawai willuǵbo upulliko; ǵatun ǵutoara kauwál kánún nurúnba, ǵatun nura wonnai kánún wokka koba; kulla noa murrárág uman barun wiyapaiye korien ǵatun barun yarakai.

³⁶ Kauwa nura minkikan, yantibo Biyuǵbai nurúnba minki kátan.

³⁷ Kota yikora yarakai, gaton keawai nurun kotánun yarakai: pirriralmai yikora nura, gaton keawai nurun pirriralmanún: warekilla nura, gaton nurúnba warekánun.

³⁸ Ġuwa, gaton ġunún wal nurun; warapál, upulla barán, gaton tolomulla kaumulliko, gaton kiroabullin barán, ġunún wal kúri nurun ġielkaġ ka nurun kin. Kulla yantibo upitoara nura upullin, upéa kánun nurun.

³⁹ Ġaton noa wiya barun wakál parabol; wiya, munminto yutinún tarai munmin? wiya, wal bula-buloarabo warakullinún barán kirun tako?

⁴⁰ Wirrobullikan ta keawaran noa kauwál korien ġikouġ kin piriwál la; wonto ba tuloa kátan, kánun noa yanti piriwál ba ġikouġ ba.

⁴¹ Ġaton minariġ tin bi natan moriġ ġirouġ ka ta ba ġaikouġ kaba kurrikóġ kaba, wonto ba na korien bi tulkirri ġaikouġ kaba ġirouġ kinba kóti kaba?

⁴² Ga, yakoi bi wian korrikóġ ġirouġ ba, Biggai, yakoi tia poruġbuġgabunbilla moriġ ġirouġ kinba ġaikouġ kaba, keawai bi ba nakillin tulkirri ġirouġ kaba? ġintoa ġakoiyaye! buruġbuġ ġala kurri-kurri tulkirri ġaikouġ kaba ġirouġ kinba kóti kaba, gaton nanún ġaiya bi murra-murrarág umulliko moriġ ġaikouġ kaba kurrikóġ kaba ġirouġ ka ta ba.

⁴³ Kulla ba kúlai murrarág ta kátan, keawai yeai yarakai upin; ġa keawai kúlai yarakai ta kátan, yeai murrarág upin.

⁴⁴ Wonto ba yantin kúlai ġimilliko kóti tin yeai tin; kulla bara kúri mán korien kokuġ tulkirri-tulkirri tin, ġa titi korien bara botru maro tin.

⁴⁵ Murrarágko noa kúriko wupillin noa murrarág wunkilligél labiruġ minki kabiruġ búlbúl labiruġ ġikouġ kinbiruġ; gaton noa yarakai wupullin noa yarakai wunkilligél labiruġ yarakai ta biruġ minki kabiruġ búlbúl labiruġ ġikouġ kinbiruġ; kulla ġikoumba ko kurraka ko wian kauwál labiruġ ko búlbúl labiruġ ko.

⁴⁶ Ġaton minariġ tin nura tia wian, Piriwál, Piriwál, gaton uwa korien nura unnoa tara wian nurun baġ ba.

⁴⁷ Ġan tia ba uwánun emmouġ kin, gaton ġurran wiyellita emmoumba, gaton ġalao uman, tuġunbinún baġ nurun ġan kiloa noa:

⁴⁸ Niuwoa ba wakál yanti kúri kiloa, wittia noa kokerá gaton pinnia pirriko, gaton wupéa tuġga tunuġ ka; gaton poaikulléun ba tunta-tunta, waiumbul murrá koribibi kokeroa, gaton ġeawai tolomá pa; kulla wal wittia tunuġ ka.

⁴⁹ Wonto ba ġurran gaton uma korien, kúri kiloa noa wittia kokera tuġga korien purrai ta: waiumbul murrá koribibi ġali, gaton warakulléun tanoa-kál-bo; kauwála unnoa warakullin kokerá koba.

7

¹ WIYA noa ba ġoloin ġikoumba wiyellikanne, mikan ta yantin ta kúri ka, uwá noa Kapernaun kako.

² Ġaton tarai koba kapátin koba umullikan munni kakilliela muluġkilliliela tetti, pitál umatoara noa ġikoumba.

³ Ġaton, ġurrá noa ba Iéthunúġ, wiyabunbéa noa barun ġarokál Hebáraioi koba, wiyelliela bon uwa-uwil koa noa pirbuġgulliko ġikoumba ko, umullikan ko.

⁴ Ġaton uwá bara ba Iéthu kin, wiya ġaiya bon bara tanoa-kálbo wiyelliela, Murrarág noa uma-uwil koa noa bon yanti:

⁵ Kulla noa pitálman ġearúnba kúri, gaton noa wittia ġearun thunagóġ.

⁶ Uwa ġaiya noa Iéthu barun katoa. Ġaton kaloġ korien ta noa ba kakulla kokerá kolag, yuka noa barun kapátinto kóti ta ġikouġ kin wiyelliela bon, Piriwál, yanoa bi; kulla baġ keawaran murrarág korien uwa-uwil koa bi emmouġ kin kokerá:

⁷ Yaki tin baġ kota murrarág korien baġ uwolliko ġirouġ kinko; wonto ba wiyella wakál wiyellikanne, gaton emmoumba umullikan pirkullinún wal.

⁸ Kulla baġ ba kaiyukan wiyelliko, emmouġ kinba bara kakillin army-kan; gaton baġ wiya wakál, Yuriġ, gaton waita ġaiya noa uwa; gaton tarai, Kaai, gaton noa uwa tanan; gaton emmoumba umullikan, Umulla unni, gaton umá ġaiya noa.

⁹ Iéthuko noa ba ġurrá unni tara, kotelliela noa ġikouġ, gaton warrakulléun noa, wiya ġaiya noa barun wirroba bon ba, Wian baġ nurun, keawaran baġ na pa yanti ġurrullikanne kauwál, keawai yanti Ithárael la kátan.

¹⁰ Ġaton bara yukatoara, willuġbo uwollieela kokerá kolag, nakulla bon umullikan munni biruġ pirbuġgatoara.

¹¹ Ġaton yakita purréaġ ka yukita, uwa noa kokeroa, ġiakai yitirra Nain; gaton kauwál uwa ġikoumba wirrobullikan gaton taraikan kúri ġikouġ katoa.

¹² Ġatun uwa noa ba papai puloġkulligél la kokerá kolaġ, ġa, tetti kulwon kurrilliela kúri warai kolaġ, wakál bo ta yinal tunkán koba bounnoun ba, ġatun maboġun bountoa, ġatun kauwál-kauwál kúri kokerá biruġ uwa bounnoun katoa.

¹³ Ġatun nakulla bounnoun noa ba Piriwálo, ġurriira bounnoun noa kakulla, ġatun wiya ġaiya noa bounnoun, Túġki yikora.

¹⁴ Ġatun uwa ġaiya noa, numa kurrilligél; ġatun bara kurriá bon ba ġakéa korun. Ġatun noa wiya, Wuġġurra, wiyan banuġ, Bouġkullia.

¹⁵ Ġatun niuwoa tetti kabiruġ yellawa, ġatun tanoa-kál-bo wiya. Ġatun willuġbo bon noa ġukulla bounnoun kin ġikoúmba ka tunkán ta.

¹⁶ Ġatun bara kakulla kinta yantin; ġatun bara bon pitálman Eloinuġ, wiyelliela, Kauwál propet ta paipéa ġearun kin, ġatun noa Eloito nakulla ġikoúmba kúri.

¹⁷ Ġatun unni totóġ ġikoúmba kakulla yantin to Iudaia koa, ġatun yantin toa purrai kariġ koa.

¹⁸ Ġatun Ioanne-úmba-ko wirrobullikanto wiya bon unni tara.

¹⁹ Ġatun noa Ioanneto wiya bulun wirrobullikan ġikoúmba, yuka bulun Iéthu kinko, wiyelliko, ġintoa ta uwánun? ġa, na-téa kánun ġéen taraikan?

²⁰ Uwa bara ba kúri ġikouġ kinko wiya bara, Ioanneto korimullikanto ġearun yuká ġirouġ kinko, wiyelliko, ġintoa ta uwánun? ġa, na-téa kánun taraikan?

²¹ Ġatun tanoa-kál-bo hora ka pirbuġġa noa kauwál-kauwál munni-munni, ġatun marai yarakaikan; ġatun kauwál-kauwál munmin umá noa barun nakilliko.

²² Wiya ġaiya noa barun Iéthu, wiyelliela, Waita lag nura, ġatun wiyella bon Ioannenuġ unni tara nakulla nura ba ġatun ġurra; munmin-tabiruġ-ko natan, wiirwiir-biruġ-ko uwan, wamun-wamun-tabiruġ turon kakulla, woġkál-labiruġ ġurran, tetti-kabiruġ bouġkulléun, barun mirrál ko wiyan ta Euagelion.

²³ Ġatun pitál-umatoara yantinto niuwara korien kánun emmouġ kin.

²⁴ Ġatun waita ka ba bara ba puntimai Ioanne-úmba, wiya ġaiya noa barun kúri Ioannenuġ bon, Minariġ tin nura koruġ kolaġ nakilliko? koġka toloman wibbi ko?

²⁵ Minariġ ko nura uwa koruġ kolaġ nakilliko? wakál upulléun kúri poitoġ korikin to? A! bara upulléun konéin to ġatun bara murráráġ kátan takilliko, yellawa bara piriwálgél la.

²⁶ Minariġ ko nura uwa koruġ kolaġ nakilliko? wakál propet Kauwa, wiyan nurun baġ kauwállan noa ba propet kilo.

²⁷ Ġali noa wiyatoara upa unni, A! yukan baġ puntimai emmoumba ġirouġ kin mikan ta, umánun wal noa yapuġ ġirouġ.

²⁸ Kulla baġ wiyan nurun, Keawai propet kauwál kátan yanti Ioanne noa ba korimullikan porkullitoara nukuġ labiruġ: niuwoa waréa ta kátan piriwálgél la Eloi koba ka, kauwál noa kátan ninwoa kilo.

²⁹ Ġatun yantinto kúriko ġurra bon, ġatun bara telónai, pitálma bon Eloi-nuġ, korimatoara kátan bara Ioanne kaibiruġ karimulli biruġ.

³⁰ Wonto ba bara Parithaioi ġatun bara nomikoi ġurramaigá wiyellikanne Eloi koba barun kin, keawai korimatoara korien Ioanne kai.

³¹ Ġatun noa Piriwálo wiya, Yakoi kilo bara kúri untikal willuġġél? ġatun minariġ kilo bara?

³² Bara yanti wonnai kilo yellawollin ġukilligél la, ġatun kaipullin taraikan, ġatun wiyellin, Tirkima ġéen nurun, ġatun keawai nura úntelli korien; minki ġéen kakulla nurun, ġatun keawai nura tuġkilli korien.

³³ Kulla noa Ioanne korimullikan uwa, keawai kunto ta pa, ġa wain keawai pitta pa; ġatun nura wiyan, diabol noa ġikouġ katoa ba.

³⁴ Yinal ta kúri koba uwa takilliko ġatun pittelliko, ġatun nura wiyan, A! mataye kúri unni, ġatun wain pittaye, kóti ta telónai koba ġatun yarakai willuġ koba!

³⁵ Wonto ba yautinto wonnaito ġuraki koba ko piralman bon ġuraki.

³⁶ Ġatun wakálo Parithaioi koba ko wiya bon ta-uwil koa noa ġikouġ katoa. Ġatun uwa noa kokerá Parithaio koba, ġatun yellawa noa barán takilliko.

³⁷ Ġatun, a! ġapal wakál yarakaikun bountoa ġurrá bountoa ba Téthunuġ bon yellawai takilli taba kokerá Parithaio koba ka, mankulla bountoa wúnkilligél alabathro putillikanne,

³⁸ Ġatun ġarokéa bountoa tinna ka bulka ka ġikoung kin, tuġkillin, ġatun bountoa puntia bounnoun ka to ġurrun to tinna ġikouúmba, ġatun pirripa bounnoun ka to kittuġ ko wolluġ koba ko bounnoun ka to, ġatun búġbúġka bon tinna ġikoúmba, ġatun putia bon putilligél lo.

³⁹ Yakita nakulla noa ba unni ġali Parithaio, wiya bon ba, wiyelléun ġaiya noa ninwoabo minki ka, wiyelliela, Unni kúri propet ba noa ġurra pa noa wonta-kan-to ka ġapallo numa bon; kulla bountoa yaraikan.

⁴⁰ Ġatun Iéthuko noa wiyayelléun, wiyelliela bon, Thimón, wiya-uwil koa banuġ. Ġatun noa wiya, Piriwál, wiyellia.

⁴¹ Tarai ta kakulla ġukillikan wakál buloara mumbitoara ġikoúmba; wakállo noa mumbilléun pentakothioi denari, ġatun tarai ta pentékonta mumbilléun.

⁴² Ġatun keawai bula ġupaiye pa ba yaruġ ka bon, wareká ġaiya noa bulun ba. Wonta kin bulun kinbiruġ pitálmanùn kauwál bon!

⁴³ Thimónto noa wiya, wiyelliela, Mirka ġikouġ wareka noa ba kauwál. Ġatun noa wiya bon, Kota bi tuloa.

⁴⁴ Ġatun noa warrakulléun ġapal ko, ġatun wiya Thimónnuġ Natan bi unni ġapal? uwa baġ kokerá ko ġirouġ ka ta ko, keawai bi tia ġupa bato tinna ko; wonto bountoa ba puntia tia tinna bounnoun ka to ġurrun to, ġatun watia bounnoun ka to wolluġ kabiruġ ko kittuġ ko.

⁴⁵ Keawai bi tia buġbúġ ka pa: wonto ba unni ġapal, buġbúġ-kullielia tia tinna yakita biruġ uwa baġ ba.

⁴⁶ Keawai bi puti pa emmoúmba wolluġ kipai to, wonto ba unni ġapal putia emmoúmba tinna kipai to.

⁴⁷ Ġiakai tin banuġ wiyán, Yarakai umatoara bounnoun ba kauwál ta warekatoara bounnoun ba; kulla bounnoun pitál-ma kauwál: kulla barúnba warekatoara waréa, pitál-ma bara warea.

⁴⁸ Ġatun noa bounnoun wiya, Wareká umatoara ġiroúmba yarakai.

⁴⁹ Ġatun bara yellawan ġikouġ kinba takilli taba, bara bo wiyatan minki ka, ġan-ke unni warekan noa yarakai.

⁵⁰ Ġatun noa bounnoun wiya, ġurrulli ta biruġ ġiroúmba moron bi kátan; yuruġ bi pitál kakilliko.

8

¹ ĠATUN yakita yukita uwa noa yantin toa purrai toa kokerá, wiyelliela ġatun túġunbilliela totóġ pitálmullikanne bathileia koba Eloi koba: ġatun bara dodeka ta ġikouġ katoa ba.

² Ġatun bara nukuġ taraikan, turon umatoara marai yarakai tabiruġ ġatun muni kabiruġ, Mari yitirra ġiakai Magdalakálin, bounnoun kinbiruġ paipéa diabol hepta ta,

³ Ġatun Ioanna porikunbai Kutha-úmba, Herod-úmba umullikan, ġatun Thuhanna, ġatun taraikan kauwál, gala bara ġukulla bon untakál tullokán ba biruġ barun kai.

⁴ Ġatun uwittillin bara ba kúri kauwál-kauwál, ġatun uwa ġikouġ kinko, yantin tabiruġ kokerá biruġ, wiya noa unni parabol:

⁵ Upillikan noa uwa yeai ko upulliko ġikoúmba ko; ġatun upullielia noa ba, winta porkulléun kaiyinkon ta yapuġ ka; ġatun waita-wa barán, ġatun tibbinto takulla moroko tinto.

⁶ Ġatun winta porkulléun tunuġ ka; ġatun poaikulléun ba wokka lag tetti ġaiya kakulla, koito ba bato korien ta.

⁷ Ġatun winta porkulléun tulkirri-tulkirrá; ġatun poaikulléun tulkirri-tulkirri matti, ġatun murruġkama.

⁸ Ġatun tarai ta pórkuelléun purrai murráráġ purrai ta, ġatun poaikulléuun wokka lag, ġatun yeai kurria hekaton ta. Ġatun noa ba wiya unni tara, kaaipulléun ġaiya noa, Niuwoa ba ġurréuġ kan kátan ġurrulliko ġurrunbunbilla bon.

⁹ Ġatun wirrobulli-kan-to ġikoúmba ko wiya bon, wiyelliela, Minariġ ke unni parabol?

¹⁰ Ġatun noa wiya, ġatan ġurrulliko nurun pirriral bathileia koba Eloi-úmba; wonto barun tarai ta parabol la; natan bara keawai bara na pa, ġatun ġurrán bara keawai bara ġimilli pa.

¹¹ Ġiakai ta unni parabol: Yeai ta wiyellikanne ta Eloi koba.

¹² Bara kaiyinkon taba yapuġ kaba ġurrullikan bara; uwa ġaiya noa diabol, ġatun mankulla wiyellikanne barun ba minki kabiruġ búlbúl labiruġ, ġurréa-kún koa bara ġatun moron koa bara katéa-kún.

¹³ Bara tunuġ kaba ġurra bara ba wiyellikanne pitálkan to; ġatun unni tara wirra korien kátan, kota bara waréa ba, ġatun yakita numullikanne ta waraka ġaiya bara.

¹⁴ Ġatun unnoa tara pórku lléun tulkirri-tulkirrá, bara ba ġurra, waita uwa ġaiya, ġatun murrugħanna umullikkannéto ġatun porollo ġatun pirunto moron koba, ġatun yeai kurri korien murraráġ kakilliko.

¹⁵ Wonto ba unnoa murraráġ kaba purrai taba, bara ba ġurra wiyellikanne, tuloakan ġatun murraráġkan búlbúłkan, tuman bara, ġatun yeai kurrin murroi to.

¹⁶ Keawai kúriko wirroġbanún kalbuġ, wutinún ġaiya tenti ko, ġa wutinún bara ka pinkilligħella; wonto ba wupinún kaibuġġel la, na-uwil koa bara uwollita ba ko kaibuġ.

¹⁷ Kulla yantin ta ġetti biruġ ġurranún wal kakilliko; ġatun yantin ta yuropatoara biruġ ġurranún wal kakilliko, ġatun paipinún wal.

¹⁸ Yakoai nura ġurrulla; kulla ġikouġ kinba ġunún wal ġikouġ kin; ġatun keawai noa ka korien, mantillinún wal bon ġikouġ kinbiruġ unnoa ta paipitoara ġikouġ kinba.

¹⁹ Ġatun tunkán ġikouġ kinko ġatun bara kóti ta ġikoumba uwa, ġatun keawai bara wa pa ġikouġ kinko konarrin, kulla kauwál waitawollan.

²⁰ Wintako bon wiya ġiakai, Garokillin bara warrai taba ġikoumba tunkán ġatun kóti ta, na-uwil koa bara ġirouġ.

²¹ Ġatun noa wiyayelléun barun, wiyelliela, Unni tara tia kátan emmoúmba tunkán ġatun kóti ta, ġurrullikan wiyellikanne Eloi koba ġatun umullikan.

²² Ġatun yakita tarai ta purreáġ ka, uwa noa murrinawwai ta ko ġikouġ katoa wirrobullikan toa ġikoumba; ġatun noa barun wiya, Waita ġéen waġa-uwil kaiyin kolaġ wara kolaġ. Ġatun bara tolka mureuġ kolaġ.

²³ Wonto ba bara uwollielia, pirrikéa noa kóġóġ; ġatun wibbi kauwál kakulla wara ka; ġatun bara warapál, ġatun kinta kakillielia.

²⁴ Ġatun bara uwa ġikouġ kin, bouġbuġġa ġaiya bon, wiyellielia, Piriwál, piriwál, tetti kolaġ ġéen! Bouġkulléun ġaiya noa, ġatun wiya noa wibbi, ġatun tulkun wombul koba; ġatun korun kakulla, ġatun yuraġ ġaiya kakulla.

²⁵ Ġatun noa wiya barun, Wonnug-ke nurun kotellita? Ġatun bara kinta kakulla, kotelliela, wiyalan taraikan-taraikan, Wontakan unni kúri! kulla noa wiyán wibbi ġatun bato, ġatun ġurra ġaiya bon.

²⁶ Ġatun bara uwa purrai tako Gadarén tako, kaiyin taba Galilaia kaba.

²⁷ Ġatun noa ba yankulléun purrai tako, nuġgurrawa bon waká llo kúriko kokerá biruġ ko, diabolkan noa katalla yuraki, ġatun keawai noa upillipa kirrikin to, keawai noa kátan kokerá, nikki ka noa kakulla.

²⁸ Nakulla noa ba Iéthunuġ, kaaibulléun ġaiya noa, ġatun puntimulléun ġikouġ kin mikan ta, ġatun wokka wiyelléun wiyellielia, Minnuġ banún ke bi tia, Iéthu, Yinal ta Eloi koba wokka kaba koba? Yanoa bi tia piralmai yikora.

²⁹ (Kulla noa wiya marai yarakaikan paikulliko kúri kabiruġ. Kulla bon mankulla murrin-murrin; ġatun wirria bon tibon ko; ġatun noa tiirbuġġa tibon, ġatun yuaipéa bon diabollo koruġ kolaġ).

³⁰ Ġatun Iéthuko noa wiya bon, wiyellielia, Wonnén bi yitirra? Ġatun noa wiya, Léjun baġ; kulla kauwál-kauwál diabol uwa murrariġ ġikouġ kinko minki kako.

³¹ Ġatun bara bon wiya, Yanoa, wiya yikora ġearun bi pirriko kolaġ kakilliko.

³² Ġatun kakulla untakál wirrul takillielia bulkára ba ko; ġatun bara wiya bon pulóġkulliko barun minki kako porák kako. Ġatun noa wamunbéa barun.

³³ Uwa ġaiya bara waita diabol minki tabiruġ kúri kabiruġ, ġatun pulóġkulléun porák ka koiro ka; ġatun wirrul murra barán karakai pirriko koba wara kako, kurrin to ġaiya bara.

³⁴ Nakulla bara ba tamunbéa unnoa tara umatoara, murra ġaiya bara, ġatun waita uwa kokerá kolaġ, ġatun ġoruġ kolaġ; wiya ġaiya ġalao.

³⁵ Uwa ġaiya bara nakilliko umatoara ko; ġatun uwa Iéthu kin, ġatun nakulla bara bon unnoa kúri, paipitoara biruġ bara waita uwa, yellawollielia Iéthu ka ta tinna ka, kirrikinkan ġatun tuloa ġurrullikan; ġatun kinta bara kakulla.

³⁶ Yantinto nakulla unnoa wiya barun, yanti bon ba turon uma diabolkan kauwálkan.

³⁷ Ġatun yantinto konaró purrai tako Gadarén tako wiya ġaiya bon waita uwolliko barun kinbiruġ; kulla bara kintakan kauwál kakulla. Ġatun noa uwa murrinawwai tako, ġatun wulluġbo kakulla.

³⁸ Ġatun unnoa kúri kabiruġ diabol bara waita uwa, wiya bon ka-uwil koa noa ġikouġ katoa: wonto noa Iéthuko yuka bon waita, wiyellielia,

³⁹ Willuḡbo bi wolla ġirouḡ ka tako kokerá ko, ġatun gurrabunbilliko unnoa tara uma noa ba Eloitto ġirouḡ. Ġatun noa waita uwa, ġatun wiya yantin toa kokeroa, yanti léthuko noa uma bon.

⁴⁰ Ġatun yakita kakulla, willuḡbo noa ba Iéthu kakulla, pitál tara kakilliela kùri, kulla bara bon mittilliela yantinto.

⁴¹ Ġatun yakita uwa wakál kùri tanan, ġiakai yitirra Yaeiro, wiyellikan noa thunagóg kako; ġatun noa puntimulléun Iéthu kin tinna ka, ġatun wiya uwolliko ġikouḡ kinko kokerá ko;

⁴² Kulla bon wakál yinálkun kakulla, dodeka wunál ta bounnoun ba, ġatun bountoa pirrikilliela tetti kakilliela. Ġatun uwa ġaiya noa, kùriko bon murrugkama.

⁴³ Ġatun wakál nukuḡ, kumarakan dodeka wunál ta bounnoun ba, ġukilléun bountoa kirun tullokan bounnounba karákál ko, keawai bara bounnoun turon uma pa,

⁴⁴ Uwa bountoa bulka kako, ġatun numa pita ġikoumba kirrikin: ġatun tanoa-kál-bo kumara ġaiya kakulla korun.

⁴⁵ Ġatun noa Iéthuko wiya ġaiya, Ġanto tia numa? Yantinto wiya keawai, wiya ġaiya noa Peterko ġatun bara ġikouḡ katoa, Piriwál, konaro bin murrugkama ġatun waita wa, ġatun bi wiyen, Ġanto tia numa?

⁴⁶ Ġatun noa Iéthuko wiya, Wakállo ta tia numa: kulla baḡ gurran waita ka ba kaiyu emmouḡ kinbiruḡ.

⁴⁷ Ġatun bountoa ba nukuḡko nakulla yuropa korien bountoa, uwa bountoa pulul-pulul, ġatun puntimulléun ġikouḡ kin mikan ta, wiya bon bountoa mikan ta yantin ta kùri ka, minariḡ tin bountoa numa bon, ġatun tanoa-kál-bo bountoa kakulla turon.

⁴⁸ Ġatun noa bounnoun wiya, Yinálkun, kauwa bi pitál; ġurrullito ġiroúmba-ko turon bin uma; yuriḡ waita pitál kakilliko.

⁴⁹ Ġatun wiyelliela noa ba, tanan uwa wakállo wiyellikan ta biruḡ kokerá biruḡ, wiyelliela bon, Ġiroúmba yinálkun tetti kakulla; yanoa, Piriwál pirriralmai yikora bon.

⁵⁰ Wonto noa ba Iéthuko gurra, wiyayelléun noa bon wiyelliela, Kinta kora bi; ġurrulla wal bi, ġatun turon ġaiya wal bountoa kánun.

⁵¹ Ġatun noa ba uwa kokerá ko ba murriraḡ, keawai noa tarai kan wommumbi pa ġikouḡ kin, wonto ba Peternuḡ ġatun Yakobonuḡ, ġatun Ioannenuḡ, ġatun biyuḡbai ġatun tunkán murrakin koba.

⁵² Ġatun yantin tuḡkilléun ġatun minki kakulla bounnoun kai: wonto noa ba wiya, Tuḡki yikora; keawaran bountoa tetti korien, wonto ba ġarabo kakillin.

⁵³ Ġatun bara bon béelma, nakilliela tetti bountoa kakulla.

⁵⁴ Ġatun noa kirun barun yipa warai tako, ġatun noa mankulla bounnoun muttárrin, ġatun wiya, Murrakin, bouḡkullia.

⁵⁵ Ġatun bounnoun ba marai katéakan, ġatun bountoa bouḡkulléun tanoa-kál-bo: ġatun noa wiya bounnoun takilliko.

⁵⁶ Ġatun kintakan biyuḡbai ġatun tunkán bounnoun ba: wonto noa ba wiya barun, yanoa wiya yikora taraikan kùri unni umatoara.

9

¹ WIYA ġaiya noa barun dodeka ta ġikoumba kaumulliko, ġatun ġukulla barun kaiyu kakilliko ġatun wiyellikan kakilliko yantin ko diabol ko, ġatun turon umulliko yantin munnikan ko.

² Ġatun noa barun yuka wiyelliko bathileia Eloi koba, ġatun turon umulliko munnika ko.

³ Ġatun noa wiya barun, Manki yikora waita kolaḡ, keawai tupa-tupa mánun, keawai yinuḡ, keawai kunto, keawai money, keawai buloara mánun kirrikin taraiko-taraiko.

⁴ Ġatun uwánun nura ba tarai ta kokerá, tanoa kauwa, ġatun waita uwolla untoa biruḡ.

⁵ Ġatun bara keawai nurun wommunbi korien, waita nura ba uwánun untoa biruḡ kokerá biruḡ, tirri-tirrillia yullo kabiruḡ moriḡ tinna kabiruḡ nurun kinbiruḡ, túga kakilliko barun kinko.

⁶ Ġatun waita bara uwa, ġatun uwa kokeroa Willi koa, wiyelliela Euagelion, ġatun turon umullielia yantin ta purrai ta.

⁷ Ġatun noa Herodto tetrákkko gurra unni tara umá noa ba; ġatun koteiliela niuwoa bo, kulla wiyatoara tarai-kan-to Ioanne noa bouḡkulléa tetti kabiruḡ;

⁸ Ġatun winta ka, paipéa noa Elia; ġatun tarai-kan-to, wakál ġaġka-kál propet tabiruġ bouġkalléun.

⁹ Ġatun noa Herod wiya, Kolbuntia baġ bon Iaonneuġ wolluġ; ġan-ke unni ġurran baġ unni tara? ġatun noa na-uwil koa bon.

¹⁰ Ġatun bara apothollo willuġbo bara ba kakulla, wiya ġaiya bon yantin unni tara uwa bara ba. Ġatun noa barun yutéa, ġatun kara uwa mirrulla ko, kokerá ko yitirra Betáthaida kako.

¹¹ Ġatun bara kúri ġurra bara ba, wirropa bara bon; ġarokéa noa wiyelliko barun bathileia Eloi koba, ġatun umá barun turon kakilliko munnikan.

¹² Ġatun purreáġ kakilliela yaréakál, uwa ġaiya bara dodeka ta, ġatun wiya bon, Yukulla barun konara waita laġ, uwa-uwil koa bara yantin toa purrai kariġ koa, yellawolliko, ġatun takilliko; kulla géen kátan unti mirrul la.

¹³ Wonto noa ba barun wiya, Ġuwa barun ġalao ko takilliko. Ġatun bara wiya, Keawai ġearunba kulla unni pente kunto ġatun buloara makoro; wiya géen wirrilla barun ġali ko takilliko yantin ko kúri ko.

¹⁴ Kulla wal kúri kauwál pentakikilioi ta. Ġatun noa wiya barun wirrobullikan, Yellawabunbilla barun konara kakilliko pentékonta tarai taba kakilliko.

¹⁵ Ġatun uma ġaiya bara yanti, ġatun yellawabunbéa barun yantin barán.

¹⁶ Mankulla ġaiya noa unnoa tara kunto pente ġatun makoro buloara; ġatun nakilliela wokka laġ moroko koba, murroi wiyelliela unni tara, ġatun yiirbuġġa, ġatun ġukulla barun wirrobullikan ko wunkilliko barun kin mikan ta konara.

¹⁷ Ġatun takulla bara, ġatun warakan ġaiya bara kuttawan yantin; ġatun mankulla bara wanan dodeka ka wimbi ka wuntawai biruġ barun kai.

¹⁸ Ġatun yakita wiyelliela noa ba niuwoa-bo púnbai, ġikoúmba wirrobullikan ġikouġ katoa; ġatun noa wiya barun, wiyelliela, Ġannuġ wiyán kúri ko ġan baġ ba.

¹⁹ Wiyayelléun bara; wiyelliela, Ioanne ta bi korimullikan wonto ba taraito wiyán Elia ta ba; ġatun taraito wiyán wakál ġaġka-kál propet koba, bouġkulliakán katéa-kán.

²⁰ Wiya noa barun, ġanto tia nura wiyán ġan baġ? Peterko noa wiyayelléun, wiyelliela, Krith ta bi Eloi-úmba.

²¹ Ġatun noa barun piralma, wiyéa-kán koa bara unnoa tara tarai ko kúri ko;

²² Wiyelliela, Yinal ta kúri koba yarakai kauwál wal bon umánun, ġatun warekánun wal bon bara ġaġkakał ġatun bara hiereukan piriwál, ġatun bara ġárammateukan, ġatun búnnun wal tetti, ġatun bouġánun ġaiya bon tarai ta purreáġ goro ka.

²³ Ġatun wiya noa barun yantin, Wanún tia ba taraikan kúri uwánun, ġurrullia noa niuwoa-bo, ġatun mara-uwil koa noa taligkabillikanne ġikoúmba yantin ta purreáġ ka, ġatun wirrobulla tia.

²⁴ Ġanto ba mirománun moron ġikoúmba, warekánun wal noa? kulla noa warekánun moron ġikoúmba emmouġ kin, ġalao noa moron umánun.

²⁵ Wonnúġ-ke murraráġ kúri ko, mankilliko purrai kariġ ko, ġatun noa tetti wal ġaiya kánun niuwoa-bo, ġa warekánun wal?

²⁶ Ġan tia ba koiyun kánun emmouġ kai, ġatun wiyellikanne emmoumba, Yinal kúri koba koiyun ġikouġ kai, uwánun noa ba killibinbinkan kóti ġikouġ kinba, ġatun Biyuġbai koba, ġatun aġelo yirri-yirri-kan koba barúnba.

²⁷ Kulla baġ wiyán nurun tulao, unni winta ġarokéun ba, keawai bara tetti kánun, kabo na-uwil koa bara bathileia-nuġ Eloi koba.

²⁸ Ġatun yakita kakulla purreáġ ka ét ta yurika-ta unni tara wiyellikanne, yutéa noa barun Peternuġ, ġatun Ioannenuġ, ġatun Yakobonuġ, ġatun uwa wokka laġ bulkára kolaġ wiyelliko.

²⁹ Ġatun noa ba wiyelliela, takin bon tarai warrakulléun, ġatun ġikoúmba kirrikin purrul kakulla, ġatun killibinbin kakulla.

³⁰ Ġatun wiyelliela bon kúriko Mothéko ġatun Eliako:

³¹ Paipéa bula killibinbin, ġatun wiya bula ġikoúmba (tetti?) tin ka-uwil koa Hierothalem ko.

³² Wonto ba Peter noa ġatun bara ġikouġ katoa porrólkan bara birikéa kóġóġ; ġatun bara kakulla tiraġ, nakulla bara ġikoúmba killibinbin, ġatun buloara bula kúri ġarokéa ġikouġ katoa.

³³ Ġatun kakulla yakita bula ba waita uwolliela ġikouġ kinbiruġ, Peterko noa wiya bon léthunuġ. A! Piriwál, murraráġ ġearun unti ko kakilliko; ġatun umabunbilla goro

kokerá; wakál bin, ġatun wakál Mothénuġ, ġatun wakál Elianuġ, ġurra korien minariġ noa wiya.

³⁴ Wiyelliela noa ba, yareil kakulla, ġatun wutéa barun; ġatun bara kinta kakulla, waita bara ba wolliela murrariġ yareil la.

³⁵ Ġatun pulli kakulla yareil labiruġ, wiyelliela, Unni ta emmoúmba kóti yinal pitálmullikan; ġurrulla bon.

³⁶ Ġatun pulli ba kakulla korun, Iéthu noa kakilliela púnbai. Keawai bara unni tara wiya pa untatoara, natoara purreaġ ka tarai ta unta, uwa bara ba barán bulkára biruġ, kauwállo kúriko nuġgurra wa bon.

³⁷ Ġatun yakita kakulla purreaġ ka tarai ta unta, uwa bara ba barán bulkára biruġ, kauwállo kúriko nuġgurra wa bon.

³⁸ A! ġatun wakál kúri konara koba kaaibulléun, wiyelliela, Piriwál, kai bi, na-uwillia yinal emmoúmba; kulla noa emmoúmba wakál wonnai.

³⁹ A! ġatun maraito bon mankulla, ġatun ġaiya noa kaaibulléun wokka; ġatun yirbuġġa bon, ġatun kurraġtoanbuġġa; ġatun búntoara noa, waita ġaiya ġikouġ kinbiruġ uwa.

⁴⁰ Ġatun baġ wiya barun wirrobullikan ġiroúmba warekulliko bon; keawai bara kaiyu korien.

⁴¹ Ġatun noa Iéthuko wiya, wiyelliela, A! ġurra korien ġatun pirriral unni willuġ-ġél! Yakounta-laġ baġ kánun nurun kin, ġatun wal baġ kámunbinún nurun? Mara bon tanan ġiroúmba yinal unti ko.

⁴² Ġatun uwolliela noa ba tanan diabollo bon puntima barán ġatun yiiryir uma. Ġatun noa Iéthuko koakulla bon marai yarakai ka, ġatun bon wonnai turon uma, ġatun ġutéakan ġaiya bon biyuġbai ta ġikoúmba tin.

⁴³ Ġatun yantin bara kinta kakulla kaiyu tin kauwál lin Eloj koba tin; ġatun kotelliela bara ba yantin unni tara Iéthuko noa ba uma, wiya ġaiya noa barun wirrobullikan ġikoúmba,

⁴⁴ Kámúnbilla unni tara wiyellikanne murriraġ ġurruéuġ kako nurun kin; kulla noa Yinal kúri koba wupinún wal bon mattára kúri ka.

⁴⁵ Keawai bara ġurra pa unni wiyellikanne, ġatun yuropa ġali barun kinbiruġ, keawai bara ġimilli korien; ġatun bara kinta kakulla wiyelliko bon ġali tin wiyellikanne tin.

⁴⁶ Yakita ġaiya bara wiyellan barabo-barabo, ġan-ke kánun kauwál piriwál barun kinbiruġ.

⁴⁷ Ġatun Iéthuko noa ġimilléun kototoara búlbúl labiruġ barun kinbiruġ mankulla noa wonnai, ġatun yellowabunbéa bon ġikouġ kin taruġ ka,

⁴⁸ Ġatun noa barun wiya, Ġanto ba unni wonnai pitálmanún kinba, pitál manún ġaiya tia; ġatun ġanto ba tia pitálmanún, pitálmanún bon ġala yuka tia ba; ġatun niuwoa kátan waréa nurun kinba yantin taba, yantibo ta wal noa kauwál kánun.

⁴⁹ Ġatun noa Ioanneto wiya, wiyelliela, Piriwál, nakulla ġéen wakállo paibuġġullielia barun diabol ġirouġ katoa biruġ yitirra biruġ; wiya ġéen bon yanoa, koito ba keawai noa wa pa ġearun katoa.

⁵⁰ Ġatun noa Iéthuko bon wiya, Wiwi yikora; koito noa ba keawai bukka korien ġearun, niuwoa ġearun katoa ba.

⁵¹ Ġatun yakita kakulla purreaġ mánun bon ba wokka kolaġ, pirral noa kakilliela waita Hierothalem kolaġ,

⁵² Ġatun noa yuka barun puntimai ġikoúmba ġanka; ġatun bara uwa kokerá kolaġ Thamaria kako, umulliko ġikouġ.

⁵³ Ġatun bara bon keawai pitálma pa, kulla noa pirral kakulla wa pa Hierothalem kolaġ.

⁵⁴ Ġatun bula wirrobullikan ġikoúmba, Yakobo ġatun Ioanne, nakulla bula unni, wiya bula, Piriwál, wiya bi, wiya-uwil koa ġéen koiyuġ koa kauwál barán moroko kabiruġ wina-uwil koa barun, yanti Elia noa ba unnoa?

⁵⁵ Wonto noa ba wakulléun, koakulla ġaiya barun noa, ġatun wiya, Keawaran nura ġimilli korien nurúnba kóti búlbúl.

⁵⁶ Koito ba noa yinal kúri koba keawaran noa tanan wa pa, búkilliko kúri ko barun, wonto ba murrin umulliko. Ġatun bara uwa tarai tako kokerá ko.

⁵⁷ Ġatun yakita kakulla, uwolliela bara ba yurij yapuġ koa, taraito bon wiya, Piriwál, wirrobuġbinún banuġ, wontariġ bi ba uwállun,

⁵⁸ Ġatun noa Iéthuko bon wiya, Murroġ-kai-ko kumiri barúnba, ġatun tibbin moroko ka koba kunta barúnba, wonto ba yinal kúri koba keawaran bon ġikoúmba birrikilli-ġél walluġ ko ġikoúmba ko.

⁵⁹ Ġatun noa tarai wiya, Wirrobulla tia. Wonta noa ba wiya, Piriwál, wamunbilla tia ġanka bapa-uwil koa baġ emmoúmba biyuġbai.

⁶⁰ Wiya bon noa Iéthuko, Bababunbilla barun tetti-tetti barúnba; ġintoa yuriġ bi wolla wiyelliko piriwál koba Eloi koba.

⁶¹ Ġatun taraito wiya, Piriwál, wirrobanún banuġ; wamunbilla tia ġanka wiyellikoa barun baġ unni emmouġ kinba kokerá ba.

⁶² Ġatun noa Iéthuko bon wiya, Keawai tarai-kan-to upillinún máttára purrai-ġél lo, ġatun willuġ-wuminún, keawaran noa murrárag korien kakilliko piriwál ko Eloi koba ko.

10

¹ YAKITA ġaiya kakulla unni tara, Piriwálo noa ġearimulléun thebenty taraikan ta, ġatun yuka barun buloara-buloara ġikouġ kin mikan ta, yantin tako kokerá ko uwánun noa ba niuwoa-bo.

² Ġatun noa barun wiya, Kauwál-lan unni nulai kátan, keawai bo katillikan kúri kauwákkál; ġali tin wiyella nura bon, Piriwál nulai-ġél koba yuka-uwil koa noa barun katillikan nulai ko katilliko ġikouġ kaiko.

³ Waita nura yuriġ wolla: A! yukan nurun baġ waita kolaġ yanti kiloa waréa ta éipu barun kin murroġ ka ta.

⁴ Kurri yikora yanoa munniġél, ġatun yinuġ, keawai tuġġanuġ; ġatun yanoa wiya yikora yapuġ koa taraikan kúri.

⁵ Ġatun uwánun nura ba kokerá ko taraikan tako, wiyella, kurri ġiakai, Pitál kauwa unni kokerá ba.

⁶ Ġatun ba yinal koba pitál koba kánun unta, nurúnba pitál kánun ġaiya unta; keawai ba nurun kin katéa kánun willuġbo.

⁷ Ġatun yellawánun nura unta kokerá, takilliko ġatun pittelliko, ġunún bara ba nurun; kulla noa umulli-kan-to man ba ġutoara ġikoúmba. Uwai yikora kokerá kolaġ kokerá kolaġ.

⁸ Ġatun uwánun nura ba yantin ta kokeroa, ġatun bara nurun pitálmanún, ta-uwa untoa tara wunún ba mikan ta nurun kin.

⁹ Ġatun turon barun umulla unta tara; ġatun wiyella barun, Piriwál koba Eloi koba papai uwa nurun kinba.

¹⁰ Uwánun nura ba tarai ta kokeroa, ġatun bara keawai pitálma korien nurun, uwéa ka nura warai tako yapuġ kako, ġatun wiyella,

¹¹ Umulléun ġéen punul untikál ġearun kinba nurun kin; A! kotellia nura unni ta uwan ta papai kátan nurun kin piriwál koba Eloi koba.

¹² Wiyen nurun baġ, murrárag kánun unta ta tarai ta purreáġ, ka Thodom kako, keawaran ġala ko kokerá ko.

¹³ Yapallun bi Koradhin! yapallun bi Betáthaida! kulla umatoara ba kauwál-kauwál kaiyu biruġ ka pa Turo ka ġatun Thidoni ka uma ġirouġ kin, minki bara ka pa yuraki, yellawa pa bara pirral la kirrikin ta ġatun bonoġ ka.

¹⁴ Murrárag buloara kánun Turo ġatun Thidoni unta purreáġ wiyellaikanne ta keawaran bi.

¹⁵ Ġatun ġintoa, Kapernaum, wunkulla wokka laġ moroko ka, yuaipinún wal barán pirri kako.

¹⁶ Niuwoa ġurran nurun ba, ġurran ta noa tia; ġatun niuwoa waitiman nurun ba, waitiman noa tia; ġatun niuwoa tia waitiman, waitiman noa bon yuka noa tia ba.

¹⁷ Ġatun bara thebenty ta willuġbo kakulla pitálkan, wiyelliela, A Piriwál! ġurrullikan bara diabollo ġearun ġirouġ katoa yitirroa.

¹⁸ Ġatun noa barun wiya, Nakulla bon baġ Thatannuġ puntimulléun barán moroko tin yanti málma kiloa.

¹⁹ A! ġutan baġ nurun kaiyu waitawolliko maiya ko ġatun wuarai ko, ġatun yantin ko kaiyu bukkakan ko; ġatun keawai wal nurun yarakai umulliko.

²⁰ Pitál-mai yikora nura-nura, ġali tin ġurullikan tin bara marai nurun ba; unti biruġ pitálma nura, kulla yitirra nurúnba upatoara moroko ka ba.

²¹ Yakita ta noa pitál-lan kakulla marai ta, ġatun wiyelliela, Kauwa tia yanti, Biyuġ, Piriwál ta moroko koba ġatun purrai koba, kulla bi ba unnoa tara yuropa ġali unti biruġ

guraki ta biruḡ, ḡatun bi túḡkaiya unnoa tara barun boboḡ ko; kauwa yanti, Biyuḡ, koito ba murrárag ta ḡirouḡ kin kátan mikan ta.

²² Yantin ta tia wupéa emmouḡ kinko Biyuḡbaito; ḡatun keawai kúriko bon yinal ḡimilli pa, wonto ba Biyuḡbaito; ḡatun Biyuḡbai yinallo ḡimilléun, ḡatun niuwoa yinallo túḡnbinún bon Biyuḡbai.

²³ ḡatun noa willariḡ kakulla ḡikouḡ kai koba wirrobullikan, koba, ḡatun wiyelliela kara, Kauwa yanti murrárag ta natan ḡaikuḡ ko unni tara natan nura ba:

²⁴ Kulla baḡ nurun wiyan, kauwálo propetto ḡatun piriwálo na pa unni tara natan nura ba, ḡatun bara keawai na korien; ḡatun ḡurra pa unni tara ḡurran nura ba, ḡatun keawai ḡurra korien.

²⁵ A! tarai wakál nomiko ḡarokéa wokka laḡ, ḡatun wiya bon, wiyelliela, Piriwál, minnuḡ banún baḡ moron kakilliko yantikatai?

²⁶ Wiya bon noa, Minariḡ upa wiyellikanne? yakoai bi wiyan?

²⁷ ḡatun noa wiyayelléun, wiyelliela, Pitál kakilliko bi Piriwál ko Eloi ko ḡiroúmba ko yantin to búlbuúl lo ḡiroúmba ko, ḡatun yantin to marai to ḡiroúmba ko, ḡatun yantin to kaiyu ko ḡiroúmba ko, ḡatun yantin to kotellitó ḡiroúmba ko; ḡatun kóti ta ḡiroúmba yanti ḡintoa bo ba.

²⁸ ḡatun noa wiya bon, ḡintoa wiyayelléun tuloa; unni ta umulla ḡatun moron koa bi kauwál

²⁹ Wonto noa ba kotelliela tuloa ko ninwoa bo, wiya bon noa Iéthunuḡ, ḡan-ke tia kóti ta emmoúmba?

³⁰ ḡatun noa Iéthuko wiya, Taraikan waita uwa barán Hierothalem kabiruḡ Jeriko kako, ḡatun nuḡgurrawa mankiye, mantilléun bon kirrikin, ḡatun búnkulla, ḡatun bara waita uwa wareka ḡaiya bon búntoara.

³¹ Yakita ḡati uwa wakál hiereu barán yapuḡ koa; ḡatun nakulla bon noa ba, uwa noa taruḡ koa kaiyin ta koa.

³² Ganti yanti kiloa wakál Lebikan kakulla noa ba unta, uwa nakulla ḡaiya bon, ḡatun noa uwa taruḡ koa kaiyin ta koa.

³³ Wonto ba wakál kúri Thamariakál uwolliela ba, uwa yapariḡ kakilliela noa ba; ḡatun nakulla bon noa ba, minkí bon noa kakulla ḡikouḡ kai,

³⁴ ḡatun uwa ḡikouḡ kai koba, ḡatun ḡira bon búntoara ḡikouúmba, kiroabullielá kipaí ḡatun wain, ḡatun yellawabunbéa bon ḡikouḡ ka ta kóti ka buttikaḡ, ḡatun yutéa bon takilligél lako, ḡatun miroma bon.

³⁵ ḡatun tarai ta purreáḡ ka wakál la waita noa ba uwa, mankulla ḡaiya noa buloara denari, ḡatun ḡukulla kokeratin ko, ḡatun bon wiya, Golomulla bon; kirun bi ba upinún, uwéa kánún baḡ ba willuḡbo, ḡutéa kánún ḡaiya banuḡ.

³⁶ Wonnuḡ-ke kóti ta ḡikouúmba nuḡgurrawa mankiye unti biruḡ ḡoro kabiruḡ kúri kabiruḡ, kotella bi?

³⁷ ḡatun noa wiya, Niuwoa ḡoloma bon. Wiya noa bon Iéthu ko, Yuriḡ, yanti kiloa umulla bi.

³⁸ ḡatun yakita kakulla, uwa bara ba, uwa noa murruḡ koa kokeroa; ḡatun taraito nukuḡko, Maráthako yitirra, wamunbéa bon bounnoun kin kokerá.

³⁹ Wúḡḡunbai bounnoun ba ḡaiya kai, yitirra Mari, yellawa bountoa Iéthu kin yallo ka, ḡatun ḡurra bon wiyellita

⁴⁰ Wonto ba Marátha kámullan buntoa marai-marai umullita, ḡatun uwa bountoa ḡikouḡ kin, ḡatun wiya, Piriwál, kora bi natan tia wareka tia wúḡḡunbai emmoúmba umulliko wakálo? wiyella bounnoun umulli koa bountoa tia.

⁴¹ ḡatun noa Iéthako wiyelléun, ḡatun wiya bounnoun, Ela! Marátha, Marátha, ḡintoa kámullan marai-marai minnambo-minnambo ka;

⁴² Wonto ba wakál murrárag kátan: ḡatun Mariko bountoa ḡeremulléun unnoa murráragbo, keawai wal mantillinún bounnoun kinbiruḡ.

11

¹ ḡatun yakita kakulla, wiyelliela noa ba tarai ta purrai ta, kaiulléun noa ba wiyelli ta, wakálo bon wiya ḡikouḡ-ka-to wirrobullikanto, Piriwál, wiyella ḡearun bi wiyelliko, yanti kiloa Ioanneto noa wiya barun ḡikouúmba wirrobullikan.

² ḡatun noa wiya barun, wiyánún nura ba, ḡiakai nura wiyanún nura, Biyuḡbai ḡearúmba wokka ka ba moroko ka ba kátan, Kámunbilla yitirra ḡiroúmba yirri-yirri kakilliko. Paipibunbilla Piriwál koba ḡiroúmba. ḡurrabunbilla wiyellikanne ḡiroúmba, yanti moroko ka ba, yanti ta purrai ta ba.

³ Ġuwoa ġearun purreaġ ka takilliko.

⁴ Ġatun warekilla ġearúnba yarakai umatoara, kulla ġéen yanti ta wareka yanti ta wiyapaiyeún ġearúnba. Ġatun yuti yikora ġearun yarakai umullikan kolaġ; miromulla ġearun yarakai tabiruġ.

⁵ Ġatun noa barun wiya, Ġan nurun kinbiruġ kóti ġikoúmba, ġatun uwánun ġikouġ kin tokoi ta, ġatun bon wiyánun, Ela! kóti, mumbilla tia wokkai to ġoro ko;

⁶ Kulla noa emmoúmba kóti uwa kaloġ tin emmouġ kinko, ġatun keawai baġ wún korien ġikouġ kin mikan ta takilliko?

⁷ Niuwoa murrug ka ba ko wiyánun, Wai tia wiyellan; kulla unni kurraka wirriġbakulla, kulla wonnai tara emmoúmba emmouġ katoa ba birrikilligél laba; keawaran baġ bouġkulli korien ġukilliko ġirouġ.

⁸ Wiyan nurun baġ, Keawai noa bouġkulli korien ġulliko bon, kulla noa ba ġikoúmba kóti; kulla wal noa bon pirriral-mulli tin bouġkullinún ġaiya noa ġulliko bon wiyellinún noa ba.

⁹ Ġatun nurun baġ wiyán, Wiyella, ġatun ġunún ġaiya nurun; ġatun tiwolla, ġatun karawollinún ġaiya nura; wirrillia, ġatun umanún ġaiya nurun.

¹⁰ Yantin ba wiyellinún, manún wal; ġatun noa tiwollinún, karawollinún ġaiya noa; ġatun ġikouġ wirrillinún noa ba, umánun ġaiya wal.

¹¹ Yinallo ba wiyánun nulai yantin ta nurun kin, biyuġbai ta ba, wiya, noa ġunún tunuġ? ġa makoro, wiya, noa maiya ġunún makoró?

¹² Ga ba wiyellan noa ba yarro, wiya, noa bon ġupaiyinún wuarai?

¹³ Nura ba yarakaikan kátan, ġukilliko ġutoara murrarág wonnai ko nurúnba ko; kauwa yanti ġunún noa Biyuġbaito moroko ka ba ko Marai murrarág barun wiya bon ba?

¹⁴ Ġatun noa ba paibuġgullielu wakál diabol, ġatun noa ġoġo. Ġatun yakita ġaiya kakulla, waita ba uwa diabol, wiya ġaiya noa ġoġo kabiruġ ko; ġatun bara kúri kotelliela.

¹⁵ Wonto ba tarai-kan-to wiya, Paibuġġa noa barun diabol Béeldhebul kátan biruġ, piriwálloa biruġ diabol koba ko.

¹⁶ Ġatun tarai-kan-to wiyelliela, wiya bon túġa moroko tin.

¹⁷ Wonto noa ba ġimilléun barúnba kotellikanne, wiya barun, Yantin piriwál koba ġaruġġara unulla barabo tetti bara kánun; ġatun kokerá koba barabo warakullia bara.

¹⁸ Thatan noa ba ġaruġġara kánun niuwoa-bo, yakoi ġikoúmba piriwál koba kánun? kulla nura wiyán paibuġġa baġ ba barun diabol Béeldhebul katoa biruġ.

¹⁹ Ġatun ġatoa ba paibuġġaanún barun diabol Béeldhebul biruġ, ġan katoa biruġ nurúnba-ko yinal-lo paibuġġa?

²⁰ Ġatoa paibuġġánun máttárroa biruġ Eloi koba ko barun diabol, kauwa tuloa uwa ġaiya piriwál koba Eloi koba nurun kin ba.

²¹ Ġolmánun noa ba tarai kúri mokál porrol ġikouġ kin kokerá, ġikoúmba tullokan murroi kátan.

²² Wonto ba tanan uwánun tarai mokál porrolkan kauwál kan ġikouġ kin, ġatun kéakéa-ma noa bon, mantillinún ġaiya wal bon kirun mokál ġikoúmba pirriral-matoara; ġatun ġutillinún noa mokál ġikoúmba.

²³ Niuwoa keawai emmouġ katoa, niuwoa kátan kóti korien; ġatun noa keawai boa-ma korien emmouġ katoa, ware-ware-kan.

²⁴ Paikullinún ba marai yarakai kúri kabiruġ, uwan noa yuriġ purroi toa tarawarao, nakilliko korilliko; ġatun noa keawai na korien, wiyán noa, Willuġbanún wal baġ willuġbo kokerá ko emmouġ ka ta ko, unta biruġ uwa baġ ba.

²⁵ Ġatun uwánun noa ba, nakulla ġaiya noa ba wiréa kiriiri ġatun konéin.

²⁶ Uwan ġaiya noa ġatun yutéa taraikan theben ta marai yarakai kauwál yanti niuwoa ba; ġatun bara uwa murrarig ġatun kakulla ġaiya bara unta; ġatun yarakai kauwál noa unnoa kátan yakita, kakulla noa ba kurri-kurri.

²⁷ Ġatun yakita kakulla, wiyelliela noa ba, kaibulléun tarai nukuġ ġali koba konara koba, ġatun wiya bon bountoa, Murrarág kauwa yanti pika kurréa bon ba, ġatun paiyil pitta bi ba.

²⁸ Wonto noa bo wiya, Kauwa yanti, murrarág kauwál kátan bara ġurrullikan wiyellikanne Eloi koba, ġatun mirromulli-ko.

²⁹ Ġatun yakita kakulla, wittillan bara ba kúri, wiya noa kurri-kurri, Unni ta yarakai kátan willuġgél; nakillin bara túġa; keawai wal barun ġunún, unni bo ta wal tuúġa Iona-úmba propet koba.

³⁰ Yanti kiloa Iona túga kakulla noa barun kúri Ninebi ka, yanti bo ta wal kánún noa yinal kúri koba barun gali ko willúggél ko.

³¹ Bougkullinún wal piriwál kirin pakai biruğ purreağ ka wiyelligél la kúri koa untikál loa willúggél loa, gátun pirralmanún barun; kulla bountoa uwa kaloğ kabiruğ purrai tabiruğ wirán tabiruğ gurrulli bon guraki ko Tholomón ko; A! kauwál kátan Tholomón kiloa unnibo.

³² Bougkullinún wal bara kúri Ninebikál purreağ ka wiyelligél la kúri koa untikál loa willúggél loa, gátun pirral-manún barun; kulla bara minki kakulla wiyelli ta Iona-úmba ka; A! kauwál kátan Iona kiloa unnibo.

³³ Keawai kúriko tarai-kan-to wirrouğ buğgánún kaibuğ wunún gaiya gati ta, keawai baria ka wimbi ka, wonto ba kaibuggél la, bara ba uwánún na-uwil koa bara kaibuğ.

³⁴ Kaibuğ ta murrin koba gaikuğ; wonto ba giroúmba gaikuğ tuloa kátan, yantin bin kátan murrin kaibuğkan; wonto bin ba gaikuğ yarakai, kánún murrin bin warapa tokoi to.

³⁵ Yakoai bi, mirka unnoanuğ kaibuğ giroúğ kinba tokoi ta ba kátan.

³⁶ Kulla ba yantin ta giroúmba murrin ta ba warapan kaibuğ ko, keawai taraikan tokoi, kánún yantinbo ta wal warapan kaibuğ ko, yanti kaibuğ koba wupin gátun binkirréún.

³⁷ Gátun wiyelliela noa ba, taraito Parithaioiko wiya bon tauwil koa noa gikouğ katoa; gátun noa uwa murrariğ gátun yellawa takilliko.

³⁸ Gátun noa ba Parithaioiko nakulla, umulli korien noa bato ka kurri-kurri takilli kolağ, kotelliela noa.

³⁹ Gátun bon noa Piriwállo wiya, Yakita nura Parithaioiko umullia mirkun karai-ğon tunti gátun pikirri; wonto ba nurúnba murrin warapan williró gátun yarakai to.

⁴⁰ Wogkál nura! yan ta noa uma unnoa yanti unnoa ba warrai ta ba, yantibo uma noa murrug ka ba?

⁴¹ Guwa nura untoakál nurun kinbiruğ, gátun yantin nurun ba tuloa ka kátan.

⁴² Yapal nura Parithaioi! kulla nura gúkillan wintakál mentha tabiruğ, gátun ruta tabiruğ, gátun yaki tara, gátun gurramaigan tuloa gátun pitálumullikanne Eloi koba; unni tara nura uma pa, gátun keawai taraikan wareka pa uma korien.

⁴³ Yapal nura Parithaioi! kulla nura pitálman yellawollikanne wokka kaba thunagóg kaba, gátun unullikanne gúkilligél lako.

⁴⁴ Yapal nura gárammateu gátun Parithaioi, gakoiyaye! kulla nura yanti tulmun kiloa paipi korien, gátun bara kúri uwan wokka lağ tulmun toa, keawaran bara na korien.

⁴⁵ Wiyayelléún gaiya wakállo nomiko-ko wiyelliela bon, Piriwál, giakai bi wiyán, pirralman bi gearun.

⁴⁶ Gátun noa wiya, Yapal nura nomikoi yantinbo! kulla nura wuntan kúri ka porrol ta lo kauwál porrol kurrilliko, gátun keawai nura unnoa porrol numa korien nurun ka to máttárró.

⁴⁷ Yapal nura! kulla nura ba wittiman tulmun barúnba propet koba, gátun biyugbaito nurúnba-ko bunkulla barun tetti kulwon.

⁴⁸ Kauwa tuloa ta pirralman nura umatoara biyugbai koba nurúnba; kulla bara yuna bo ta barun búnkulla tetti, gátun nura wittillin tulmun barúnba.

⁴⁹ Yaki tin wiya gurakita Eloi koba ko, Yukánún wal bağ barun propet gátun apothol barun kin, gátun winta barun kinbiruğ búnnún wal bara gátun yarakai umánún;

⁵⁰ Wiya-uwil koa gorog yantin koba propet koba kiroabatoara yaki tabiruğ kurri-kurri tabiruğ purrai tabiruğ, unni barun willúggél;

⁵¹ Gorog kabiruğ Abelúmba kabiruğ, gorog kako Dhakariaúmba kako búntoara Willi ka bómo ta gátun hieron; kauwa tuloa to wiyán nurun bağ, wiya-uwil koa unni barun willúggél.

⁵² Yapal nura nomikoi! kulla nura mankulla wirriğbakilligél gurakita koba; keawai nura wa pa, gátun nura miya barun uwa bara ba.

⁵³ Gátun wiya noa ba unni tara barun, pirralalma bon bara gárammateuto gátun Parithaioiko, wiya-uwil koa noa minnambo wiyelliko;

⁵⁴ Mittillin bara bon, gátun nakillin gurrulliko gikouğ kin ba ko kurraka ba ko, wiyayeún koa bara bon.

12

¹ YAKITA kakulla, wittillan bara ba yantibo konara kúri, wata-watawollan barabo, wiya noa kurri-kurri barun wirrobullikan gikoúmba, Yakoai nura lebben barúnba Parithaioi koba, gakoiyaye ta unnoa.

² Yantin ba wutéa ta túgunbinùn ǵaiya wal; ǵatun yantin yuropa ta namunbinùn ǵaiya wal.

³ Yaki tin, wiyellan nura tokoi ta ǵurrabunbinùn wal kaibuǵ ka; ǵatun unni ta wiya nura ba ǵurréuǵ ka waiyakan ta, wiyellinùn wal wokka ka kokera.

⁴ Ǵatun baǵ nurun wiyan kóti ta emmoúmba, Kinta kora nura barun kin búnkillikan tin murrin tin, ǵatun yukita tantoa bo ta wal bara kaiyukan ta banùn.

⁵ Túgunbinùn wal baǵ nurun ǵan-kai nura kinta wal kánùn: Kinta bon kauwa ǵikouǵ kai, yukita noa ba búnkulla kaiyukan noa warekulliko koiyuǵ kako pirriko kako; kauwa wiyan baǵ nurun, Kinta bon kauwa ǵikouǵ kai.

⁶ Wiya, pente tibbin waréa ta ǵupaiye ko buloara assari, ǵatun keawai wakál unti biruǵ wogunti korien ǵikouǵ kin Eloi kin?

⁷ Kulla yantin wolluǵ kaba kittuǵ murrapatoara kátan. Kinta kora nura ǵali tin; kulla nura murráráǵ kauwálkan kátan, keawaran ǵali tarako tibbinko waréa-ta-ko kauwál-kauwál-ko.

⁸ Unni ta nurun baǵ wiyan, Yantinto emmouǵ wiyánùn mikan ta kúri ka, ǵikouǵ wiyánùn noa Yinal kúri koba mikan ta áǵelo ka Eloi koba ko.

⁹ Wonto ba niuwoa ǵanbullinùn tia emmouǵ mikan ta kúri ka, ǵanbullinùn wal bon mikan ta áǵelo ka Eloi koba ka.

¹⁰ Ǵatun ǵanto ba yarakai wiyánùn ǵikouǵ Yinal kúri koba, kámunbinùn wal bon; wonto bon ba yarakai wiyellikan Maraikan yirri-yirri-kan, keawai bon kámunbinùn.

¹¹ Ǵatun manùn nurun bara thunagóg kako ǵatun wiyellikan tako, ǵatun kaiyukan tako, kota yikora nura wonnuǵ nura ba wiyayellinùn, ǵa minnuǵ nura wiyánùn.

¹² Kulla nurun Marai-kan-to yirri-yirri-kan-to wiyánùn wal yakita bo ǵaiya minnuǵ wal nura wiyánùn.

¹³ Ǵatun wiya bon wakállo konara biruǵ ko, Piriwál, wiyella emmoúmba biggainuǵ, ǵukulli koa noa purrai emmouǵ kai.

¹⁴ Ǵatun noa bon wiya, Kúri, ǵanto tia uma wiyellikan, ǵa ǵukillikan ǵirouǵ kin?

¹⁵ Ǵatun noa barun wiya, Yakoai ǵatun murroi kauwa williri koba; kulla moron kúri koba ka korien ta kauwál-kauwál la tul lokan ka ǵikouǵ ka ta.

¹⁶ Ǵatun noa wiya barun unni parabol, wiyelliela, Purrai ta porrólkan koba poaikulléun kauwál:

¹⁷ Ǵatun noa kotelléun niuwoabo, wiyelliela, Minnuǵ banùn baǵ, kulla wal unni tuntan uwa, wiya wal baǵ wonta wura-uwil unni tara emmoúmba?

¹⁸ Ǵatun noa wiya, Unni baǵ umánùn; umánùn wal baǵ barán wunkilligél emmoúmba, ǵatun wittia kánùn kauwál; ǵatun unta baǵ wunùn yantin emmoúmba nulai ǵatun tullokán.

¹⁹ Ǵatun baǵ wiyánùn emmoúmba marai, A marai! Kauwál tullokán ǵiroúmba wúnkulla kauwál lako wunál lako; yellawolla murroi bi, tauwa, pittella, ǵatun pitál kauwa.

²⁰ Wonto ba Eloito bon wiya, Wogkál-lan bi! unti tokoi ta ǵiroúmba marai mantillinùn wal ǵirouǵ, kinbiruǵ; ǵanto ǵaiya unnoa tara tullokán manùn tuigko bi ba uma?

²¹ Yanti niuwoa ba wupéakan tullokán ǵikouúmba ko, ǵatun keawai porrol korien Eloi kai koba.

²² Ǵatun noa wiya barun wirrobullikan, Yaki tin wiyan baǵ nurun, Yanoa, kota yikora nurúnba moron takilliko; ǵa keawai murrin ko wupulliko.

²³ Moron ta kauwál kátan murráráǵ takillikanne keawaran, ǵatun murrin ta kauwál kátan murráráǵ kírrikin keawaran.

²⁴ Kotella wákun barun; koito bara ba keawai wupa korien, ǵatun keawai kol bunti korien; keawai barúnba tuigko wupilligál, keawai barúnba kokera; ǵatun noa Eloito ǵiratiman barun; kauwál-kauwál nura kátan murráráǵ tibbin bara keawaran.

²⁵ Ǵatun ǵan nurun kinbiruǵ kotellita kánùn, uméa kánùn moron ǵikouúmba waréa ka kakilliko kubit kako?

²⁶ Wiya nura ba kaiyu korien to umulliko unni waréa, minariǵ tin nura kotellin unnoa tara?

²⁷ Kotella nura kenukún turukin bara ba; keawai bara uma korien wupi korien bara; ǵatun baǵ wiyan nurun, Tholomón noa ba, konéinkan keawai bon wupa korien yanti kiloa wakál unti tara biruǵ.

²⁸ Upánùn noa ba Eloito woiyo yanti, yakita purreáǵ ka unta ba purrai ta kátan, ǵatun kumba warekakin murrug ka wollo ka; wiya, nurun noa upánùn, A! nura ǵurrullikan waréakan?

²⁹ Ġatun na-ki yikora nura minariġ nurúnba takilliko ġatun pittelliko, ġa kota yikora nura minki ko.

³⁰ Koito ba bara yantinto purrai ta ba ko natan yantin unni tara; ġatun nurúnba-to Biyuġbai-to ġurran unni tara ġukillikanne nurun ba murràrġ kakilliko.

³¹ Wonto ba nura nauwa piriwál koba Eloj koba, ġatun yantin unni rara ġunun nurun kin.

³² Kinta kora, wirrul waréa; kulla pitálman bon Biyuġbai nurúnba ġukilliko piriwál-ġél ta nurun kin.

³³ Ġukilléa nurúnba, ġatun ġuwa ġukillikanne: umulla nura yinuġ nurúnba, keawai koa korokál katéa-kún, porrólkan ta moroko ka ba kakilliko ka korien kakilliko, keawai ba unta ko uwa korien mankiye, ġatun keawai ba yarakai puntaye.

³⁴ Wonnun ta nurúnba tullokan, untabo kánun nurúnba búlbúl yantibo.

³⁵ Ġirullia nura winnal nurúnba, ġatun nurúnba kaibuġ winabunbilla;

³⁶ Ġatun nurabo yanti kiloa kúri ba mittillin barúnba ko Piriwál ko willuġ-banún noa ba mankilliġél labiruġ; uwánun noa ba ba tanan ġatun wirrillinún, umánun ġaiya bon tanoa-kal-bo.

³⁷ Pitálmatoara kánun bara unnoa tara mankillikan, yakita Piriwál noa ba uwánun, noa ba barun kin nanún noa ba barun nakilli ta; wiyan baġ tuloa nurun, ġirullinún noa kótibo, ġatun yellawabumbéa barun takilli kolaġ, ġatun uwánun noa ġukilliko barun.

³⁸ Ġatun tanan uwánun noa ba, yakita buloara nakillikan ta, yakita ġoro ka nakillikan ta, ġatun nanún barun yantibo nakilli ta, pitálmatoara bara unnoa tara mankillikan.

³⁹ Ġatun ġurrulla unni, wiya noa ba kokera-tin-to ġurra pa, yakounta ba uwa pa mankiye na pa noa, keawai ġaiya kokera ġikoúmba potobunti pa.

⁴⁰ Yanti tin kauwa nura nakilliko; kulla noa Yinal kúri koba uwánun yakita kota korien nura ba.

⁴¹ Wiya ġaiya noa bon Peterko, Piriwál, wiyan bi unni parabol ġearunbo, ġa ġearun yantin?

⁴² Ġatun noa Piriwállo wiya, Gan-ke noa mankillikan murràrġ ġatun ġuraki, piriwállo noa umánun bon wiyellikan kakilliko kokera ko ġikoug ka ta ko, ġu-uwil koa noa takilliko yakita ġukilliġél la?

⁴³ Pitálmatoara kátan unnoa mankillikan, umánun noa ba ġikoúmba piriwál nanún ġaiya noa bon umulli ta yanti.

⁴⁴ Wiyan baġ tuloa, umánun bon noa wiyellikan kakilliko yantin tako.

⁴⁵ Wonto noa ba wiyánun gala mankilli-kan-to, búlbúl la, Emmoúmba piriwál minkin uwa korien; ġatun ġaiya noa búnkili kolaġ barun kúri mankillikan ġatun ġapal, ġatun takilli kolaġ, ġatun pittelli kolaġ, ġatun kuttawai kolaġ;

⁴⁶ Piriwál ġala koba mankillikan koba uwánun wal noa purreaġ ka na korien ta, ġatun yakita ġaiya kota korien ta bon, ġatun búnnún bon buloarikan, ġatun ġunún bon winta ġikoug kai barun kin ġurra korien ta.

⁴⁷ Ġatun unnoa mankillikan ġurran noa kotelli ta piriwál koba ġikoúmba, ġatun keawai uma korien, keawai noa uma pa yanti kotelli ta ġikoúmba, búnnún wal ġaiya bon kauwál-kauwál.

⁴⁸ Wonto noa ba niuwoa ġurra korien, ġatun yarakai umatoara yaki tin bún ba bon, búnnún wal waréa. Kulla bon ġupa kauwál, wiyapaiyanún wal kauwál ġikoug kinbiruġ; ġatun kúriko ġukulla kauwál, wiyellia kánun bara ġaiya kauwál-kauwál ġikoug kinbiruġ.

⁴⁹ Uwan ta baġ unni yukulliko koiyuġ ko purrai ta ko; minnuġ-bullinún baġ kauwa ba tanoa-kal-bo wirroġ-kulléa?

⁵⁰ Kulla tia korimullikanne emmoúġ kinba korimulliko; ġatun yakoai baġ kátan ġoloin koa ka-uwil kakilliko!

⁵¹ Kotan nura, uwa baġ ba pitál ġukilliko purrai ta ko? wiyan baġ ba, keawai; wonto ba ġurruġgurra kakilliko;

⁵² Kulla wal unti biruġ kánun kakilliko pente kokerá wakál la, ġurruġgurra biruġ, ġoro bulun kinbiruġ, ġatun buloara ġoro kabiruġ.

⁵³ Biyuġbai ġurruġgurra kánun yinal labiruġ, ġatun yinal biyuġbai tabiruġ; ġatun tunkan yinálkun tabiruġ, ġatun yinálkun tunkán tabiruġ, túngaikun bounnoun ba kurrinanbai tabiruġ, ġatun kurrinanbai bounnoun ba túngaikun tabiruġ.

⁵⁴ Ġatun noa barun kúri wiya, Nanún nura ba yareil wokka laġ punnál ba pulóġkulliġél lin, wiyánun ġaiya nura koiwon tanan ba; ġatun kauwa yanti.

⁵⁵ Ġatun kareawuġ ba kánùn, wiyellinún ġaiya nura, karol kánùn; ġatun yanti ġaiya kánùn.

⁵⁶ A nura nakoiyaye! natan nura tarkin moroko koba ġatun purrai koba; minariġ tin koa nura na korien unti yakita?

⁵⁷ Kauwa, kora koa nura kota ba nurun kinbiruġ tuloa?

⁵⁸ Uwánùn bi ba ġikouġ katoa bukkakan toa ġikouġ kinko wiyellikan tako, yapuġ koa nuiyellia bi bon, wamunbi-uwil koa biloa murroi kakilliko ġikouġ kinbiruġ; yutéa-kún koa biloa wiyellikan kauwál lako, ġatun wiyellikanto kauwállo wamunbinún biloa yarkan tako, ġatun yarakanto wupinún biloa jail kako.

⁵⁹ Wiyan banuġ, keawai bi waita uwa korien unta biruġ, ġukillinun bi ba lepton ta kirun waréa ta.

13

¹ KAKULLA bara unta yakita taraikan, wiya bon barun Galilaiakál, ġorog barúnba taroġkama Pilato-to thuhia barun barúnba.

² Ġatun noa Iéthuko wiyayelléün, wiyelliela noa barun, Wiya, nura kotellin unnoa tara Galilaiakál yarakai bara kakulla kauwál barun kinbiruġ Galilaiakál labiruġ, kulla barun ba mankulla unnoa tara?

³ Wiyan nurun baġ, Keawai; kulla nura keawai minki kátan, yantin ġaiya nura tetti tetti kánùn.

⁴ Ga barun etin ta wunkulléün kokera barán, ġatun tetti-tetti barun wirria, wiya, nura kotellin barun yarakai bara ba kakulla kauwál barun kúri kabiruġ kakillin Hierothalem ka?

⁵ Wiyan nurun baġ, Keawai; kulla nura keawai minki kátan, yantin ġaiya nura tetti-tetti kánùn.

⁶ Wiya noa unni yanti parabol: Taraikan ta kúriko wupéa yirriwilbin purrai ta ġikouġ ka ta; ġatun noa uwa yeai ko nakilliko, ġatun noa keawai ġaiya na pa.

⁷ Wiya ġaiya noa bon upullikan, Ela! ġoro ka wunál la unti, uwa baġ nakilliko yeai ko unti biruġ ko yirriwiltabin tako, ġatun keawai ġaiya baġ na pa; kólbúntilla unnoa barán; minariġ, tin unnoa kátan purrai ta?

⁸ Ġatun noa wiyayeléün, wiyelliela bon, Piriwál, kámunbilla unnoa unti wunál la, pinni-uwil koa baġ untoakál ko, ġatun konuġ koa baġ wupi-uwil;

⁹ Ġatun yeai ba kánùn, murraráġ ġaiya kánùn; ġatun ka korien ba, ġatun yukita ġaiya kólbúntinún; wal bi unni barán.

¹⁰ Ġatun noa wiyelliela wakál la thunagóg ka purreáġ ka thabbat ka.

¹¹ Ġatun, a! kakulla unta wakál nukuġ munni-lan bountoa ba kauwál-kauwál wunál étin ta, ġatun woinu bountoa, ġatun keawai bountoa kaiyu korien wokka-lan kakilliko.

¹² Ġatun nakulla noa ba Iéthuko bounnoun, kaaipa bounnoun noa, ġatun wiyelliela bounnoun, Nukuġ, ġintoa buruġ-kulléün woinu kabiruġ ġirouġ kinbiruġ.

¹³ Ġatun noa upilléün mātára bounnoun kin; ġatun tanoakal-bo bounnoun tuloa uma, ġatun bountoa pitálma bon Eloinúġ.

¹⁴ Ga-tun piriwállo thunagóg kako, wiyayelléün bukka-kan-to, kulla noa Iéthuko turon uma purreáġ ka thabbat ka, ġatun wiya barun kúri, Hek ta purreáġ ka umilliko kúri ko; unti tara purreáġ ka tanan uwolla turon umullilo, ġatun keawai thabbat ta purreáġ ka.

¹⁵ Piriwállo noa bon wiyayelléän ġatun wiyelliela, Ġintoa ġakoiyaye! wiya, yantinto nura buruġbuġġan ġikoumba boo ġatun athino, purreáġ ka thabbat ka, unta biruġ kokerá biruġ, yemmama-uwil koa kokoin kolaġ tettellico?

¹⁶ Ġatun keawai wal unni ġapal, yinálkun ta Abúramúmba, ġiratoara bounnoun Thatánto noa unni tara étin ta wunál la, buruġbuġgulliko yanti biruġ, unti thabbat ta purreáġ ka?

¹⁷ Ġatun wiya noa ba unni tara, koiyun bara ġaiya kátan yantin bukkamaiye ġikouġ kai; ġatun yantin kúri pitál kakulla yantin tin umatoarrin kauwál lin ġikouġ, biruġ.

¹⁸ Wiya ġaiya noa, Minariġ kiloa Piriwál koba Eloi koba? Ġatun yakoi kiloa paġgunbinún?

¹⁹ Yanti kiloa ta yeai ba mutard koba, mankulla kúriko, ġatun meapa purrai ta ġikouġ, kai ta; ġatun boaikulléün wokka laġ, ġatun kakulla kauwál kúlai; ġatun tibbin moroko tin yellawa wiran ta.

²⁰ Ġatun noa wiyéa-kún, Yakoi kiloa baġ tuġunbinún piriwál koba Eloi koba?

²¹ Yanti lebben kiloa, mankulla ġapallo ġatun yuropa ġoro ka ġukilligél la nulai ta, kakulla wal yantibo lebben kiloa.

²² Ġatun noa uwa kokeroa ġatun kauwál loa kokeroa, wiyatin, ġatun uwollin Hierothalem kolaġ.

²³ Wiya ġaiya bon wakálo, Piriwál, wiya, warai moron kakilliko? Ġatun noa wiya barun,

²⁴ Nuwolla pulóġkulli kolaġ tuloa tin yapuġ tin: kulla baġ nurun wiyen, kauwál-kauwálo nuwanún murrárag pulóġkulli kolaġ ġatun keawai wal kaiyu korien.

²⁵ Bouġkullinún noa ba kokeratin wokka laġ, ġatun wirriġbakulla pulóġkulligél, ġatun nura ġarokéa warrai ta, ġatun wirrilléun toto pulóġkulligél, wiyellin, Piriwál, Piriwál, umulla ġearun; ġatun noa wiyayellinún ġatun wiyánún, Keawaran baġ nurun ġimilli korien wonta biruġ wal nura:

²⁶ Wiyánún ġaiya wal nura, Takéun ġéen ġatun pittakéun ġirouġ kin mikan ta, ġatun ġintoa wiyakéun ġearun kin yapuġ ka.

²⁷ Wonto wal noa ba wiyánún, Wiyen baġ nurun, keawaran baġ nurun ġimilli korien, wonta biruġ wal nura; yuriġ tia uwolla emmouġ kinbiruġ, yantin nura yarakai umullikan.

²⁸ Unta ta wal tuġkillinún ġatun tirra-ġatpuntullinún, nanún ġaiya nura ba barun, Abáramnuġ, ġatun Itháknúġ, ġatun Yacóbnúġ, ġatun yantin propetnuġ, kakillin bara ba piriwál koba ka Eloj koba, ġatun nurunbo yuaipéa warrai tako.

²⁹ Ġatun bara uwánún muriuġ tin, ġatun krajin tin, ġatun kummarijin tin, ġatun pakajin tin, ġatun yellawánún wal piriwál koba ka Eloj koba ka.

³⁰ Ġatun, a! bara willuġ kátan, kabo wal bara willuġ kánún.

³¹ Unta purreáġ ka winta uwa Parithaij kabiruġ wiyellin bon, Yuriġ ba waita wolla unta biruġ, kulla noa Herodto biloa buúnún tetti.

³² Ġatun noa barun diyá, Yuriġ nura wolla, wiya-uwil koa bon unnoa alópék, A! paibuġġan baġ barun diabol, ġatun turon baġ uman buġġai ġatun kúmba, ġatun kúmba-ken-ta wal ġoloin tia kánún.

³³ Yantin tin uwánún wal baġ buġġai ġatun kúmba, ġatun kúmba-ken-ta; kulla wal keawaran wal wakál propet ka korien tetti Hierothalem kabiruġ.

³⁴ Yapallun Hierothalem, Hierothalem! búнкиye tetti wirriye barun propet, ġatun pintia barun tunuġ ko yupitoara ġirouġ kinko; murrin-murrin baġ kauma pa baġ barun wonnai tara ġiroumba, yanti kiloa tibbinto ba kauma-uwil yirriġ ka bara ka bounnoun ba waréa tara, ġatun keawaran nura kauma korien.

³⁵ A! nurúnba kokera kakillin mirrál kakilliko: ġatun baġ wiyen tuloa nurun, Keawai nura tia nanún, yakita ko kánún ba wiyánún wal nura ba, Pitálkámunbilla bon uwan noa ba yitirra Piriwál koba koa.

14

¹ ĠATUN yakita kakulla, uwa noa ba murrariġ kokerá piriwál koba ka Parithaij koba takilliko nulai ko purreáġ ka thabbat ka, tumiméa ġaiya bon bara.

² Ġatun, a! ġaroka ba kakulla wakál kúri kokoin-kan warakaġ.

³ Ġatun Iéthuko noa wiyayelléun wiya barun nomikoinuġ ġatun Parithaijnuġ, wiyelliela, Wiya, murrárag turon umulliko purreáġ ka thabbat ka?

⁴ Ġatun bara tullama pulli. Ġatun noa bon turon uma, ġatun wamunbéa bon;

⁵ Ġatun wiyayelléun noa barun, wiyelliela, Ġanto nurun kinbiruġ-ko puntimanún buttikaġ ba athino ba ġa boo ba nurúnba kirai ta, ġatun keawai ġaiya bon manún wokka laġ purreáġ ka thabbat ka?

⁶ Ġatun keawai bara bon wiyayelli pa unni tara.

⁷ Ġatun noa wiya wakál parabol barun ġala ko wiyatora ko, nakulla noa ba ġiriméa bara murrárag waiyakan; wiyelliela barun,

⁸ Wiyánún bin ba taraito kúriko uwa-uwil koa bi mankilli kolaġ nukuġ kolaġ, yellawa yikora wokka waiyakanto, mirka ta tarai kúri piriwál wlyatoara ta;

⁹ Ġatun noa ninwoa wiya biloa ġatun ġikouġ tanan uwolliko ġatun wiyelliko bin, Ġuwa bon ġali ko; ġatun ġintoa koijun bi ba kánún waita uwánún waiyakan kolaġ bará ka bo.

¹⁰ Wonto ba bin wiyánún ba, yuriġ bi yellawolli ta ka bará kako waiyakan kako; ġatun uwánún noa ba wiya biloa ba wiyánún biloa, Kóti, yuriġ wokka laġ uwolla: yakita ġaiya pitálmánún bin mikan ta barun kin tanún ba kunto ġirouġ katoa.

¹¹ Ġan umullinún ninwoa bo wokka kako, umánún wal bon bará kako; ġatun ninwoa umullinún niuwoa ba bará kako, umullinún wal wokka kako.

¹² Wiya ġaiya noa ġala wiya bon noa ba, Ġunún bi ba takilliko búlwára ka ġa yaréa ka, wiya yikora bi ġiromba kóti, ġa kótita, ġa porrólkan; wiyéa kánún bin ba bara, ġatun ġupaiyéa kánún bin yaruġ ka.

¹³ Wonto bi ba umánún takilliko, wiyella barun mirrál-mirrálkan, ġatun munni-munni-kan, ġatun wiir-wiirkan, ġatun munminkan:

¹⁴ Ġatun bin pitálmanún; kulla bara keawai ġupaiye korien yaruġ ka; kulla bin ġupaiyéa kánún yaruġ ka, yakita ba moron kánún murráráġ-tai tetti-tetti kabiruġ.

¹⁵ Ġatun wakál barun kinbiruġ yellawa ġikouġ kin takilliela, ġurra noa ba unni tara, wiya bon noa, Pitálmatoara noa tanún wal kunto piriwál lako Eloi koba ka.

¹⁶ Wiya ġaiya noa bon, Taraito kúriko wupéa kauwál takilliko yaréa ka, ġatun wiya barun kauwál-kauwál kuri:

¹⁷ Ġatun yarea ka yuka noa bon ġikoumba mankillikan, wiyelliko barun wiyatoara ko, Tanan; kulla yantin unnuġ tara wupea yakita.

¹⁸ Ġatun bara yantin wiyellan wakál-wakál ġakoiyellan. Kurri-kurrito wakálo wiya ġikouġ, Ġukilléun baġ winta purrai, ġatun waita wal baġ uwánún nakilliko ġala ko; wiyán biloa wamunbilliko tia.

¹⁹ Ġatun taraito wiyá, Ġukilléun baġ pente tumba boo buttikaġ, ġatun baġ waita uwan numulliko barun; wiyán biloa wamunbilliko tia.

²⁰ Ġatun taraito wiyá, Mankulla baġ nukuġ emmoúmba, yaki tin keawai baġ uwa korien.

²¹ Uwa ġaiya noa unni mankillikan, ġatun wiya bon piriwál ġikoumba unni tara. Wiya bon ġaiya noa kokeratinto bukka-kanto ġikoumba mankillikan, Yuriġ wolla kurrakai yapuġ koa kokeroa, ġatun yutilla barun tanan untiko mirrál-mirrál-kai, ġatun munni-munni-kai, ġatun wiir-wiir-kai, ġatun munmin-kai.

²² Ġatun noa mankillikanto wiyá, Piriwál, upatoara ta yanti bi ba wiya, ġatun kauwál-kauwál lako ka untiko.

²³ Ġatun noa bon piriwálo wiya mankillikan, Yuriġ, uwolla yapuġ koa ġatun koruġ koa, ġatun pirrirmulla barun tanan uwolliko, emmoúmba koa kokera warapa-uwil.

²⁴ Kulla baġ wiyán nurun, Keawai wal bara untoakálo wiyatoara nutunún emmoúmba kunto.

²⁵ Ġatun kúri kauwál-kauwál uwa ġikouġ katoa: ġatun noa willariġ, warkulléun, ġatun wiya ġaiya barun,

²⁶ Uwánún tia ba tarai kan kúri emmouġ kin, ġatun wareka korien ġikoumba biyuġbai ġatun tunkan, ġatun nukuġ, ġatun wonnai tara, ġatun kóti tara, ġatun wuġġunbai, kauwa, ġikoumba kata moron, keawai noa kánún emmoúmba wirrobullikan.

²⁷ Ganto-bo ba kurri korien ġikoumba talig-kabillikanne, ġatun uwolla emmouġ katoa, keawai noa kánún emmoúmba wirrobullikan.

²⁸ Ganto nurun kinbiruġ-ko, kotellin wittimulliko kokera, wiya, noa yellawánún kurri-kurri, ġatun tuigko umulliko, mirka keawai goloin witti korien?

²⁹ Mirroma, yukita wupéa noa ba tuġġa, ġatun keawai noa kaiyu korien goloin wittilliko, yantinto ba nanún béelmánún ġaiya bon,

³⁰ Wiyellinún, Ġali kúriko nutéa wittimulliko, ġatun kaiyu korien noa goloin wittimulliko.

³¹ Ġa, ġan piriwál uwánún noa ba wuruwai kolaġ, tarai ko piriwál ko, yellawa noa kurri-kurri, ġatun kotelliela, wiya, noa ba kaiyukan uwa-uwil koa dekem-millia to nuġgurrawa-uwil koa bon taimin to ke bith-dekem-millia to?

³² Ġa ba, kaloġ ka ba noa piriwál taraito, yuka noa wakál puntima wiyelliko pitál koa kakillai.

³³ Yanti kiloa, yantinto nurun kinbiruġ-ko wareka korien noa yantin ġikoumba, keawai noa kánún emmoúmba wirrobullikan.

³⁴ Pulli ta unni murráráġ; wonto ba pulli ka korien, yakoi kánún upilliko!

³⁵ Keawai murráráġ, korien ta purrai ko, ġa ba konuġġél ko; wareka ġaiya kúriko. Niuwoabo ġurreuġkan ġurrulliko, ġurrabilla bon.

15

¹ PAPAÍ ġaiya bara uwa ġikouġ kin yantin telónai ġatun yarakaiwilluġ, ġurrulliko bon.

² Ġatun koiya bara Parithaioiko ġatun ġarammateuko, wiyelliela, Unni kúri murráráġ korien, noa uman barun yarakai-willuġ ġatun tatan noa barun katoa.

³ Ġatun noa wiya barun unni parabol, wiyelliela,

⁴ Ġan kùri nurun kinbiruġ, hekaton ta ċipu ġikoúmba, wákál noa ba yuréa umámùn barun kinbiruġ, wiya, noa wunún barun nainty-nain ta koruġ ka, ġatun waita noa uwánùn na-uwil koa noa yuréa-matoara, kara-uwilli koa noa?

⁵ Ġatun karawolléún noa ba, wúnkilléún ġaiya noa bamirruġ ka ġikouġ kin, pitálla ba.

⁶ Ġatun uwa noa ba ġura kako, wiya noa barun kótita ġatun taraikan wiyellin barun, Pitállia kanwa emmouġ katoa; kulla baġ karawolléún ċipu ta emmoúmba unni, yuréa ba kakulla.

⁷ Wiyan baġ nurun, yanti kiloa pitál kánán kauwállan moroko ka ba minki noa ba wakál yarakaikan, keawai barun kai murráràġ-tai tin nainty-nain ta tin, minki korien.

⁸ Ġa wonnuġ-ke nukuġ púndol arguro ten ta bounnoun kinba, yuréa bountoa ba umánùn wakál púndol, wiya, bountoa wirroġ-banún kaipuġ ġatun wirrillinún wirrillikanneto kirra-kirra-uwilli koa bountoa?

⁹ Ġatun karawolléún bountoa ba, wiya ġaiya bountoa ba kóti-ta ġatun taraikan tuġko, wiyellin, Pitállia kauwa emmouġ katoa; kulla baġ karawolléún yuréa baġ ba umá.

¹⁰ Yanti kiloa, wiyan baġ, nurun, unnuġ, ta pitál kátan mikan ta aġelo ka Eloi koba wakál lin ba yarakai-willuġ minki kánùn.

¹¹ Ġatun noa wiya, Taraito kùriko yinal bula-buloara ġikoúmba:

¹² Ġatan mittiko bulun kinbiruġ-ko wiya bon biyuġbai ġikoúmba, Biyuġ, ġuwa tia winta tullokkan ka-uwil koa emmoúmba. Ġatun túnbilliela noa bulun tullokkan.

¹³ Ġatun keawai kauwál-kauwál, korien ta purreáġ ka yukita, kauma noa mittiko yinallo, ġatun waita noa uwa kalog koba, ġatun unta noa wari-wareka tullokkan ġikoúmba pittelligél la.

¹⁴ Ġatun wari-wareka noa ba kirun, kauwál kakulla unta kunto korien; ġatun tanoa-kál-bo kakulla ġaiya noa kapirrikan.

¹⁵ Ġatun uwa ġaiya noa umulliko kùri kako unta ko purrai ta ko; ġatun noa bon yuka ġikouġ, ka tako purrai tako ġiratimulliko buttikaġ, ko poràk ko.

¹⁶ Pitál ġaiya noa kakulla takilliko, ta-uwil ba buttikaġko: ġatun keawai kùriko bon ġupa.

¹⁷ Ġatun noa kakilliela ba niuwoabo, wiyelliela ġaiya noa, Kauwál-kauwála umullikan biyuġbai koba emmoúmba koba kunto kauwál barúnba takilliko ġatun ġukilliko, ġatun ġatoa kapirró wirribanbillin!

¹⁸ Bouġkullinún wal baġ, waita biyuġbai tako, ġatun wiyanún wal bon, Biyuġ, yarakai baġ umá mikan ta moroko ka, ġatun ġirouġ kin,

¹⁹ Ġatun keawai baġ murráràġ korien wiya-uwil koa tia ġiroúmba yinal yitirra: umulla tia wakál yanti umullikan ġiroúmba.

²⁰ Ġatun noa bouġkulléún, uwa ġaiya noa biyuġbai tako. Wonto noa ba kalog ka kauwál kakulla, nakulla noa bon biyuġbai-to ġikoúmba-ko, minki ġaiya noa kakulla, murrá ġaiya noa, puntimulléún ġaiya noa ġikouġ kin wuroka, ġatun búmbúmbea-kan ġaiya bon.

²¹ Ġatun noa bon yinallo wiyá, Biyuġ, yarakai baġ umulléún mikan ta moroko ka ġatun ġirouġ kin, keawai baġ murráràġ korien wiya-uwil koa tia ġiroúmba yinal yitirra.

²² Wonto noa ba biyuġbaito wiya barun mankillikan ġiroúmba, Mara unnoa-unnuġ upilligél, ġatun upilla bon konén kako, ġatun upilla riġ ġikouġ kin máttára, ġatun upilla bon tuġġanoġ yulo ka ġikouġ kin:

²³ Ġatun mara tanan untiko buttikaġ italo ġiratimatoara kipai, ġatun turulla; tamunbilla ġearun, ġatun pitál koa géen kauwál:

²⁴ Koito ba unni emmoúmba yinal tetti kakulla, yakita ġaiya noa moron kátan: ġarawatilléún noa, ġatun yakita bummilléún ġaiya bon. Ġatun pitál bara kakilli kolag.

²⁵ Unta ta ġarro ġikoúmba kakilliela upulligél la purrai ta; ġatun uwoilliela noa ba papai kokerá koba, ġurra noa tekki ġatun untelli ta.

²⁶ Ġatun noa kaaipa wakál mankillikan, ġatun wiya minnuġ-ban ġali tara minariġ tin.

²⁷ Ġatun wiya bon noa, Unni ta uwan ġiroúmba biġġai; ġatun ġiroúmba-ko biyuġbaito tura ġiratimatoara buttikaġ italo kipai ta, kulla wal pitál noa ġikouġ kai moron tin kátan.

²⁸ Ġatun noa niuwara kakulla, keawai noa murrú kolag uwa pa; yaki tin noa biyuġbai ġikoúmba uwa ġatun pírriarla bon.

²⁹ Ġatun noa bon wiyayelliela ġikoúmba biyuġbai, Ela! kauwál-kauwálla wunálla umala baġ ġirouġ; keawai baġ ġiroúmba wiyellikanne umá korien; ġatun keawai bi tia ġupa waréa buttikaġ kid, pitál koa tia ka-uwil baraj emmoúmba kótita:

³⁰ Wonto ba tanoa-bo ġiroúmba yinal uwa ġali, wari-wareka ġiroúmba tullokkan yarakai-willuġ koa ko ġapal loa, tura ġaiya bi ġikouġ buttikaġ italo ġiratimatoara.

³¹ Ġatun noa wiya bon, Yinal, yellawan bi emmouġ kin yantikatai, ġatun yantin unni tara emmoúmba ġirouġ kin kánun.

³² Murráráġ ta kakulla takilliko ġatun pittelliko; koito ba unni ġiroúmba umbearakóġ tetti kakulla, ġatun moron katéakan; ġatun ġarawatilléun, ġatun bummilléun bon yakita.

16

¹ ĠATUN noa wiya barun ġikoúmba wirrobullikan, Untoa ta tarai ta wakál kúri tullokkan porrólkan, mankillan piriwál ġikoúmba; ġatun wiyayéma bon ġikouġ wareka noa ġikoúmba tullokkan.

² Ġatun noa wiya bon, wiyelliela, Yakoa baġ ġurra ġirouġ kinba? wiyella bi tia minariġ bi ba umullliela; keawai bi kara kánun umullikan.

³ Wiyelléun ġaiya noa mankillikan niuwoabo, Minnuġ, banún baġ? kulla wal lia piriwálla emmoúmba ko mantilléun keawai baġ mankillikan kánun; keawai baġ pinninún; koiyun baġ poiyelliko.

⁴ Ġali wal baġ umulliko, yipanún tia ba emmoúmba mankilligél labiruġ, wamunbi-uwil koa tia bara kóti ko kokerá ko.

⁵ Yanti ba wiya noa barun wiyatoara piriwál koba ġikoúmba, ġatun noa wiya wakál kurri-kurri ka, Minnan ba wiyapaiyéun emmoúmba piriwál koba?

⁶ Ġatun noa wiya, Hekaton ta wimbi ka karauwa. Ġatun noa wiya bon, Mara bi unni, yellawa kurrakái, upulla pentékonta koa ka-uwil.

⁷ Wiya ġaiya noa tarai, Minnan bi wiyapaiyéun piriwál koba? Ġatun noa wiyá, Hekaton ta wimbi wiet. Ġatun bon noa wiyá, Mara bi unni, upulla éty koa ka-uwil.

⁸ Ġatun noa piriwallo murráráġ bon wiya unnoa mankillikan yarakai ka, kulla noa umá ġurakito; kulla bara wonnai tara unti ko purrai tako barúnba willuġġél koba ġuraki bara, keawai bara wonnai kaibuġ koba.

⁹ Ġatun ġatoa nurun wiyan, Umulla nura bo kótita kakilliko tullo-yarakai tabiruġ; tetti nura ba kánun, wamunbilla ġaiya nurun kokerá yuraki ba kátan yanti-katai.

¹⁰ Niuwoa miroman ġali waréa ta, yanti miroman noa kauwál ġali ta; ġatun niuwoa yarakai-maye ġali waréa ta, yanti yarakaimaye ġali kauwál ta.

¹¹ Yaki tin keawai nura ba miroma pa tullo yarakai ta, ġanto wal nurun ġunún tullo tuloa ta miromulliko?

¹² Ġatun keawai nura ba miroma pa tarai koba, ġanto wal ġunún nurúnba kóti tako?

¹³ Keawai wal mankillikanto umánun buloara-bulun piriwál bula; kulla noa yarakai umánun wakál bon, ġatun murráráġ umánun tarai; ġa ba kánun noa wakálla, ġatun béelmánun bon tarai. Keawai nura kaiyu korien umulliko Eloj ko ġatun tullokkan ko yarakai ko.

¹⁴ Ġatun unni tara bara ġurra Parithaioiko, willirrikan bara kátan, ġatun bon bara béelma.

¹⁵ Ġatun noa barun wiyá, Kauwa murráráġ koa nura ka-uwil mikan ta barun kin kúri ka; wonto noa ba Eloito ġurran nurúnba búlbúl la ba; kulla unni tara murráráġ ta kátan barun kinba kári ko, yakaran ta kátan mikan ta Eloj kin.

¹⁶ Wiyellikanne-ta ġatun bara propet kakulla loanne noa ba paipéa; yaki tabiruġ piriál koba Eloj koba wiyabunbéa, ġatun yantin kúri waita-waitawolléun murrug kolaġ.

¹⁷ Ġatun moroko ta ġatun purrai ta kaiyukan kánun waita kolaġ, keawai waréa ta wiyellikanne koba ka korien kakilliko.

¹⁸ Ġanto ba warekullinún porikunbai ġikouúmba ġatun tarai búmbéa ka, yarakai búmbéa noa; ġatun ġanto ba buúmbinún warekatoara poribal tabiruġ, yarakai búmbéa noa.

¹⁹ Kakulla ta noa wakál porrólkan, upulléun noa ġorog-ġorog ko ġatun murráráġ ko kariġkareuġ ko, ġatun bon kakulla minnuġbo-minnuġbo kauwál takilliko ġatun pittelliko yantin ta pureaġ ka:

²⁰ Ġatun kakulla ta wakál poiyaye ġiakai yitirra Ladhara, wúnkulla bon ba yapuġġél ġikouġ ka ta, warapál mita-mitaġ,

²¹ Ġatun wiya bon ba mutuġ ko takilliko ġikouġ kai porroóbin tin takilligél labiruġ; ġatun warikál uwa bara, woatá ġaiya bon mita-mitaġ.

²² Yakita-kálai tetti kakulla poiyaye, ġatun kurriá bara bon aġelo-ko Abáram kinko parráġ kako: tetti ġaiya noa porrólkan kakulla, ġatun bon núlka.

²³ Ġatun noa unta koiyuġ ka hell ka bouġkulléún ġikoúmba ġaikouġ, kakilliela tirriki ka, ġatun nakilliela bon Abáramnuġ kalog ka, ġatun noa Ladharo parráġ ka kakilliela Abáram kin.

²⁴ Ġatun noa kaaibulléún, wiyelliela, Biyuġ Abáram, ġurrara tia kauwa, ġatun yukulla bon Ladharonuġ, kurrimulli koa noa kokoin to, ġatun moiya koa tia tálláġ wupi-uwil; kulla wal baġ kirrin kátan unti tirriki ka koiyuġ ka.

²⁵ Wonto noa ba Abaramko wiyá, Yinal, ġurrulla ġintoa yakita moron ta mantala murráráġ-tai ġiroúmba, wonto noa ba Ladharo yakaran mantala ġatun noa yakita pitál kátan, wonto bi ba kirrin kátan.

²⁶ Ġatun yanti umni ba, ġearun kinba willika ba pirriko wún-kulla; keawai uwánún untikál untoa kolag: keawai bara unta biruġ, uwánún untiko ġearun kinko.

²⁷ Wiya ġaiya noa, Wiyán banuġ, Biyuġ, yuka-uwil koa bon bintun kinko kokerá kolag:

²⁸ Kulla wal lia emmoúmba kotita pente; wiya-uwil koa noa barun yanoa bara ba tanan uwánún unti kolag tirriki-tirriki kako.

²⁹ Abáramko noa wiya bon, Mothé noa ġatun bara propet barun katoa ba; ġurrabunbilla barun.

³⁰ Ġatun noa wiyá, Keawaran, biyuġ Abáram; wakál ba uwolla barun kin unta biruġ tetti kabiruġ, ġurránún ġaiya wal bara.

³¹ Ġatun noa bon wiyá, Keawai bara ba ġurránún bon Mothénuġ ġatun barun propetnuġ; keawai wal bara ġurránún wakál ba paikullinún moron tetti kabiruġ.

17

¹ WIYA ġaiya noa barun wirrobullikan ġikoúmba, Kauwa yanti kánún bo ta wal yarakai; yapalla noa ġikouġ kinbiruġ yarakai tabiruġ!

² Murráí ka ba noa ġira-uwil kea kulleuġ koa bon tunuġ, ġatun wareka uwil koa bon korowa ka, unni noa yanoa yarakai umabunbi yikora unti tara biruġ wakál wonnai tara biruġ.

³ Yakoai nura kauwa: Kótiko ba ġirouġ, yarakai umánún ġirouġ ka to, wiyella bon; ġatun minki noa ba kánún, kámunbilla bon.

⁴ Ġatun kauwál-kauwál-la biloa ba yarakai umánún wakál la purreaġ ka, ġatun kauwál-kauwál-la biloa willariġ noa kánún wakál la purreaġ ka, wiyellinún biloa, Minki baġ kátan; kámunbinún wal binuġ.

⁵ Ġatun bon bara apothol wiyá, Piriwál, kauwál koa ġearúnba ġurrulli-ta ka-uwil kakilliko.

⁶ Ġatun noa Piriwálo wiyá, Ka ba nurúnba ġurrulli-ta yanti kiloa mitti yeai mutard koba, wiyella wal nura ba unni kulai thukamin, Wokka laġ bi kauwa wirrakan-bo, ġatun meapullia bi korowa ka; ġatun gala nurun ġurránún ġaiya wal.

⁷ Ġan nurun kinbiruġ-ko upullin purrai nurun ka to mankillikan-to, ġa tamunbin buttikaġ, wiyánún bon kabo, uwánún noa ba upulligġél labiruġ, Yuriġ bi wolla, yellowolliko ta-uwil koa?

⁸ Ġatun wiya bon noa wiyánún, Kurrakai umulla ta-uwil koa baġ, ġatun ġirullia bi ġintoabo, ġatun mara-uwil koa bi tia ta-uwil koa baġ ġatun pitta-uwil; ġatun willuġ ġaiya bi tanún ġatun pittánún?

⁹ Wiya noa, wiyapaiyéún bon mankillikan, koito noa ba uma unni tara wiya bon ba? Kotan baġ kearan.

¹⁰ Yanti nura wiyella, umánún nura ba yantin unni tara wiyatoara nurun, Umullikan ġéen murráráġ korien kátan; umá ta ġéen unni wiyatoara umulliko ġearun.

¹¹ Ġatun yakita kakulla, uwolliela noa ba Hierothalem kolag, uwa willi koa noa Thamaria koa ġatun Galilaia koa.

¹² Ġatun noa uwolliela ba tarai toa kokeróa, nuġgarawa bon bara kúri ten ta purrul-wommun-wommun, ġarokéa kalog ka;

¹³ Ġatun bara paibuġġa pulli, ġatun wiya Iéthu, Piriwál, ġurráramulla ġearun.

¹⁴ Ġatun nakulla noa barun, wiya barun noa, Yuriġ nura wolla, túġunbillia nura barun kin hiereu ko. Ġatun yakita kakulla, uwolliela bara ba, turon bara kakulla tanoa-kál-bo.

¹⁵ Ġatun wakálo barun kinbiruġ-ko, nakilléún noa ba turon noa kakulla, willuġbo noa uwa, ġatun kaaipulléún noa wokka, pitálmulliea bon Eloinuġ,

¹⁶ Ġatun puntimulléun noa barán goara ko ġikouġ kin tinna ka, murráràġ noa bon wiyelléun; ġatun noa Thamaria-kál.

¹⁷ Ġatun noa Iéthuko wiyayelléun, wiyelliela, Wiya, ten ta turon kakulla? ġa wonnuġ-ke bara taraikan nain ta?

¹⁸ Keawai bara willuġ pa ba pitálmulliko bon Eloinuġ, wakál ba noa unni ġowikan ko.

¹⁹ Ġatun noa wiya bon, Bouġkullia, yuriġ bi wolla; ġirouġ ka ba ko ġurrulli biruġ ko turon bi kátan.

²⁰ Ġatun wiya bon ba Parithaioiko, yakounta-ke paipinún piriwál koba Eloi koba, wiyayelléun noa barun, wiyelliela, Tanan uwan piriwál koba Eloi koba keawai na korien.

²¹ Keawai bara wiyánun wal, A unni ta! ġa unta ta! kulla, a! piriwál koba Eloi koba murrug kaba kátan nurun kinba.

²² Ġatun noa wiya barun wirrobullikan, A! purreáġ ta wal kánun, na-uwil koa nura wakál purreáġ Yinal koba kúri koba, ġatun keawai wal nura nanún.

²³ Ġatun bara nurun wiyánun wal, Na-uwa unni; ġa, na-uwa unnuġ: yanoa barun uwa yikora, wirroba yikora.

²⁴ Yanti kiloa pirruġgun-to uwan tarai tabiruġ ko moroko biruġ ko, tarai ta kako moroko kako; kauwa yanti kiloa wal kánun Yinal kúri koba purreúġ ka ġikouġ ka ta.

²⁵ Ġatun kurri-kurri ta bon umánun minnuġbo-minnuġbo, ġatun warekatéa wal bon ġali koba willuġġél koba.

²⁶ Ġatun yakita ba kakulla purreáġ ka Noe-úmba ka, yanti bo ta wal kánun purreáġ ka Yinal koba kúri koba.

²⁷ Takillala bara, pittellala bara, búmbillala bara nukuġ, ġukillala búmbilli ka, yakita purreáġ ka kakulla noa ba Noe uwa murrariġ murrinauwai ka, ġatun tunta-tunta kakulla, ġatun kirun ġaipa barun nuropa.

²⁸ Ġatun yanti yakita ba kakulla purreáġ ka Lot-úmba, takillala bara, pittellala bara, wirrillala bara, ġukillala bara, meapala bara, wittiala bara;

²⁹ Wonto ba yakita unta purreáġ ka Lot noa uwa Thodóm kabiruġ, patéa ġaiya koiyuġ-ko ġatun brimton-ko wokka tin moroko tin, ġatun kiyupa barun yantin kirun tetti-tetti.

³⁰ Yanti kiloa kánun yakita purreáġ ka paipinún noa ba Yinal kúri koba.

³¹ Unta yakita purreáġ ka kátan noa ba wokka kokerá, ġatun ġikoúmba tullockan murrug kaba kokerá ba, keawai bon uwabunbi yikora barán mankilliko tullockan ko; ġatun kátan noa ba upulligél laba, keawai bon uwabunbi yikora willuġ, kolaġ.

³² Kotella bounnoun kai nukuġ Lot-úmba tin.

³³ Ġanto ba ġikoúmba moron mirománun moron kakilliko, woġúntinún wal noa; ġatun ġanto ba woġúntinún ġikoúmba moron, kánun wal moron kakilliko.

³⁴ Wiya nurun baġ, yakita unta-unta tokoi ta buloara ta kánun birrikilligél la wakál la; manún wal wakál, ġatun tarai ġaiya wunún.

³⁵ Buloara umullinún bula; manún wal wakál, ġatun tarai ġaiya wunún.

³⁶ Buloara katéa-kánun upulligél la; manún wal wakál, ġatun tarai ġaiya wunún.

³⁷ Ġatun wiyelléun bon bara, wiyelliela, Piriwál, wonnuġ-ke? Ġatun noa wiya barun, Unta wonto ba katéa-kánun murrin ta, unta kolaġ ba kautillinún bara porowi.

18

¹ ĠATUN noa wiya barun wakál parabol, wiya-uwil koa bon bara kúriko Eloinuġ, ġatun yari koa bara kaiyaléa-kún;

² Wiyelliela, Unta ta kokerá tarai ta wakál wiyellikan piriwál kakulla, kinta korien kakulla noa bon Eloi kai, ġatun keawai noa tuma korien barun kúri:

³ Ġatun kakulla wakál mabogun unta kokerá; ġatun bountoa uwa ġikouġ kin, wiyelliela, Timbai kakillia tia emmoúmba bukkakaye.

⁴ Ġatun keawai wal noa ġurra pa kabo kakullai tako; wonto noa ba yukita wiya ġikouġ kinko minki ka, Keawai baġ kinta korien bon Eloi kail kátan, ġa keawai kúri tuman korien;

⁵ Kulla bountoa tia unni mabogunto pirralman, ġatoa timbai kánun bounnoun kin, murrin-murrin koa bountoa tia uwa-uwil kumburrobawanl bountoa tia.

⁶ Ġatun noa Piriwállo wiya, Gurrulla bon unni yarakai wiyellikan piriwál wiyan ba.

⁷ Ġatun wiya noa Eloito timbai katillinún barun ġikoúmba ġirimatoara bara wiyan bon purreáġ ka ġatun tokoi ta, ġurralin noa barun wiyelli ta kaloġ tinto?

⁸ Wiyan nurun baġ, timbai wal noa katillinán barun kurrakai. Wonto noa ba uwánun wal Yinal kúri koba tanan, wiya, noa nanún ġurrullikanne purrai taba?

⁹ Ġatun noa wiya barun unni parabol tarai tako kotelléun bara ba murràràġ-tai barabo, ġatun yarakai bara kotellin taraikan:

¹⁰ Buloara-bula kúri uwa hieron kolaġ wiyelliko: wakál la noa Parithaio ġatun tarai ta teloné;

¹¹ Ġarokéa noa Parithaio ġatun noa yanti wiyelliela niuwoabo ġiakai: A Eloi! pitálman baġ ġirouġ, kulla baġ ka korien yanti tarai ba kátan, bara kau-maye, tuloa uma korien mankiye nukuġ ka, ġa ka korien baġ yanti unni noa ba telóné:

¹² Ta korien baġ buloarakál kátan wakál la thabbat biruġ ka, ġutan baġ winta untikál emmouġ kai yantin tabiruġ.

¹³ Ġatun noa telóné ġarokilliela ba kalog ka, keawai noa ġaikug ka wokka laġ na pa moroko koba, wonto noa ba minki motilliela wiyelliela ba, A Eloi! miromulla bi tia, yarakai baġ ba kátan.

¹⁴ Wiyan nurun baġ, unni noa kúri uwa barán kokerá koba ġikouġ ka tako ġurrámatoara, keawai tarai ta: kulla yantin bara piriwál-buntelliko, kánun wal bara koiyun-barátoaro; ġatun niuwoa bo koai-koai korien bon, umánun kauwál bon kakilliko.

¹⁵ Ġatun mankulla bara ġikouġ kinko wonnai tara numa-uwil koa barun noa: wonto ba nakulla bara ba wirrobullikanto, yipa bara barun.

¹⁶ Wonto ba noa Iéthuko wiya barun, wiyelliela, Wamunbilla barun wonnai tara emmouġ kinko, ġatun yanoa barun yipai yikora; kulla barun-kai-kál katéa-kánun piriwál koba Eloi koba.

¹⁷ Wiyan baġ tuloa nurun, Ganto ba ġurra korien piriwál koba Eloi koba yanti wonnai waréa ba, keawai wal noa pulóġkullinún unta kolaġ.

¹⁸ Ġatun taraito umullikanto piriwállo wiya bon, wiyelliela, Piriwál murràràġ-tai, minnuġ-bullinún baġ moron kakilliko yantikatai?

¹⁹ Ġatun noa Iéthuko wiya bon, Minariġ tin bi tia wiyan murràràġ-tai emmouġ? keawai wal wakál murràràġ-tai, wonto noa ba wakálbo, Eloi ta.

²⁰ Ġurran bi yantin wiyellikanne, Yanoa manki yikora nukuġ taraikan koba, Yanoa búнки yikora tetti, Yanoa manki yikora, Yanoa nakoiya yikora, Ġurulla bon biyuġbai ġatun tunkán ġiroúmba.

²¹ Ġatun noa wiya, ġurra baġ unni tara wiyellikanne yakikalai tabiruġ, wonnai baġ ba kakulla.

²² Ġatun yakita ġurra noa ba Iéthuko unnoa tara, wiya bon noa, Wakál unnoa-unnug uma korien bi ba; ġukillia yantin tullokan ġiroúmba, ġu-uwil koa barun mirrál ko, ġatun tullokan ġiroúmba kánun wal wokka ka moroko ka; ġatun kaai, wirroba-uwil koa bi tia.

²³ Ġatun ġurra noa ba unni, minki noa kakulla kauwál; kulla noa porrol kakulla kauwálkan.

²⁴ Ġatun noa ba Iéthuko nakulla bon minki noa ba kakulla kauwál-lan, wiya ġaiya noa, Pirral ta pulóġkulliko bara tullokan ta ba piriwál koba kako Eloi koba kako!

²⁵ Kamel noa kaiyukan kátan pulóġkakilliko tiġkuġkoa ko aku lako, keawai porrolkan pulóġkakilliko piriwál koba kako Eloi koba kako.

²⁶ Ġatun bara ba ġurrá, wiya bara, Ġan-ke wal moron kánun kakilliko?

²⁷ Ġatun noa wiyá, Unni tara kaiyu korien kúri ko umulliko, kaiyu-kan-to Eloito noa umulliko.

²⁸ Ġatun Peterko noa wiyá, Ela! wúnkulla géen yantin ta, ġatun wirroba géen bin.

²⁹ Ġatun noa wiya barun, Wiyanún baġ tuloa, Niuwoa wareka kokera ġikoúmba, ġa biyuġbai, ġa tunkán, ġa ġapal, ġa wonnai, ġikouġ, kinko piriwál koba tin Eloi koba tin,

³⁰ Mánun wal noa kauwál unti yakita, ġatun untoa tarai ta purrai ta tanan kakilliko, moron noa kánun yanti-katai.

³¹ Mankulla ġaiya noa barun dodeka ta wirrobullikan, ġatua wiya barun, A! waita géen wokka kolaġ Hierothalem kolaġ, ġatun yantin tara wiyatoara propet to ġikouġ, kai Yinal lin kúri koba tin kánun wal umatoara kakilliko.

³² Ġatun bon ġunún wal barun kin ethánékál kinko, ġatun bon bukka-manún wal, ġatun karaġkobinún:

³³ Ġatun wéłkorinún wal bara bon, ġatun wal bon wirrinún; ġatun kúmba-ken-ta bouġkullinún ġaiya noa willuġbo.

³⁴ Ġatun keawai bara ġurrapa unni tara wiyatoara: ġatun unni wiyellikanne yuropa barun kai, keawai bara ġurrápa unni tara wiyatoara.

³⁵ Ġatun yakita kakulla, uwolliela noa ba papai Yeriko ka, wakál munmin kúri yellawolliela yapuġ ba bitta ka, poiyeilliela:

- ³⁶ Ġatun ġurrullielna noa barun konara yapuġ koa, wiya noa minariġ unni?
³⁷ Ġatun bara bon wiyá, Uwan noa Iéthu Nadharet-kál.
³⁸ Ġatun noa kaaipulléun, wiyellielna, Ela Iéthu! yinal Dabidúmba, ġurrára-mulla bi tia.
³⁹ Ġatun bara uwa ġanka, wiya bon koiyelli koa noa: wonto noa ba butti paiyelléun, Yinal Dabidúmba ġintoa, ġurrára-mulla bi tia.
⁴⁰ Ġatun ġarokéa noa Iéthu, ġatun wiya bon yutilliko bon ġikouġ kinko; ġatun uwa noa ba papai, wiya bon noa,
⁴¹ Wiyellielna, Minnuġ-bulliko bi tia wiyán? Ġatun noa wiyán, Piriwál, namunbilliko tia umulla.
⁴² Ġatun noa Iéthuko wiya bon, Kámunbilla bin nakilliko; ġiroumba tin ġurrulli tin moron uma.
⁴³ Ġatun noa tanoa-kál-bo nakulla, ġatun bon noa wirropa, pitálmullielna bon Eloinúġ; ġatun yantin unni kúri nakulla bara ba, pitálma bon Eloinúġ.

19

- ¹ ĠATUN noa Iethu uwa Willi koa Yeriko koa.
² Ġatun kakulla untakál wakál kúri ġiakai Dhakké yitirra, piriwál telónékál noa kakulla, ġatun noa porrólkan.
³ Ġatun noa numéa nakilliko Iéthunuġ, ġán noa ba; ġatun noa keawai, kulla konaró núntima, kulla noa waréa ġoiyoġ.
⁴ Ġatun noa murra ġanka, ġatun noa kulliwa wokka-laġ, kúlai tin nakilliko bon, kulla noa unta kolaġ uwolli kolaġ.
⁵ Ġatun Iéthu noa ba uwa untako, nakulla noa wokka-laġ, ġatun bon nakulla, ġatun bon wiyá, Ela Dhakké! tanan kurrakai tirabulla, kulla buġġai koa baġ yellawánun ġirouġ ka ta kokerá.
⁶ Ġatun tiraba noa kurrakai barán, ġatun pitál ma-uwa bon.
⁷ Ġatun nakulla bara ba, wiyellan niuwarakan bara yantinto, wiyellielna, Waita noa uwa yarakai toa kóti kakilliko.
⁸ Ġatun noa Dhakké ġarokéa, ġatun wiya bon Piriwálnuġ, Ela Piriwál! winta baġ ġutan emmoumba tullokán kabiruġ mirrál kai ko; ġatun mankulla baġ ba tullokán taraiKAN tabiruġ yaki tin ġakoiyaye tin, wupinún ġaiya bon baġ willuġbo warán tako.
⁹ Ġatun noa Iéthuko bon wiyá, Tanan uwa moron unti buġġai purreaġ ka unti ko kokera ko, kulla noa kátan yinal ta Abáramuúmba.
¹⁰ Kulla Yinal kúri koba uwa tiwolliko ġatun tumulliko wogúntitoara ko.
¹¹ Ġatun ġurra bara ba unni tara, wiyéakan butti noa ġatun wiya wakál parabol, kulla noa papai ta ba Hierothalem ka, ġatun kulla bara kota paipillinún piriwál koba Eloi koba tanoa-kál-bo.
¹² Yaki tin noa wiyá, Tarai ta piriwál uwa tarai tako purrai tako kalog kako, mankilliko ġikouġbo piriwálkanne-ta, ġatun willuġbulliko.
¹³ Ġatun wiya noa barun ġikoumba mankillikan ten ta, ġatun ġukulla noa barun kin mina ta ten ta, ġatun wiya barun, Miromulla uwánun baġ ba willuġbo.
¹⁴ Wonto ba ġikoumba-ko konara niuwama bon, ġatun yuka bon puntimai ġikouġ, wiyellielna, Keawai wal noa unni piriwál katillinún ġearun.
¹⁵ Ġatun kakulla yakita, willuġ ba noa ba, mantoara piriwálkoba, wiya ġaiya noa barun unnoa mankillikan ġán kin noa ba ġukulla money, tanan ġikouġ kin, ġurra-uwil koa noa minnan barun kinba ġutoara ġukilli tabiruġ.
¹⁶ Tanan ġaiya uwa kurri-kurri wakál, wiyellielna, Ela Piriwál! ġiroumba ta mina unni wittia kauwál ten mina ta.
¹⁷ Ġatun bon noa wiyá, Kauwa yanti, ġintoa mankillikan murraráġ; kulla bi miroma unnoa waréa ta, kaiyukan bi kanwa ten ta kokera.
¹⁸ Ġatun tarai uwa, wiyellielna, Ela Piriwál! ġiroumba ta mina unni wittia kauwál pente mina ta.
¹⁹ Ġatun noa wiya ġaiya bon, Kauwa bi kaiyukan pente ta kokera.
²⁰ Ġatun tarai uwa, wiyellielna, Ela Piriwál! na-uwa unni ta mina ġiroumba, wúnkulla baġ ba koroka wurobilla:
²¹ Kulla baġ kinta kakulla ġirouġ kai, kulla bi bukka kauwál; mantan bi wokka-laġ keawai bi ba wunpa barán, ġatun kólbúntia bi unnoa keawai bi ba meapa ba.

²² Ġatun noa bon wiyá, ġirouġ kinbiruġ kóti ko kurraka ko wiyan pirriral-manún banuġ, ġintoa ta mankillikan yarakai. Ġurra bi tia bukka kauwál baġ; mantillin wokka-laġ keawai baġ wunpa barán, ġatun kólbuntillin unnoa keawai baġ ba meapa ba:

²³ Kora koa bi ġupa emmoúmba money ġukilligél lako, marauwil koa baġ emmoúmba kóti ġatun kopatoara ta, emmouġ ka ta uwolli ta?

²⁴ Ġatun noa wiya barun ġarokilliela bara ba taruġ ka, Mantillia unnoa mina unti biruġ bon, ġatun ġuwa bon gala ko tenkan ko ġikouġ.

²⁵ (Ġatun bara wiya bon, Piriwál, ten ta mina mantan noa).

²⁶ Wiyan nurun baġ, Yantinko barun mantan bara ba ġunún wal butti; ġatun keawaran noa ba, unnoa ta mantan noa ba mantillinún wal bon ġikouġ, kinbiruġ.

²⁷ Kulla bara unnoa emmoúmba niuwa-maye, keawai bara emmouġ kánún bi ba piriwál barun, mara barun, bú-uwil koa barun emmouġ kin mikan ta

²⁸ Ġatun wiya noa ba unnoa, waita ġaiya noa ġanka uwa wokka-laġ Hierothalem kolaġ.

²⁹ Ġatun kakulla yakita, uwa noa ba papai Bethábage tako ġatun Bethany tako, bulkára ta ġiakai yitirra Elaión ka la, yakunbéa noa buloara-bulun ġikoúmba wirrobullikan,

³⁰ Wiyelliela, Yuriġ nura wolla kokeraá ko kaiyin tako; uwollinún nura ba untariġ, nanún ġaiya nura wirritoara waréa buttikaġ keawai yellawa pa kúri bulka ka: buruġbuġgulla unnoa, ġatun yemmamulla untiko.

³¹ Ġatun tarai-kan-to ba wiyánún, Minariġ tin nura unnoa ta buruġbuġgan? ġiakai nura wiyella bon, Kulla noa Piriwálo wiyá.

³² Ġatun bara ba yukatoara, waita uwa, ġatun nakulla ġaiya bara yanti noa ba wiya barun ba.

³³ Ġatun buruġbuġgullielia bara ba unnoa waréa buttikaġ, ġikoúmba-ko wiya barun, Minariġ tin nura buruġbuġgan unni waréa buttikaġ?

³⁴ Ġatun bara wiyá, Piriwálo noa wiya ġala.

³⁵ Ġatun bara yemmama bon kinko: ġatun bara wupéa barun ba kirrikin bulka ka buttikaġ ka, ġatun wupéa bon bara Iéthunuġ wokka ka.

³⁶ Ġatun uwolliela noa ba, wupéa bara yapuġ ka kirrikinkan nurúnba.

³⁷ Ġatun uwa noa ba papai, bará ka Elaión ka ba koba bulkára koba, yantin konara wirrobullikan pitál ġaiya kakulla, ġatun pitálmullielia bon Eloinuġ kauwál lo pulli to, yantin tin kauwál lin uma ba nakulla bara ba;

³⁸ Wiyelliela, Pitálmabunbilla bon Piriwál ta uwan noa ba Yehóa-úmba koa yitirroa: pital-kámunbilla moroko ka, ġatun killibinbin kámunbilla wokka ka.

³⁹ Ġatun winta-ko Parithaioi kabiruġ konara biruġ wiya bon, Piriwál, koawa bi barun ġiroúmba wirrobullikan.

⁴⁰ Ġatun noa wiyayelléun barun, wiyelliela, Wiyan nurun baġ, wiya, bara ba kaiyellinún mupai, kaibullinún wal ġaiya unni tara tunuġ tanoa-kál-bo.

⁴¹ Ġatun uwa noa ba papai, nakulla noa kokera kariġ, ġatun noa tuġkillimilléun ġalora rin,

⁴² Wiyelliela, Ġurrapa bi ba, ġintoa ta, unti purreaġ ka ġirouġ ka ta unni tara pitál-kakilliko ġiroúmba ko! wonto ba yakita yuropa ta ġirouġ, kai nakilli tin ġaikúġ tin.

⁴³ Kulla purreaġ, ta kánún ġirouġ kin, bukka-kan-to ġirouġ wirrinún wal bara kirrai kirai-karai ġirouġ, ġatun karai-karai wirrinún ġirouġ, ġatun mirrámanún bin willi ka yantin ta kaiyinkaiyin ta,

⁴⁴ Ġatun pirikibunpinún bin purrai ta, ġatun ġiroúmba wonnai tara murrúġ kaba ġirouġ, kinba; ġatun keawai bara wupinún tunuġ tarai ta wokka ka; kulla keawai bi ba gurra pa yakita natala ba ġiroúmba.

⁴⁵ Ġatun noa uwa murrariġ kolaġ, ġatun yipa ġaiya noa barun ġukillikan, ġatun barun mankillikan unta biruġ;

⁴⁶ Wiyelliela barun, Upatoara unni, Emmoúmba kokera ta wiyelligél kokera; wonto ba nura uma unni wollo kakilliko barun nankiye-ko.

⁴⁷ Ġatun wiyelliela noa purreaġ ka yantin ta murrúġ ka hieron ka. Wonto ba piriwál hieru, ġatun bara ġárammateu, ġatun bara piriwál kúri koba, numa bara bon búnkili kolaġ;

⁴⁸ Yakoai bara ba umulliko ġatun keawai bara, kulla yantin ta kúri pitál kakillielia gurrulliko bon.

20

¹ ĠATUN yakita kakulla, wakál la tarai ta purreáġ ka, wiyelliela noa ba barun kùri ka, ġatun wiyelliela euáġelion, uwa ġaiya bon bara piriwál ġatun bara ġárammateu ġatun bara párethbuteroi,

² Ġatun wiya bon, wiyelliela, Wiyella ġearun, minariġ tin kaiyu tin umullia bi unni tara? ġa ġanto-ke noa bin unni ta kaiyu ġukulla ġirouġ?

³ Ġatun noa wiyayelléun, ġatun wiyelliela barun, Ġatoa wiyánun nurun unni ta wakál, ġatun wiyayelléa tia;

⁴ Korimullikanne-ta Ioanne-úmba, wiya, ta morokó kabiruġ, ġa kùri koba?

⁵ Ġatun bara wiyatan barabo, wiyelliela, Wiyánun ġéen ba, Morokó kabiruġ ta; wiyánun, ġaiya noa, Kora koa nura ġurrapa bon?

⁶ Kulla ġéen wiyánun ba, Kùri koba ta; yantinto ġaiya ġearun kùriko pintinun tunuġ ko: kulla bara kotan bon Ioannenuġ propet ta kakulla.

⁷ Ġatun bara wiyá, keawai bara ġurrapa wonta biruġ ta.

⁸ Ġatun noa barun léthuko wiya, Keawai baġ, wiyánun nurun minariġ tin kaiyu tin uman baġ unni tara.

⁹ Ġatun potopaiyá ġaiya non barun kùri wiyelliko unni-ta parabol: Taraito kùriko meapa wain-ġel la, ġatun wúnkulla barun kin upullikan ta, ġatun uwa ġaiya noa kalog kolaġ, yuraki.

¹⁰ Ġatun yakita poaikulléun ba, yuka noa bon wakál umullikan barun kin upullikan ta, ġu-uwil koa bara bon yeai wainġél labiruġ; wonto bara ba búnkulla bon, ġatun yuka bara bon waita yeai korien.

¹¹ Ġatun noa toanta yukéa-kan tarai umullikan: ġatun bara bon búntéa-kan yantibo, ġatun yarakai uma bara bon, ġatun bon bara yuka waita yeai korien.

¹² Ġatun noa toanta yukéa-kan ġoro-ta, ġatun bara bon mularéa-kan, ġatun wareka bara bon warrai tako.

¹³ Wiya ġaiya noa piriwállo wain-ġél koba, Minnuġ banun kan baġ? Yukánun wal baġ emmoúmba yinal pitálmatoara; mirka bara bongurránun, nanun bon bara ba.

¹⁴ Wonto bara ba upulli-kan-to nakulla bon ba, barabo ġaiya wiyellan, wiyelliela, Unni ta wúġgurra piriwál: kaai ġéen búwil bon, purrai koa ka-uwil ġearúnba.

¹⁵ Yanti bon bara wareka wain-ġél labiruġ, ġatun búnkulla ġaiya bon tetti. Minnuġ banun noa barun piriwállo wain-ġél koba ko?

¹⁶ Uwánun wal noa tanan búnkilliko barun upillikan-ko, ġatun ġunún wal wain-ġél taraikan ko. Ġatun ġurra bara ba unni, wiya ġaiya bara, Kámunbi yikora Eloito.

¹⁷ Ġatun noa barun nakilliela, ġatun wiyá, Minariġ-ke unni upatoara yanti, Tunuġ ta wareka wittilli-kán-to, unnoa ta katéakánun wokka ka waiyakan ta wolluġ?

¹⁸ Ġan-ba puntimullinún untoa tunuġ ka tiirpuntimullinún, wal; ġan kinba puntimullinún, minbinún wal bon muta-mutan.

¹⁹ Ġatun tanoa-kál-bo kota bara piriwállo hieruko ġatun ġárammateuko mankilliko bon; ġatun bara kinta kakulla konará tin; kulla bara ġurrá, wiya noa ba unni parabol barun kin.

²⁰ Ġatun bara bon tuminéa, ġatun yuka barun ġakoiyellikan, ġakogkilliko barunbo kùri murraráġ-tai, ġurra-uwil koa bara ġikoúmba wiyellikanne, yaki tin mara-uwil koa bara bon kaiyu kabo kobána kinko.

²¹ Ġatun wiya bon bara, wiyelliela, Piriwál, ġurran ġéen wiyán bi ba tuloa, kinta kora bi kauwa taraikan tin kùri kurrig tin, wonto bi ba wiyán tuloa wiyellikanne Eloí koba:

²² Wiya tuloa ta ġukilliko ġearun tullokan ġikouġ kin Kaithari kin, ġa keawai?

²³ Wonto noa ba ġurra ġakoiya barúnba, ġatun wiya barun, Yakoai nura tia numan?

²⁴ Túġunbilla tia wakál denari. Ġan kiloa unnoa ġoara ġatun upatoara unni ta? Wiyayelléun bon bara ġatun wiyelliela, Kaitharúmba ta.

²⁵ Ġatun noa wiya barun, Koito Kaithari kinko ġuwa Kaitharúmba ta, ġatun Eloí kinko unnoa tara Eloí-úmba ta.

²⁶ Ġatun keawai bara man pa ġikoúmba wiyelli-ta mikan ta barun kin kùri ka: ġatun mupai kakulla bara.

²⁷ Uwa ġaiya taraikan barun kinbiruġ Thadukaioi kabiruġ bara ġurramaiġaye moron ta katéa-kánun tetti kabiruġ; ġatun bara bon wiyá,

²⁸ Wiyelliela, Ela Piriwál Mothéto noa upa ġearun, Taraikan koba ba kóti tetti kánun ba porikunbai ġikoúmba ta, ġatun tetti noa ba kánun, wonnai korien, mara-uwil koa ġikoúmba kóti bounnoun ġikoúmt porikunbai ka-uwil koa wonnai ġikoúmba koti koba.

²⁹ Yakita ǵaiya warán kakulla kótita theben ta: ǵatun kurri biruǵ ko búmbéa porikunbai kakilliko, ǵatun tetti kakulla, wonnai korien.

³⁰ Ǵatun willi-kaba-ko deuteroto búmbéa bounnoun porikun bai kakilliko, ǵatun tetti noa kakulla, wonnai korien.

³¹ Ǵatun willi-kaba-ko trito-to búmbéa bounnoun porikunbai kakilliko; ǵatun yaki-bo thebento; ǵatun bara keawai wimba wonnai, ǵatun tetti bara kakulla.

³² Willuǵ ta tetti ba bountoa nukuǵ.

³³ Ǵanúmba barun kinba unnoa porikunbai kánún kakilliko moron ba katéa-kánún tetti kabiruǵ? kulla bara thebento bounnoun búmbéa porikunbai kakilliko.

³⁴ Ǵatun noa léthuko wiyayelléún, wiyelliela barun, Wonnai ta untikál búmbillan porikunbai ǵatun ǵukillaiko búmbilliko:

³⁵ Wonto ba bara murráǵ-tai kánún uwolliko unta kolaǵ tanai tako purrai tako, ǵatun moron kakilliko tetti kabiruǵ, keawai bara búmbúmbillan, keawai ǵukitan búmbilliko:

³⁶ Keawai wal bara tetti banún yukita; kulla bara yanti kátan aǵelo kiloa; ǵatun wonnai tara kátan Eloi-úmba, kátan bara wonnai tara ǵali koba moron kánún tetti kabiruǵ.

³⁷ Ǵatun Mothéko noa ba túǵaiya wakál la kúlai ta, bouǵbuǵga barun tetti-tetti kabiruǵ, wiya noa ba bon Yehóanuǵ, Eloi ta Abáramúmba, ǵatun Eloi ta Ithákúmba, ǵatun Eloi ta Yacobúmba.

³⁸ Keawai noa Eloi ta barúnba tetti-tetti koba, wonto ba barúnba moron koba; kulla yantin moron kátan ǵikouǵ kin.

³⁹ Taraito bara ǵárammateukállo wiya ǵaiya, Piriwál, murrá ǵaǵ bi wiyan.

⁴⁰ Ǵatun yukita keawai bara bon wiya pa kinta-kan-to.

⁴¹ Ǵatun noa barun wiyá, Yakoai bara wiya Kritht ta yinal ta Dabidúmba?

⁴² Ǵatun Dabidto noa niuwoabo wiyá, biblion kaba tehillim koba, Yehóako noa wiya bon Piriwál emmoúmba, Yellawolla bi túǵkaǵkeri ka emmouǵ kin,

⁴³ Uma-uwil koa baǵ barun bukkakan ǵikoumba yulogél ko kakilliko ǵikouǵ.

⁴⁴ Dabidto noa ba wiya bon Piriwál yitirra, yakoai ǵaiya noa yinal ta ǵikoumba?

⁴⁵ Wiya ǵaiya noa barun ǵikoumba wirrobullikan mikan ta yantin ta kúri ka,

⁴⁶ Yakoai nura barun kai ǵárammateu tin, pitál koa bara uwa-uwil kurrawitaikan, ǵatun umulliko ǵukilligél laba ko, ǵatun yellawolligél la wokka ka thunagóg ka, ǵatun piriwál-ǵél takilligél laba;

⁴⁷ Mantan bara kokera ba mabogun koba, ǵatun umánún wiyellikanne-ta kurra-uwai túǵunbilliko: yaki tin bara kánún kauwál tetti kakilliko.

21

¹ ǴATUN noa nakulla wokka-laǵ, ǵatun nakulla barun porrólkan wúnkilliela ǵutoara barúnba wúnkilligél la.

² Ǵatun noa nakulla tarai mabogun mirrálkan wúnkilliela bountoa lepto buloara unta ko taroǵ kako.

³ Ǵatun noa wiya barun, Wiyan baǵ nurun tuloa, ǵali mabogunto mirrállo wúnkulla kauwál ta bara yantin kearan.

⁴ Kulla yantin ǵali wúnkulla bara tullokkan barúnba kauwál labiruǵ ǵutoara Eloi koba ko: wonto bountoa ba bounnoun kinbiruǵ mirrál koba wúnkulla yantin tullokkan bounnounba.

⁵ Ǵatun winta koba wiyelliela hieron tin, umatoara unni korien tunuǵ ko murráǵ ko ǵatun ǵutoara, wiya noa,

⁶ Unni tara natan nura ba, uwanán ta purreáǵ kariǵ ka; korien ǵaiya ba wakál tunuǵ wokka-ka-wokka-ka, yantin wal warekullinún barán.

⁷ Ǵatun bara bon wiyá, wiyelliela, Piriwál, yakounta-ke unni tara kánún? ǵatun minariǵ túǵa kánún unni tara ba ǵaiya kánún?

⁸ Ǵatun noa wiyá, Yakoai nura, ǵakoiya kora koa nura ka-uwil; kulla kauwál-kauwállo tanan uwánún emmouǵ kin yitirra, wiyellinún, ǵatoa ta (Kritht ta); ǵatun papai ta kakillin; yanoa uwa yikora nura barun.

⁹ Ǵurránún ǵaiya nura ba wurawai kauwál ǵatun koakillai ta ba, kinta kora nura: kulla unni tara kánún wal kurri-kurri, kulla wirán keawai kánún kabo.

¹⁰ Wiya ǵaiya noa barun, Bara kúriko wuruwai wal kánún barun kúriko, ǵatun bara piriwál koba barun piriwál koba ko:

¹¹ Ġatun purrai tako pulululu kakilliko winta ka bo, ġatun kunto korien ta ko, ġatun munni kauwálkan; ġatun kinta nakilli tara ġatun kauwál kánun túġa morokó kabiruġ.

¹² W onto ba kurri-kurri ka unni tara ba kánun, manún wal bara máttároo nurun, ġatun yarakai nurun umánun, ġumullinún nurun thunagóg kako, ġatun jail ko, mantoaro nurun mikan ta ko piriwál lako, ġatun wiyellikan tako emmouġ kinko yitirra ko.

¹³ Ġatun unni ta kánun nurun túġa kakilliko.

¹⁴ Yanoa nura kota yikora minki ko, minariġ nura wiyayellinún.

¹⁵ Kulla baġ ġunún nurun kurraka ġatun ġuraki kakilliko, keawai wal yantin bara nurúnba bukka-kan-to kaiyu kánun wiyayelliko ġa pirral umulliko.

¹⁶ Ġatun nura ġakoiyellinún wal nurun biyuġbaito ġatun kóti tako kariġ ko, ġatun winta nurun kinbiruġ búnnún wal tetti barun kai.

¹⁷ Ġatun nurun yarakai umánun yantinto, emmoumbe tin yitirra tin

¹⁸ Wonto ba keawai wal wakál kittuġ ġikouġ, kinbiruġ wolluġ kabiruġ tetti kánun.

¹⁹ Murrái kakillikanne nurúnba ka, miromulla nura marai nurúnba?

²⁰ Ġatun nanún nura ba Hierothalem kirrai-kirrai ta ba konara ba ġurrulla papai ta ba ġaiya wari-warekulli ta ba unnuġ.

²¹ Murrabunbilla ġaiya barun Iudaia kaba waita bulkará kolaġ; ġatu uwabunbilla barun willi kaba waita warai tako; ġatun uwabunbi yikora barun tanan koruġ kaba untako.

²² Kulla yakita unti tara purreaġ ka bukka kakillikanne, kauwil koa yantin upatoara kánun wal kakilliko.

²³ Yapallun bara wonnaikun ġatun bara pittallikun, yakita ġaiya purreaġ ka! kulla wal kánun kauwál yarakai purrai ta, ġatun bukka unti yantin ta kúri ka.

²⁴ Ġatun bara tetti kapaiyinún yirra biruġ, ġatun barun yutinún wal mantoara kakilliko yantin tako purrai kariġ kako: ġatun Hierothalem wattawánun barán bara ethánékál-lo, yakita kalai tako barúnba koba ġoloin kánun ethánékál.

²⁵ Ġatun ġaiya kánun wal túġa punnál la, ġatun yellana ka, ġatun mirri ka; ġatun purrai taba yarakai ta barun kin kúri ka, ġatun kinta kauwál korowa ta ġatun bókkaloġ kólbilaġbullin;

²⁶ Kúri koba búlbúllo kotan kinta-kan-to, ġatun nakilli tabiruġ ġaloo tara kotanan ba uwánun purrai kolaġ; kulla wal barun tolománun wal kaiyukan ta moroko koba.

²⁷ Ġatun yakita ġaiya wal nanún Yinal ta kúri koba tanan uwollillún yareil loa kaiyu koa, ġatun killibinbin koa kauwál loa.

²⁸ Ġatun kánun ba unni tara paipinún, na-uwa wokka-laġ, ġatun wokka-laġ kauwa kia-kia nurúnba wolluġ; kulla tanan uwánun paipai nurúnba wommunbillikanne-ta.

²⁹ Ġatun noa wiya barun wakál parabol; Na-uwa kokuġ ta, ġatun yantin kulai ta;

³⁰ Paikullinún bara ba, nanún nura ġatun ġuurránun nura nurun kinbiruġ wunál kátan paipai taba.

³¹ Yaki kiloo nura, nanún nura ba unni tara paikulliko, ġurulla ġaiya nura piriwál koba Eloi koba kátan papai taba.

³² Wiyan tuloo nurun baġ, Keawai unni willuġġél tetti-tetti kánun, yakita-ko ġoloin ba kánun.

³³ Moroko ta ġatun purrai ta kánun wal waita uwánun, wonto ba keawai wal emmoumbe wiyellikanne unni tara keawai wal waita uwánun.

³⁴ Ġatun yakoai nura nurabo, kauwa ba yantin ta nurúnba búlbúl matayel koa katéa-kún ġatun kuttawaiban koa katéa-kún, ġatun umillikeún koa katéa-kún ġali koba moron koba, ġatun yanti ta purreaġ ka paipinún ġati nurun kin.

³⁵ Kulla pika kiloo yanti uwánun untoa purreaġ ka barun kin yellawan yintin ta yaki tin purrai ta.

³⁶ Tumimilla nura, ġatun wiyellia yanti-katai to, ka-uwil koa nura murraráġ kakilliko moron ko unti tara biruġ paikullinún wal ġatun ġarokilliko mikan tako yinal lako kúri koba ko.

³⁷ Ġatun purreaġ ka wiyelliela noa murrug ka hieron la; ġatun noa uwa waita tokoi ta, ġatun yellawa noa bulkára ġiakai yitirra Elaión ka la.

³⁸ Ġatun yantin bara kúri uwa ġorokan ta ġikouġ kinko hieron lako, ġurrulliko bon.

22

¹ YAKITA kakulla papai takillikanne nulai lebben korien koba, ġiak yittira Pathak.

² Ġatun bara piriwál hiereuko ġatun ġarammateuko nukilliela búnkilli kolaġ bon tetti wirrilliko; kulla bára kinta kakulla kúri tin

³ Pulóġkulléün noa Thatánto murrug ka bon Iudathkin, tarai yitirra ġiakai Ithákariot, wakál noa dodeka kabirug.

⁴ Ġatun noa waita uwá, ġatun wiyelliela barun piriwál hiereunug ġat barun kapátin, yakoi noa ba ġakoyánun bon barun kin.

⁵ Ġatun pitál kakulla, ġatun bara wiya ġukilliko bon arguro.

⁶ Ġatun noa wiyai, ġatun mittilliela noa ġakomulliko bon barun kin, yakita bara ba konara waita ġaiya uwa.

⁷ Kakulla ġaiya purreaġ nulai lebben korien ta, yakita Pathak bunnüm wal ba tetti.

⁸ Ġatun noa yuka Peternug ġatun Ioannenuġ, wiyelliela, Yuriġ uwolla umulliko Pathak ta, ta-uwil koa ġéen.

⁹ Ġatun bara bon wiyá Wonta-ke ġéen umánun?

¹⁰ Ġatun noa barun wiyá, A! nauwa nura, yakita uwánun nura ba kokerá kariġ ka, unta ġaiya nurun wakállo kúriko wimbi-kaba-kan-to kokoin-kan-to nuġgurra uwánun nurun; wirrobulla bula bon murrug kolaġ kokerá kolaġ unta-ko pulóġkullinun noa ba.

¹¹ Ġatun wiyánun nura bon kokeratin, Piriwallo wiyán bin, Wonnug waiyakan takilligél, untoa baġ ba tanun Pathak ta emmoúmba katoa wirrobullikan toa?

¹² Ġatun nurun túġkaiyánun wal noa kauwál ta waiyakan wokka kaba wupitoara: unnug umulla.

¹³ Ġatan bara waita uwa, ġatun nakulla bara unni tara yantin ba wiya barun: ġatun bara upéa Pathak ta.

¹⁴ Ġatun yakita kakulla hóra ba, yellawa noa barán, ġatun dodeka ta apothol ta ġikoug katoa.

¹⁵ Ġatun noa barun wiyá, Kauwál ta emmoúmba kotatoara takilliko unni Pathak ta nurun katoa, ta-uwil koa kurri-kurri tetti kolaġ ke baġ:

¹⁶ Kulla baġ wiyán nurun, Keawai wal baġ tanun unta-kál kabo ba kánun piriwál koba ka Eloí koba.

¹⁷ Ġatun noa mankulla wimbi, ġatun pitálma ġaiya noa, wiyelliela, Mara unni ġukillai koa nurabo:

¹⁸ Kulla baġ wiyán nurun, Keawai wal baġ pittánun yeai tabirug ampelo tabirug, kabo koa uwa-uwil piriwál koba Eloí koba tanan.

¹⁹ Ġatun noa mankulla arto ta, ġatun pitálma ġaiya noa, ġatun yiirbuġġa, ġatun ġukulla barun, wiyelliela, Unni ta emmoúmba murrin ġutoara nurun kin: umulla unni yanti gurrulliko tia.

²⁰ Yantibo wimbi takilli birug yaréa ka, wiyelliela, Unni wimbi ta wiyatoara ta buġgaikál emmoug kinbirug ġorog kiroapa nurun kai.

²¹ A! na-uwa, unni ta máttára ġikoúmba ġakoyelli-kan-to tia, emmoug katoa ba takilligél laba.

²² Yuna bo ta wal noa uwánun Yinal kúri koba, yanti wiyatoara; yapallun unnoa kúri ġakoyelli-kan-to bon ba!

²³ Ġatun bara wiyellan barabo, ġan-to barun kinbirug-ko umánun ta unni.

²⁴ Ġatun koakillan bara barabo, ġan-ke kánun piriwál barun kinbirug.

²⁵ Ġatun noa wiya barun, Bara ta piriwál ethánékál koba katilléün bara; ġatun bara ta katillikan ġiakai yitirra murroġ-tai.

²⁶ Wonto nura ba keawai yanti kánun; wonto noa kurrikóġ nurun kinba, kámunbilla bon yanti mitti; ġatun noa piriwál kátan, yanti umullikan ta.

²⁷ Wonnug-ke kauwál unnug, niuwoa yellawan noa ba takilli ta, niuwoa umánun noa ba? wiya, unni ta noa yellawollin ba takilli taba? wonto baġ ba kátan nurun kinba yanti niuwoa ba umullikan ta.

²⁸ Nura ta emmoug kin minkéa emmoug ka ta numatoara:

²⁹ Ġatun ġatan nurun baġ kakilliko piriwálgél lako, yanti tia emmoúmba Biyuġbaito ġukulla tia;

³⁰ Ta-uwil koa nura ġatun pitta-uwil emmoug ka ta takilligél la emmoug ka ta piriwálgél la, ġatun yellawa-uwil yellawolligél la piriwál koba ka, wiyellin barun konara dodeka ta Ithárael koba.

³¹ Ġatun noa piriwálo wiyá, Ela Thimon, Thimon! gurrulla, Thantánto noa wiyán bin mankilliko kirrai-kirrai koa biloa uma uwil yanti wiet kiloa:

³² Wonto baġ ba wiyelléün ġiroug kai ġurra-uwil koa bi; ġatun minki bi ba kánun, pիրalmulla ġaiya barun bi kóti ta ġiróúmba.

³³ Ġatun noa wiya bon, Piriwál, kátan baġ unni miriġil uwolli kolaġ ġikouġ katoa ko jail kolaġ ġatun tetti kakilli kolaġ.

³⁴ Ġatun noa wiyá, Wiyan banuġ, Peter, keawai wal mukka ko tibbinto wiyánun unti purreáġ ka, kurri-kurri ka bi ba ġakoyánun tia ġoro-ka ġimillin bi tia ba.

³⁵ Ġatun noa wiya barun, Yuka nurun baġ ba yinuġ korien, ġatun pika korien, ġatun tuġġanóġ korien, wiya, nura minariġ lo? ġatun bara wiyá, Keawai.

³⁶ Wiya ġaiya noa barun, Wonto ba yakita unti, niuwoa ba yinuġkan, mamunbilla bon unnoa, ġatun yanti pika; ġatun niuwoa yirra korien, ġumunbilla kirrikin ġikoumba, wakál koa noa ġukilli ko.

³⁷ Wonto baġ ba wiyan nurun, unni ta upatoara ka-uwil koa emmouġ kin kakilliko ġiakai, Tumbitoara noa barun kin yarakai willuġ ka: kulla unni tara emmouġ kin ba kakillinun ġoloin ko.

³⁸ Ġatun bara wiyá, Piriwúl, na-uwa unni tuloa buloara yirra. Ġatun noa wiya barun, Tantoa-bo-ta

³⁹ Ġatun noa uwa warrai koba, ġatun waita uwa uwolli kolaġ bulkára kolaġ Elaión ko la kako; ġatun ġikoumba wirrobulli-kan wirroba bon.

⁴⁰ Ġatun uwa noa ba unta, wiya ġaiya noa barun, Wiyella, keawai koa nura pulóġkulli korien yarakai kolaġ.

⁴¹ Ġatun noa waita uwa barun kinbiruġ yanti kiloa tunuġ koba pintia, ġatun waroġbugko upullin barán, ġatun wiyá,

⁴² Wiyelliela, Biyuġ, wiya bi unni wimbi manun emmouġ kinbiruġ: yanoa emmoumba kotellikanne ġiroúmba ta kámunbilla kakilliko.

⁴³ Ġatun paipéa wakál aġelo moroko kabiruġ pirrirmullin bon.

⁴⁴ Ġatun kirrinkan noa kanwákan, wiyelliela noa pirriral butti; ġatun ġikoumba kurrol upulléun barán purrai kolaġ yanti kiloa komonba kauwál ġorog koba.

⁴⁵ Ġatun bouġkulléun noa ba wiyelli tabiruġ, ġatun uwa ġikoumba tako wirrobullikan tako, nakulla ġaiya noa barun birriki birriki minkikan,

⁴⁶ Ġatun noa wiya barun, Minariġ tin nura birrikin? Bouġkullia ġatun wiyella, uwéa-kun koa nura yarakai kolaġ.

⁴⁷ Ġatun yakita wiyelliela noa ba, a! konara, ġatun noa yitirra ġiakai Iudath, wakál ta dodeka kabiruġ, uwa ġanka barun kin, ġatun uwa ġaiya noa papai Iéthu kin, búmbúmkakilliko.

⁴⁸ Wonto noa ba Iéthuko bon wiya, Ela Iudath! ġakoman binuġ Yinal kúri koba búmbuġgullito?

⁴⁹ Nakulla bara ba ġikouġ kinba minnuġ-bulli kolaġ, wiyabon bara, Ela piriwál! wiya, géen búntan yirra ko?

⁵⁰ Ġatun wakál barun kinbiruġ kunbuntéa wakál umullikan hiereu koba piriwál koba, ġatun kunbuntéa bon túġkaġ-keri ġurréuġ.

⁵¹ Ġatun Iéthuko noa wiyayelléun, ġatun wiyelliela, Kamunbilla nura unni. Ġatun bon noa numa ġurréuġ ġatun turon bon uméa-kan

⁵² Wiya ġaiya Iéthuko barun piriwál hiereu koba, ġatun barun kapátin hieron koba, ġatun barun ġarrokal, uwa bara ġikouġ kin, Wiya, nura tia uwan yanti mankiye ko yarakaikan ta, yirraġan ġatun kotarakan?

⁵³ Kakulla baġ ba nurun kin yanti-katai purreáġ ka hieron ka, keawai nura tia manpa máttárru: wonto ba unni yakita ta katan nurúnba ġatun kaiyukan tokoi tako.

⁵⁴ Mankulla ġaiya bara bon, ġatun yutéa bon, mankulla ġaiya bon kokera ko piriwál koba kako hiereu koba kako. Ġatun Peterko noa wirroba kalog kolaġ.

⁵⁵ Ġatun upilléun bara ba koiyuġ ko willi ka kokera, ġatun yellawa yantin, Peter ġaiya noa yellawa barun kin.

⁵⁶ Ġatun taraito murrakinto nakulla bon, yellawa noa ba koiyuġ ka ġatun pimmilliela bon pirrallo, ġatun wiya, Unni noa kúri kakulla ġikouġ katoa.

⁵⁷ Ġatun noa ġakoiya bon, wiyelliela, Ela murrakin! keawai bon baġ ġimilli korien.

⁵⁸ Ġatun toanta taraito bon nakulla, ġatun wiyelliela, Gintoa ta yanti bo barúnba. Ġatun noa Peterko wiyá, Kúri, keawaran baġ.

⁵⁹ Ġatun, yakita toanta, wakál hora ta yukita, taraito wiya pirralma wiyelliela, Yuna bo ta unni kuri kakulla ġikouġ katoa; kulla noa Galilaiaikal.

⁶⁰ Ġatun noa Peterko wiyá, Ela kúri! keawai baġ gurran yakoi bi ba wiyan. Ġatun wiyelliela noa ba, tanoa-kal-bo muk-kaka-ko ġaiya wiya tibbinto.

⁶¹ Ġatun noa Piriwál warkulléun, ġatun nakilléun bon Peternuġ. Ġatun Peterko noa ġurra wiyellita Piriwál koba, wiya bon noa ba ġiakai, Ġikoyánun wal bi tia kurri-kurri tibbinto muġkaka ko wiyánun ġoro-ka.

⁶² Ġatun Peter noa uwa warrai koba, ġatun tuġkilléun ġaiya noa kauwál.

⁶³ Ġatun bara kúriko mankulla bon Iéthunuġ béelma bon, ġatun búnkulla bon.

⁶⁴ Ġatun munmin bara ba upéa bon, búnkulla ġaiya bon bara ġoará, ġatun wiya bon, wiyelliela, Wiyella bi, ġanto-ke bin búnkulla?

⁶⁵ Ġatun kauwál-kauwál taraikan yarakai wiya bara ġikouġ kin.

⁶⁶ Ġatun purreaġ ba kakulla, kau-umullan ġaiya bara ġarrotai kúri koba, ġatun bara piriwál hieru koba, ġatun bara ġárammateu, ġatun yutéa ġaiya bon kau-umulligél lako barúnba tako,

⁶⁷ Wiyelliela, Kriht ta bi unni? wiyella ġearun. Ġatun noa wiya barun, Wiyánun nurun baġ ba, keawai ġaiya wal nura ġurránun:

⁶⁸ Ġatun wiyánun nurun baġ ba, keawai wal nura wiyaiyellinún tia, keawai wal nura tia wamunbinún.

⁶⁹ Kabo noa Yinal kúri koba yellawánun tuġkaġ ka kaiyukan ta Eloi koba ka.

⁷⁰ Wiya ġaiya bara yantinto, Yinal ta bi unni Eloi koba? Ġatun noa wiya barun, Wiyan nura ġatoa ta unni.

⁷¹ Ġatun bara wiya tantoa ta, Yanoa ġearun kin ġurrullikanto taraito? kulla ġéen ġurra ġéebo kurraka kabiruġ, ġikouġ kinbiruġ kóti kabiruġ.

23

¹ ĠATUN bara yantin konara bouġkulléun, ġatun yutéa bon Pilato kin.

² Ġatun bon bara pirralma, wiyelliela, Ġurra ġéen bon unni ġakoyelliela noa ba barun kúri willuġġél, ġatun wiyelliela, yanoa ġuki yikora tullokkan Kaitharinuġ, wiyelliela, niuwoa-bo-ta Kriht ta wakál ta Piriwál.

³ Ġatun Pilato-to wiya bon, wiyelliela, Ġa ġintoa ta Piriwál kátan barúnba Iudaioi koba? Ġatun noa wiyayelléun bon, ġatun wiyá, Ġintoa ta wiyán.

⁴ Wiya ġaiya noa Pilato-to barun piriwál hieru ġatun barun kúri, Keawai baġ ġurra pa yarakai unti kúri ka.

⁵ Ġatun bara bukka-buttibuġkéa, wiyelliela, Pirralman noa barun kúri wiyellin, yantin ta Iudaia ka, Galilaia tinto unti kolaġ.

⁶ Ġurra noa ba Pilato-to Galilaia ka, wiya noa, Unni kúri Galilaiakál?

⁷ Ġatun ġurra noa ba Herodúmba-kan noa wottaikan, yuka bon noa Herod kinko, yakita ġaiya niuwoabo kakulla Hierothalem ka.

⁸ Ġatun nakulla bon noa ba Herodto Iéthunuġ, pitál ġaiya noa kátan kauwál, kulla noa natelli ba bon yuraki tabiruġ, kulla noa ġurra kauwállan ġikouġ kinba; ġatun nakilliko tarai umatoara ġikouġ kai.

⁹ Wiya ġaiya bon noa wiyellikanne kauwál-kauwál; wonto noa ba keawai wiyelli pa bon.

¹⁰ Ġatun bara piriwál hieru ġatun bara ġárammateu ġarokilliela, ġatun pirralmul-liela bon kauwál.

¹¹ Ġatun Herod katoa ba bara wuruwai koba ġurramaġa bon bara, ġatun béelma bon, ġatun wuda bon konéin to, ġatun yukéa-kan bon Pilato kinko.

¹² Ġatun unta purreaġ ka wakál la, Pilato ġatun Herod kóti bula umullan: yakita unta kakillan bula bukkakan bula-bo.

¹³ Ġatun Pilato-to noa kau-wiya noa ba barun piriwál hieru, ġatun barun piriwál, ġatun barun kúri,

¹⁴ Wiya ġaiya barun, Mankulla nura bon unni kúri eummouġ kinko yanti wakál noa ġakoya-uwil ba kúri; ġatun, a! ġurulla, nuiya ta bon baġ unni mikan ta nurun kin keawai baġ ġurrapa yarakai ġikouġ kin, ġino-tara tin pirralma bon nura:

¹⁵ Keawaran, keawai Herodto: kulla baġ yuka nurun ġikouġ kin; ġatun nauwa, keawai ġali tin tetti korien noa kánun.

¹⁶ Wélkorinún wal bon baġ, ġatun wamunbinún ġaiya bon.

¹⁷ (Kulla noa buruġbuġġánun wal wakál yakita ta takillikan ne ta.)

¹⁸ Ġatun bara kaibulléun wakállu purawai, wiyelliela, Yuriġ unni kúri; ġatun buruġbuġġulla bon Barabbanuġ ġearun kinko: ¹⁹ (Ġali noa wakál wuruwai tin kokerá ġatun búnkilli tin tetti tin wúnkulla bon jail ka.)

²⁰ Koito noa ba Pilato-to kotelliela buruġbuġġulliko bon Iéthunuġ, wiyéa ka barun.

²¹ Wonto bara ba wiyá, wiyelliela, Buwa bon tetti, buwa bon tetti.

²² Ġatun noa barun wiya yukita ġoro-ka, Minariġ tin? minariġ noa yarakai umá? keawai baġ ġurrapa taraikan ġikouġ kin ġaloa kolaġ búnkilli kolaġ tetti wirrilliko; wéłkorinún wal bon baġ, ġatun wamunbinún bon.

²³ Ġatun bara tanoa-kál-bo pulli kakulla kauwál, wiyelliela, búwil koa bon tetti. Ġatun pulli barúnba ġatun barúnba piriwál hiereu pirral kakulla.

²⁴ Ġatun Pilato-to noa wiyá, ka-uwil koa yanti wiya bara ba.

²⁵ Ġatun noa bon buruġbuġga barun kin unni bon wuruwai tin ġatun bunkilli tin tetti tin wúnkulla bon jail ka wiyatoara barúnba; ġatun noa bon Iéthunuġ wamunbéa barun kin.

²⁶ Ġatun yutéa bon bara ba yuriġ, mankulla ġaiya bara wakál Thimónnuġ Kureniakál ta, tanan uwolliela koruġ tin, ġatun wupéa bara ġikouġ kin taligkabillikanne, kurri-uwil koa noa willuġ tin Iéthu katoa.

²⁷ Ġatun wirroba bon bara kauwállo konaro, ġatun bara nukuġ-ko, túġkilliela ġatun minki kakilliela ġikouġ kai.

²⁸ Wonto noa ba Iéthu warkulléun barun kai koba, wiyá, Yinálkun Hierotilalemkalin, túġki yikora emmouġ kai, wonto ba túġkillia nura nurunbo, ġatun nurun kaiko wonnai tara ko.

²⁹ A! na-uwa, purreuáġ kariġ tanan uwollinún, yakita unta wiyánún bara ba, Murrárúġ bara wonnai korien, ġatun unnuġ tara pika keawai pórkuilli korien, ġatun paiyil keawai pittelliko.

³⁰ Yakita ġaiya bara wiyellan bulkára kariġ, Puntimullia ġearun kin, ġatun yúnko ko, Wutilla ġearun.

³¹ Ġatun uwollinún bara ba unni tara kúlai ta kiruġ ka, minnuġ banún wal kúlai ta turrál la?

³² Ġatun unnuġ bula taraikan yarakai willuġ, yutéa ġikouġ katoa wúnkilliko tetti wirrilliko.

³³ Ġatun uwa bara ba unta ko, ġiakai yitirra Kalábary, unta ġaiya bara búnkulla bon ġatun bulun yarakai bula, wakál ta túġkaġ-keri ka ġatun tarai ta wunto-keri ka.

³⁴ Wiya ġaiya noa Iéthuko, Biyuġ, kámünbilla barun, kulla bara keawai ġurra korien umulli ta. Ġatun toinbillan bara kirrikin ġikoumba, ġatun wupillan woiyo.

³⁵ Ġatun bara nakilliela ġarokito. Ġatun bara piriwál yantibo barun katoa béelmulliela, wiyelliela, Miromá noa taraikan; miromabunbillia bon ġikouġ kóti, wiya noa ba Kritht ta, ġirimatoara Eloí-úmbe.

³⁶ Ġatun bara militiko béelma bon, uwolliela ġikouġ kin, ġatun nupilliela bon aket,

³⁷ Ġatun wiyelliela, Wiya bi ba piriwál Iudaioi koba, miromullia bi ġintoabo kóti.

³⁸ Ġatun upulléun wakál upatoara wokka ka ġikouġ kin pulli Hellenik koba, ġatun Latin koba, ġatun Hebáraio koba, ġiakai, Unni ta Piriwál Iudaioi koba.

³⁹ Ġatun wakállo yarakai bulun kinbiruġ-ko, kakilliela ba kúlai ta, béelmulliela bon, wiyelliela, Wiya bi ba Kritht ta, miromullia bi ġintoabo ġatun ġearun.

⁴⁰ Wonto ba taraito wiyayelléun, koakilliela bon, wiyelliela, Keawai bi kinta korien Eloí kai, ġatun ġintoa ta kátan wakál la umatoara?

⁴¹ Ġatun ġalin yakita murráráġ umá; yaki tin ġalin kai umatoara tin: wonto noa ba ġali kúriko, keawai noa yarakai umá pa.

⁴² Ġatun noa wiya Iéthunuġ, Piriwál, ġurrulla bi tia, uwánún ġaiya bi ba piriwálgél lako ġirouġ ka tako.

⁴³ Ġatun noa Iéthuko wiya bon, Yuna bo ta wal baġ wiyán ġirouġ, Unti buġgai purreáġ ka kánún bi tia emmouġ katoa Parádeith ka tako.

⁴⁴ Ġatun yakita kakulla hora ka hekto ta, tokoi ta kakulla yantin ta purrai ta katéa ka hóra kako nain tako.

⁴⁵ Ġatun punnál ta tokoi kakulla, ġatun kirrikin ta hieron kako yiirkulléun búlwa koa.

⁴⁶ Ġatun noa ba Iéthuko kaaibulléun wokka wiya noa, Biyuġ, wunún baġ emmoumba marai ġirouġ kin máttára; ġatun wiyelléun noa ba unni, wúnkulla ġaiya noa marai

⁴⁷ Yakita ġaiya noa ba kenturionko nakulla unni umatoara, pitálma noa Eloinuġ, wiyelliela, Yuna bo ta wal murráráġ unni kúri.

⁴⁸ Ġatun bara yantin kúri uwa nakilliko ġala ko umatoara ko, wirrilléun bara wapara, ġatun willuġbo bara uwa.

⁴⁹ Ġatun yantin ġikoumba kóti ta, ġatun bara nukuġ wirroba bon Galilaa kabiruġ, ġarokéa kalog ka, nakilliela unni tara.

⁵⁰ Ġatun kakulla wakál kùri, ġiakai yitirra Yotheb, wiyellikan kátan; murràràġ kakillikan, ġatun tuloa kakillikan:

⁵¹ Ġali keawai noa pitál korien barúnba ko wiyellikanne ko ġatun barúnba umatoara ko; Arimathéakál noa, wakál ta kokera Iudaioi koba; niuwoa ba mittilliela piriwál lako Eloi koba kako.

⁵² Unni noa uwa Pilato kin, bon wiyelliko murrin ko Iéthu koba ko.

⁵³ Ġatun noa mankulla barán, ġatun muġgama kirrikin ta, ġatun wúnkulla tulmun ta umatoara tunuġ ta; keawai ba unta kùri wúntelli ta.

⁵⁴ Ġatun unta purreáġ ka tupoi-tupoi-kanne-ta, ġatun papai kakulla thabbat ta.

⁵⁵ Ġatun bara nukuġ uwa ġikouġ katoa Galilaia kabiruġ wirroba yukita, ġatun nakulla tulmun, yakoai ba wúnkulla murrin.

⁵⁶ Ġatun bara willuġbo, ġatun mankulla aromata ġatun mura; ġatun koréa purreáġ ka thabbat ta, yaki tin wiyatoara tin.

24

¹ YAKITA kakulla puneáġ ka yukita thabbat biruġ ka ġoiokan ta, uwa bara unti ko tulmun tako, mankillin aromata umá bara ba, ġatun taraikan uwa barun katoa

² Ġatun bara nakulla tunuġ umatoara kurrai-kurrai biruġ kurraka ko tulmun tabiruġ.

³ Ġatun bara uwa murrariġ, ġatun keawai bara na korien murrin ta Piriwál koba Iéthu koba.

⁴ Ġatun yakita kakulla, kotelliela bara ba ġe tin, a! buloara kùri bula ġarokéa barun kin killibinbin kaba kirrikin taba,

⁵ Ġatun bara ba kinta kakilliela, ġatun wúnkulliela barúnba ġoara baran purrai tako, wiya bula barun, Minariġ tin nura nakillin moron-kan ta unti tetti-tetti ka?

⁶ Keawai noa unti, kulla noa waita ka ba bouġkulléun: ġurrulla nura yanti wiya nurun noa ba, yakita noa ba kakulla Galilaia ka,

⁷ Wiyelliela, Yinal ta kùri koba wunún wal bon máttára yarakai-willuġ koba ka, ġatun búnnún wal tetti, ġatun purreáġ ka tarai ka kúmba-ken bouġkullia kánún noa.

⁸ Ġatun ġaiya bara kotelliela ġikoúmba wiyelli tara,

⁹ Ġatun willuġbo bara uwa tulmun tabiruġ, ġatun wiya unni tara barun kin dódeka ta, ġatun barun yantin ta.

¹⁰ Ġala bountoa Mari-ko Magdalakálin-to, ġatun bountoa Ioanna-ko, ġatun bountoa Mari-ko tunkan-to Yacóbo-úmba-ko, ġatun taraikan-to bara nukuġ-ko barun katoa, wiya unni tara barun apotholnuġ.

¹¹ Ġatun bara ba wiyelli tara kakulla barun kin yanti kiloa ġakoyelli tara, ġatun bara keawai ġurrarayelli pa barun.

¹² Peter ġaiya noa ġarokéa, ġatun murra tulmun tako; ġatun woinkulliela barán, nakulla noa kirrikin wuntoara pitaka, ġatun waita noa uwa, kotelliela unni tara kátan ba.

¹³ Ġatun yakita purreáġ ka yantibo, buloara-bula barun kinbiruġ uwa kokerá kolaġ, ġiakai yitirra Emmaou, yakita kaloġ Hierothalem kabiruġ purloġ hekékonta ta.

¹⁴ Ġatun bara wiyellan unni tara kakulla ba.

¹⁵ Ġatun yakita kakulla, wiyelliela ba, ġatun kotelliela bara ba, Iéthu noa niuwoabo uwa papai barun kin, ġatun uwa barun katoa.

¹⁶ Wonto ba ġaikugú barúnba tullamá, ġimilli korien koba bara bon.

¹⁷ Ġatun noa wiya barun, Minariġ, nura unni tara wiyellan, uwollin nura ba, ġatun minki kátan?

¹⁸ Ġatun wakál bulun kinbiruġ, ġiakai noa yitirra Kleopa, wiyayelléun, wiyelliela bon, Ġintoa bo ta wakál ġowikan Hierothalemkál, ġatun keawai unni tara ġurrapa kakulla ba unti tara purreáġ ka?

¹⁹ Ġatun noa wiya barun, Minariġ-ke unni wonnuġ? Ġatun bon bara wiyá, Gikouġ kin Iéthu kin Nadharetkál unni kakulla propet ta kaiyukan umulliko ġatun wiyelliko mikan ta Eloi koba kin, ġatun yantin ta barun kin kùri ka:

²⁰ Ġatun yakoai bara ba piriwál hiereu, ġatun ġearúnba piriwál kariġ wúnkulla bon wiyayelliko tetti kolaġ, ġatun bara bon búnkulla tetti.

²¹ Wonto ġéen ba kota niuwoa miromulliko Itháraelnuġ: ġatun yantin unni tara ba, unni buġgai kúmba-ken-ta kátan unnoa tara umatoara biruġ

²² Kauwa, tarai bara nukuġ ġearúnba konara biruġ kota bunbéa bala ġearun, bara ġiokéen kátan tulmun ta:

²³ Ġatun keawai bara ba na pa ġikoúmba murrin, uwa ġaiya bara, wiyelliela, nakéun bara natoara aġelo kariġ koba wiya moron noa kakulla.

²⁴ Ġatun taraikan barúnba ġearun kinba uwa tulmun kolaġ, ġatun nakulla yanti bara nukuġko wiya; keawai bon bara na korien.

²⁵ Wiya ġaiya noa barun, A! woġkál nura, ġatun pirriral búbul ġurrulliko yantin ta wiyatoara bara ba propet to!

²⁶ Keawai noa Kritht kámúnġinbia ta umatoara ba unni tara, ġatun uwolliko kirrikin kolaġ ġikouġ ka tako?

²⁷ Ġatun kurri-kurri Mothe ko noa ba wiya, ġatun yantin to propet kariġ ko, ġurrabunéa ġaiya noa barun unnoa tara upatoara biruġ ġikouġ kai.

²⁸ Ġatun bara papai uwa unta kolaġ kokerá kolaġ, unta kolaġ bara: ġatun noa puntelliela kalog kolaġ.

²⁹ Wonto bara ba pirralma bon, wiyelliela, Kauwa ġearun katoa; kulla wal yaréa kakillilin, ġatun purreaġ ta waita uwollilin. Ġatun noa uwa murrariġ kakilliko barun katoa.

³⁰ Ġatun yakita kakulla, yellawa noa ba barun katoa takilliko, mankulla noa arto, ġatun pitálma noa, ġatun yiirbuġga, ġatun ġukulla ġaiya barun.

³¹ Ġatun ġaikouġ barúnba buġkulléun, ġatun ġimilléun ġaiya bara bon; noa ġati kakulla barun kinbiruġ.

³² Ġatun bara wiyellan barabo, Wiya, ġearúnba búbul winna ba ġearun kinba ko murrug kaba ko, wiyelliléun noa ba ġearun katoa, ġatun ġurrabunbéun noa ba ġearun upatoara ta?

³³ Ġatun bouġkulléun tanoa-kál-bo ġatun willuġ ba kakulla Hierothalem kolaġ, ġatun nakulla barun hendeka ta, ġatun barun taraikan barun katoa,

³⁴ Wiyelliela, Bouġkulléun bo ta yuna Piriwál ta, ġatun paikulléun Thimon kin.

³⁵ Ġatun bara wiya unni tara upatoara yapiġ koa, ġatun ġimilléun bara bon yiirbuġgulliea noa ba arto.

³⁶ Ġatun bara ba wiyelliela, Iéthuko noa niuwoabo ġarokéa willi ka barun kin, ġatun wiya barun noa, Pitál nura kauwa.

³⁷ Wonto bara ba pulul-pulul kakulla ġatun kinta-kan, ġatun kotelliela bara marai ta bara nakulla.

³⁸ Ġatun noa wiya barun, Minariġ tin nura kinta kátan? ġatun minariġ tin nurúnba búlbúllo kotan?

³⁹ Nauwa tia máttára emmoúmba, ġatun yulo emmoúmba, Gatoa bo: numulla tia, ġatun nauwa; kulla keawai marai koba purriuġ korien ġatun tibun korien, yanti nakulla nura tia ba emmoúmba.

⁴⁰ Ġatun wiya noa ba unni, túġumbéa barun noa ġikoúmba máttára ġatun yulo.

⁴¹ Ġatun keawai bara ba ġurra pitál ko, ġatun kotelliko, wiya noa barun, Wiya, nuruúnba kunto unti?

⁴² Ġatun bara bon ġukulla pundol koyubatoara makoro biruġ, ġatun pundol nuparai kabiruġ.

⁴³ Ġatun noa mankulla, ġatun takulla barun kin mikan ta.

⁴⁴ Ġatun noa wiya barun, Unni tara wiyellikanne-ta wiya nurun baġ ba, kakulla baġ ba nurun katoa, yantin koa ka-uwil kakilliko upatoara wiyellikanne-ta Mothé-úmba, ġatun barun ba propet koba, ġatun tehillim kaba, emmouġ kai.

⁴⁵ Ġurrabunbéa ġaiya noa barun, ġurra-uwil koa bara upatoara ta;

⁴⁶ Ġatun wiya noa barun, Yaki upatoara, ġatun yaki murraraġ ta Kritht ko ġikouġ kakilliko tetti ko, ġatun bouġkulliko kúmba-ken-ta purreaġ ka tetti kabiruġ;

⁴⁷ Ġatun wiyabunbi-uwil koa minkikanne-ta ġatun warekullikanne-ta yarakai umul-likan ko ġikouġ katoa biruġ yitirra biruġ yantin ta konara, kurri-kurri kabiruġ Hierothalem kabiruġ.

⁴⁸ Ġatun nura nakillikan kátan ġali tara ko.

⁴⁹ Ġatun, ġurrulla, wupin baġ nurun kin wiyatoara emmoúmba koba Biyuġbai koba: wonto nura ba minkéa kokerá Hierothalem ka, kaiyu koa nurun kauwál búlwára tin.

⁵⁰ Ġatun yutéa noa barun kalog kolaġ Bethany ka bo, ġatun noa wupiléun máttára ġikoúmba wokka-laġ, ġatun pitálma noa barun.

⁵¹ Ġatun yakita kakulla, yaki pitálmulliea noa ba barun, mantilléun ġaiya bon barun kinbiruġ, ġatun kurréa bon wokka-laġ moroko kako.

⁵² Ġatun bara bon murrarāj koiyelliela, ġatun willuġ ba kakulla Hierothalem kolaġ kauwāl-kan pitāl-kan:

⁵³ Ġatun kakilliela murrug hieron ka, murrarāj wiyelliela ġatun pitālmulliela bon Eloinuġ.

AMEN.